

नेपालभाषाया दक्षे न्हापां पिदंगु

सि.डि. छाखं सफू

द्वागंगु सगाः

(द्वगंगु सर्गः)

चमि

राजा शाक्य

प्रेमधर्म पिथना २१२८

હૃદય સંગ્રહ

प्रेमधर्म पिथना
देक्व, ताम्सिपाखा ।
(पुष्पलाल मार्ग)

फोन ल्या: : ४-२५८८१४
मोबाइल ल्या: : ८८४१ ०८२८१८

ISBN : 978-9937-2-0789-8

नेपाल सम्वत : ११२८
न्हापां : ५०१
ब्याक्कं अधिकार : प्रेमधर्म पिथनाया
मू : १००।- (सच्छि जक)
थाकू: फरम्याट प्रिन्टिङ्ग प्रेस, नर: ।
फोन ४-४२२१६०

देब:ध्वाना व ग्वाहालि : सेवा प्रिन्टिङ्ग प्रेस, मिलनरोड टेकु । त्रिपुरेश्वर, येँ ।
फोन : ४-२४३७५४, ४-२४६५५७

कम्प्युटर : विपिन कपाली “चिकमू”
विजेश्वरी, येँ । मोबाइल : ८८४१ ८१८२५०

हृवगंगु सर्गः

(न्हूबाखं मुना)

चवमि

राजा शाक्य

प्रेमधर्म पिथना

११२८

लः ल्हाना !

जाति, भाषा, धर्मया समानताया नितिं
लोकतन्त्रया म्हगस
म्हंकाच्चंपिन्त ।

– बाखंच्वमि

पिकाकया सुभाय्

‘हृवगंगु सर्गः’ , बाखंच्वमि भाजु राजा शाक्यया प्यंगूगु बाखं सफू खः । थुगु बाखं सफू पिथने दयाः जिपिं तसकं लय्ताः । जिमित विश्वास दु, नेपालभाषा बाखं छ्यलय् थव बाखं सफूया छपु छपु बाखं न्हू सवाः जुयाः छिकपिन्त लुधंकाबी । लिस्सें सफूया रूपं जीवन दान बियाः ध्वानाबिज्याःम्ह ‘फरम्याट प्रिन्टिङ्ग प्रेस’ , नरःया भाजु बिजयरत्न बज्राचार्य व सफूया द्यबःध्वानाः ग्वाहालि यानाबिज्याःम्ह सेवा प्रिन्टिङ्ग प्रेसया भाजु अमृतमान शाक्यपिन्त अले कम्प्युटर टाइप यानादीम्ह विपिन कपाली व कभर डिजाइन यानादीम्ह भाजु विजु श्रेष्ठ, सामाखुसिपिन्त नं यक्व यक्व सुभाय् दु ।

पिकाक

बाखंया छुमां

ख नं जिं थःगु विषयय् कनेमाःगु छु हे दु धकाः, जब कि जिगु प्रकाशित बाखं सफू छिगु न्ह्यःने दयेधुंकल । अय्सां जि हे जक 'जि' मखु – जीवनया जलं खयेकाच्चपिं सकसितं जिं गुकथं छिं उकथं दुसुकाः नाला कायेगु कुतः याये । थ्व, बाखं जुयाः ल्यहेल्यहे पुनाः पिजा कनाच्चनी' धकाः मतिइ तये । अन हे जि दुनेया जीवन बाखं जुयाः म्वाना च्वने फइ ला ! धकाः आसाकृति जुइगु कुतः याये । अले जक जिं 'जि' खंकेगु भलसा काये ।

नेपालभाषा साहित्यं गलबाःद्यः गःगु ई धयागु बाखंम्येया याम खः । बाखंम्ये, म्येच्चमिया भावनात्मक अभिव्यक्तिं जाःगु चिनाखँ-म्ये जक मजुसे पूर्वक मनुखं हंगु बाखं कःघानाच्चंगु भीसं चायेके । अथे हे मदुम्ह प्रगतिशिल च्वमि हृदयचन्द्रसिंह प्रधानया 'दया' निबन्धयात समालोचक रत्नध्वज जोशीं बाखं धाये मायेक नुगः भुलं दंकाबिल । उकेयात भाषानिभाः प्रेमबहादुर कसाःनं धाःसा बाखं मधासे निबन्ध धकाः वाक्कु छिनाबिल । – स्वार्थगत ग्वाहालिं 'दया' याइबल्य 'दया' मानव धर्म मजुसे मनूया नितिं विष जुयावनी । बस् , थ्व हे 'दया' रूपी शोषणया आगं प्वलेत 'दयां' हे प्वगिं जूम्ह छम्ह मनूया बाखं दसु जक ब्वःगु जुयाच्चन । थय् स्वयेबल्य बाखंया लिधंसा कयाः च्वयातःगु म्ये – बाखंम्ये थें बाखंया हे लिधंसा कयाः बाखंया हे शैलीं च्वयातःगु च्वखँ न्हू च्वखँया नसंचा ई खः धायेमाली । अले कविरत्न सिद्धिचरण श्रेष्ठया चिनाखँ व जनकवि दुर्गालाल श्रेष्ठया चिनाखँयात Lyrical (गीतात्मक) धायेगु याः थें च्वजाःगु साहित्यिक अभिव्यक्तिया शैलीयात कवितात्मक शैली धकाः नालाकाःगु चायेके । थुकथं हे थौकन्हय् च्वखँ धाँचां बाखं च्वयेगु न्ह्याःवयाच्चंगु दु धाये । उकिं 'दया' यात बाखं धयाव्यू थें थजाःगु हे च्वखँ शैलीया बाखंयात नं निबन्ध बाय् च्वखँ मधाइ धयागु मतिइ मतये ।

मचाबल्य लाखेय् लसिंतय्गु न्यँकं बाखं न्यने । म्ह पीसे च्वनावइ । अय्सां बहनी जा हे मनसें, गबलें जा नये धुनेवं दुरर्र ब्वाँय् वनाः बाहालय् थ्यने ।..... गबलय् ल्याय्म्हचागु बैसं थी, कलेज जीवनया किचलं

गाइ । 'गोल्डेन टच' बाखं ब्वने । अन जुजु मिदास थः हे लुँधी जूगु त्वालां
खने अले वया लोभी नुगःयात थुकलं बी ।..... 'पायण्डोराज' बक्सय् दुहाँ
वनाः छुं जिज्ञासाया लिच्वलं धुपवः दंकाः न्हाय् उसुके । विडम्बना चिच्चाः
दनाच्चंगु जीवनया नवः मयःमयः नतुनाः जि हीमी चाये । आः बैस वंमवं जुइ
धुंकल । ह्यूपाःया नँन्याःसः न्यने । चकंगु सर्गःया कल्पना याये । सर्गः हे
ह्वगना वनाच्चंगु चाइ । अले ह्वगंगु सर्गतं भीपिं दुलुपिलु जुयाच्चंगु खनेवं
जितः थःगु बाखं सफूयात **'ह्वगंगु सर्गः'** धाये मास्तिवइ । जिं ब्याक्क कुलां हे
ह्वगना वनाच्चंगु खने । ह्वगंगु सर्गतं पिज्वःगु जिं जिगु बाखनं उगु जीवनयात
प्वाःतीत स्वये

राजा शाक्य

देक्व ताम्सिपाखा

पुष्पलाल मार्ग, येँ

११२८ दिल्लागा ७

धलः

पिकाकया सुभाय्	क
बाखंया छुमां	ख
१. आक्रमण	१
२. न्यालाल्ल !	७
३. म्हगसया दुवातय् (१)	१०
४. म्हगसया दुवातय् (२)	१४
५. साक्षात छःपिनिगु थाय्	१८
६. शान्ति मामां	२५
७. अनिष्टया बाखं	३१
८. भाव विभोरगु किपा	३६
९. सचेतमान	४०
१०. ज्याथ ल्याय्म्ह	४३
११. जंगबहादुरया यात्रा	४५
१२. जिमि बाउचा	४८
१३. जीवनया दुने च्वंगु मेगु जीवन	५६
१४. खिचात व धौत	६०
१५. लः पापी तिति त्याउँ	६४

आक्रमण

साहित्य वन महोत्सव चितवन जंगल चाःहिलेगु ज्याभवःया सथिकुन्ह !
जंगल गुं चाःहिलेगु ! व नं किसि गयाः ! माधव मूल लुमन । छुं न्हि न्ह्यः व
जिथाय् वःगु । नविनं धाःगु हँ – माधव, भ्नी जंगलय् चाःहिलेगु न्हिं ! स्वाथ्या
..... स्वाथ्या स्वाथ्या ! किसि गयाः न्हिं !

अहो ! व सलय् छगू यइपुसे च्वंगु कम्प दु । धी चिनाच्वंगु म्हा दुनें दुनें
व्याक्क इन्द्रीयत तरल यानाबिल । म्हात हे जुरुजारं ल्हवनाहल । छगू भावना
बुयावल । गनं छगू म्हागसयात चाःहीकाच्वंगु दु । छुं बस्तुं काःगु थें अंग अंग
हे स्पीङ्गं स्वानाबिल । कय्कुं हुस्लुनय् चाःहीकाबिल ।

धात्थें ला माधवया सलय् माधव मखु, नविन चित्रकार द्यतनावः । छगू
काल्पनिक किपां जिगु व्याक्कं इन्द्रीययात साला कयाच्वंगु दु । वन महोत्सवया
छम्ह संयोजक – नविन चित्रकार !

जितः जंगलं सःताच्वन । किसिं लुमकाच्वन । राष्ट्रिय निकुञ्ज, चितवन
जंगलं प्याखं पाः कयाच्वन । छाया खः मस्यु, बाज्यः वनाः नं लँय् सुं ल्यासेत
खनकि राष्ट्रिय निकुञ्जया कल्पना जुइगु । न्हापां कोथा व्यूगु चा भ्रभ्रः
धयावइगु । जंगल लज किसि, स्वाथ्या.....स्वाथ्या !

माओवादीतय्गु ग्याःचिकुं बैशाक ७ गतेनिसें ९ गते तक जुइगु वन
महोत्सव ज्याभवः बैशाक २० गते न्ह्यात । न्ह्याबलें थेंया त्रिभुवन राजपथ थौं
न्हू जुयाच्वन । गुँल प्यक्वय् वन जक मखु, छगू प्राकृतिक छायापालं भुनातःगु
गुं जंगलया लु मिखाय् भल्लर जुयाः ब्वयाच्वन । चाःचाःहूगु लँ । म्वय्म्वय्
द्याःगु बःस । धुच्चा पत्तिं सुरक्षाकःमितय् चिवा । दिपाः दिपाः काकां बल्ल बल्ल
जंगल दुहाँ वनिगु लँय् दित । खाखि रंगयागु मिलिटरी ट्रकय् सकलें थहाँ वना ।
न्हापां ला सकलें मिलिटरी आरेष्ट जूपिं थें च्वन । लिपा जक सिल । जंगलय्
चिचीग्वःगु बःसत मवं । गुं खुसि पाः गये थाकु । न्ह्यात्थाय् नं न्ह्याः वनिगु
थजाःगु ट्रक हे माः ।

बल्ल बल्ल “चितवन जंगल लज” धकाः च्वयातःगु चिंग्वरःपौ ध्वदुल ।
नुगःकु दिका थें फसय् ब्वल । जिगु मिखा न्यासि न्यासि चाल । – यानय्

यानय् भ्नासु फिनाच्चपिं बल्चात । जंगल गुंया तकुस्वांमा । नेपाःमि मिसातय् ल्यासेतय् न्हूगु छाय – थन चाःह्यू वइपिं लँजुवाःतय् च्वनेगु छँचात । न्ह्यःनेसं चाकलाः दबूया छखा छँ, सुपोलं चिनातःगु । चितवन जंगल लजया रेष्टुरां । च्या, कफी, लंच, ब्रेकफाष्ट व डिनर यायेगु भ्वय् छँ । तर मलेखुया हिलटप रेष्टुरांय् सालुगु प्लेन परौठा निपा जक नयासां पित्याः मजू । धात्थें ला जिगु पित्याः मेगु हे ।

ट्रकं लजयात लःल्हानाबियाः व लिहाँतुं वन । जि सुयात लःल्हाना बिल मस्यू, जिं जंगलया दुने नं जंगल माः जुयाच्चना । जिं सुं तंम्ह मचां थें ख्याः हायेकल ला गय् जुइ, जिगु मिखा चाःचाः जक हुलाच्चन । अले जंगल लजं ह्ययेकाः लंच नके धुनेवं किसि गयाः चाः हुलेत नित स्वत जाःगु दबू छँया यांन्तां स्वाहाने गयेकल । जिगु म्हगस सत्तिना वःथें लय्लय् ताल । किसि माकलं भम्चा ब्वयेहल । राजकलि, रूपकलि, अनारकलि व चम्पाकलि । सकसिनं थःगु नां ल्वःमनी धकाः स्वयाः नं पाहापिन्त दापा मजुइकेत थःथःगु नांया 'टाय्ग' क्वखाना तःगु दु । जि न्या काले ला ख्यंय् काले ला जुया च्वँच्वं धमाधम किसि गगं थःथःगु लँपु लिनाः जंगलय् दुहाँ वन । रामशेखरदाइ नं “छु घुं कयाच्चनागु जंगलय् वयाः नं” धाधां चम्पाकलिया म्हय् क्हाँ वन । अथेहे जि नं शेखरदाइया ल्यू ल्यू लपू ज्वनाः सालाः यंम्ह थें जितः नं किसि माकलं आम्लिखः क्वातुकाः लसकुस याकाच्चना । जि भचा गयाः थें मग्याः थें जुल । शेखरदाइ न्ह्यःनेया देपाय् । जि न्ह्यःनेया जवपाखे च्वना । जिं चाः, जिं किसिया म्हय् पलाः तयेवं किसि नं कुचु चाःगु । म्हय् ख्वाउँसे च्वंगु लखं लुकाच्चनाम्ह थें मू हाःगु । तःजाःगु वया म्हं जितः भ्यास्यां कुतुं वइ थें जुल । जि कय्कुंगु खनेवं किसि माकलं आमलि खःया कुंयात कालं स्वत्ताक्क घय्सुनाः क्वय् चम्पाकलिया ब्वहलय् च्वंगु थाना खिपःया पाउदानय् पालि दुतछ्वयेगु याकल । चुलुसे च्वंगु उगु स्वःतिपाँय् पाउदन ततः जक क्यं । पाउदनय् दुत छ्वयागु जिगु तुतिं चम्पाकलिया म्हय् म्हय् उसिससि याः वन । चम्पाकलि छक्कः हानं थुरर मूहाल । उघिमय् जितः नं मनूतय् हूलय् वनेबलय् मछिंक ल्यासेतय् म्हं कानाच्चनी थें मछिंसे च्वनावल । जिं काचाक्क तुति लिक्का ।

आः छु यायेगु । किसि गये मननिगु । गये लंके धकाः वये धुन । मछालाः मछिनां चाःगु हे मखु । जिं किसि माकलं धाः थें पाइन्टया म्हिचाय् छुं मतया ।

किसिं ल्त्वाका ल्त्वाका संकीबल्य् कुतुंवने यः हं । थन जंगलय् छुं कुतुंवन
धाःसा मालेगु सम्भव हे मद्दु हं ।

चम्पाकलि ट्याक्टर वनी थें न्त्याः वनाच्चन । माथं, पाःचा, खुसि, ध्याचः
छुं हे मधाः । न्त्यःने न्त्यःने च्वंगु किसिघाँय् खाखः म्वय्हिलाः म्वाराम्वारा
नयाः लँ न्त्याः वनां तुं च्वन । स्वये हे साइ खाः वः । किसिमाकलं कनाः जक
सिल ।

थुमिसं न्हिच्छिया निसः स्वसः किलो भारपात व घाँय् नइ हं । धात्थें
किसि लही थें धाःगु उकिं हे जुइ । जितः छत्थुं म्ह गरखेसे च्वनावल । – धात्थें
थजाःपिं लही माःसा ला मुक्ताः हे दइमखु । किसि म्हय् च्वने न्त्यः व च्वनेव
गुगु कम्प नुगलय् थ्वयाः न्त्याइपुसे च्वंगु खः, ब्याक्कं किसिम्हं कुतुं वल ।
छायाःसां जि ला साधारणम्ह छम्ह शिक्षक जकं खः । चम्पाकलि ला जिमि
लँक्यंमि पासा खः । म्हं मफइबलय् सुसाःकुसाः याइम्ह छम्ह नर्स जक खः ।
अन्यथा जिं मेगु छुं बिचाः याये मज्यू । अज्ज व नुगः चर्कपिं जंगल लज थुवाः
साहित्यकारपिं भाजु द्वारिका श्रेष्ठ व मय्जु जलेश्वरी श्रेष्ठपिनि प्रतिनिधि खः ।
जिमि Host खः । वन महोत्सवया थुवाः । वयात छुं मतिइ तयेगु हे पाप खः ।
चरीत्रहीनताया मेगु नां खः ।

जिगु जवय् शेखरदाइ दु । लिउने नारद बज्राचार्य व माधव मूल दु ।
न्त्यःने गःपतय् यग्गाना च्वंम्ह चम्पाकलिया मचा-मय्लिं किसिमाकः दु ।
इमिसं जिगु मतिइया खँ स्यूसा छु धाइ !

अहो ! जि ला वन महोत्सवय् शान्ति माः वयाम्ह । जिगु निम्तिं जक मखु,
जिमि जःपिं, जिमि जःलाखःला पासापिनिगु निम्तिं शान्ति माः वयाम्ह । जिगु
जःखः जिगु देशय् माओवादीतय्गु व सुरक्षाकमीतय्गु बन्दूक व बमया चिल्लाया
दनाच्चंगु लकसय् नामसंगीति पाठ यायां पंचरक्षा व्वनाच्चनाम्ह । जिकय्
कमसेकम अष्टशील मखुसां पञ्चशील पालना यायेगु शक्ति दयेमाः । थय् जुल
धाःसा ला न्हापा सिंहसार्थबाहुपिं ल्हासा वंबलय् पापी बंजाःतय्सं लँय् लँय्
चीभाः थ्वाथ्वां वंगुया लिजः थें लसिंतय्गु म्हुतुइ लाइ । लिक्क लिक्क च्वपिं
साहित्यकार पासापिसं छु धाइ ! मखु, जिं चम्पाकलियात श्रद्धा तयेमाः ।
हनावना तयेमाः ।

थथे नुगल्य् वाफ्य् वयेकाः छुभाः सितुपातु वंका चवनावलय् किसिमाकलं
 – “हुंकन गैडाम्येय् दु, स्वयादिसँ । वरु तसकं हालादीमते” धकाः पतिं धस्वाकल ।
 जिपिं ग्यानिपिं मस्त थें सुम्क, चुपचाप । ततःहाकःगु किसिघाँय्या दथुइ छभवः
 गैडामेय्त मछालाः खाः वक्वछुनाः गन बिस्युं वने, गन बिस्युं वने यानाचवन ।
 चम्पाकलि ह्यामि जुयाः इमि न्ह्यःने न्ह्यःने न्ह्याःवना चवन । किसि माकलं नं
 वयात गःपतय् उसिससि यानाः ग्वाकाचवन । छुबें उपिं अस्यःपिं थें चवनावल,
 मेखें उपिं लाखेय् व सवःभक्कुयात हायेकः जुइपिं हुल्याःत थें चवनावल । न्हाचः
 जंगलया लँय् वयाचवनावलय् वःदलाचवंगु सिमाग्वंया प्वाल्य् वालावाला सनाः
 तहाः न्हिप्यं खने दुगुयात कथिं भ्वाभ्वा यानाः पिकायेत्यंगु लु जक लुमंसे
 वल ।

माःगु ला व ! गुम्हं “थुखे वन, थुखे वन” गुम्हं “आसे दुत छुवयेमते, पिका
 पिका” धाःपिं । “गुम्हं अय् म्वाःल म्वाःल, यायेमते ! गौमन जुइ यः । थुजाःगु
 थाय् गौमन सर्पतय् छें हे जुइयः । अथे यातकि हाप्पः दना वः थें जुइ न्हि !”
 जिगु म्ह चिंक चिंक वनाः मिइ लाःगु सुकूगु ला जुल । कय्कय् कुनावंगु
 बांलाक हे महशुस जुल । तर छु याये जिमित जंगल चाःहिइके हःपिं गाइड व
 व्वति काःवःपिं पाहाँपिसं वयात पिकयां तुं त्वःतल । कोतय् मेय् पालेत पियाच्वंमह
 नायः थें टेलिभिजनया विश्व जोशी निपा ल्हातं मूभी क्यामरा जवगु मिखाय्
 न्याकाः थःगु हंशय् व्वयाचवन । सिमा ग्वंलय् दुहाँवने धुकूम्ह तहाः न्ह्यप्यं नं
 लिक्थं वालाक्क फहिला कथं गुं पत्तिइ बिस्युं वन– गोही जातयाम्ह घोरल
 धाःम्ह खनी ।

आः हीमी चाल कि थुपिं गैडा मेय्तय्सं नं लिनाहल धायेवं छु
 याये ! जितः छुथुं न्हाचः किसि गयावलय् ह्याउँ तपुलि व लं पुनेमज्यू ।
 जनावरतय् मिखाय् ह्याउँगु तेय्लाना चवनेयः” धाःगु खं लुमन । जिं स्वम्हं
 पासापिसं तपुलि व लं छु रंगयागु पुनावःगु स्वया । अथे ला, अथे सुनां पुनावःगु
 मदु । नुगः भ्वा याउँसे चवन ।

चम्पाकलि गुंया दथुं दथुं घाँय् चीकु चीकु न्ह्याःवनाचवन । गनं पाःचा,
 गनं चाया चा जक दुगु ध्याचःगु खुसि । अजाःथाय् धुँत चवनाचवने यः हं ।
 जिमित धुँ स्वये आतुर जुल । धुँ लः त्वनाचवन जुइ । धुँ चल्लाया लाखः
 पियाचवन जुइ । तर धुँ मनू नयाच्वंसा । जितः “माउल्ड बाई ए टाइगर” नांगु

अंग्रेजी घटना बाखं लुमंसे वल । छत्थुं जिगु म्हायात धुँ हे मखंसां धुं नल ।
जितः गनेद्यःथाय् यंकाः मू हायेकाबिल ।

स्लाइड शो क्यने थें जंगल चाःहीकाः क्यनाच्वन । धात्थें चम्पाकलि
जंगलया छारुवा दोहं ! मखु मखु, चम्पाकलि जंगलया लानि मय्जु । वं फुक्कं
स्यू । वयात फुक्कस्यां हनावना तः । वयात सुनां छुं याइ मखु । उकिं व
जंगलय् न्ह्याथाय् नं वने फु, न्ह्याथासं वने नं सः । व जंगलया लानि हे खः ।
मातृसत्तात्मकताया नकिं खः । नारी स्वतन्त्रताया प्रतीक खः । जंगलय् दुने
च्वंसेलि जिं जक मखु, जिपिं फुक्कस्यां वयात हनाच्वने माः । थौया इलय्
मिसा मिजंया भेद यायेमज्यू । वयात हनेगु हे थःत हंकेगु खः ।

अय्सां न्हाचः ब्रेक फाष्ट याना च्वनावलय् सर्जकतय् दथुइ गफ जूगु
लुमनावल । – थन जंगलय् बहनी छगू अजू चाइपुक बिडम्बनात्मक रोमान्स
जू, छिकपिसं स्यूला ? थन लजया किसित चिनातइगु किसिगलय् जंगली
बाकिसित वयाः माकिसितयत् हय्काः वइगु । गलय् माकिसितयत् ततःपुगु
सिखलं चिनातइगुलिं इपिं बिस्युं नं वने फइमखु । न्ह्याक्को कोह
कोह हालाहःसां सुनानं ग्वाहालि यायेगु साहस हे पिकाये फइमखु । इमिसं
मनूत च्वंच्वंगु बल्चा, छें हे थुना वी यः । अले इमिसं सिखलं चिनातइपिं
माकिसितय् पुखुलिइ प्याःचाः लंक लः त्वनाः जंगलय् तुं बिस्युं वनी ।
धात्थें व लु तसकं भयानक । थनया मस्वसे मगाःगु छगू तमाशा थ्व नं
खः ।

— — —

तर लजया दनेकोथाय् चम्पाकलि व जंगलया विषयय् छुं च्वये धकाः न्ह्यः
हे मवयेकुसे कापिइ च्वसा क्वछुकाः बिचाः याना च्वनाम्हेसिया क्वाःलखं पूगु थें
छत्थुं मू हायेक म्ह पिच्यात । ख्युंसे सुंसां दंगु गुँइ “लोरी म्ये” हालाच्वपिं
किलिकिलिचापिनि सः व यांकीया सः हे थप्प दिक्क चम्पाकलि प्रलय जू थें
चिल्लाय् दनाः कोह कोह हालाहःगु ताल । जिगु नुगः भःभः
लहुल । चम्पाकलियात छु जुल जुइ । का, धात्थें छु जुल चम्पाकलियात !
..... व नं ला छम्ह प्राणी खः । धात्थें ला लजया आम्दानी स्रोत हे इपिं ।
दनेबलय् छक्कः सिखः फ्यनाव्यूसां ज्यूगु ! – वयात चिनातःगु सिखलं

स्यात जुइ ! छत्थुं जिगु मिखाय् चम्पाकलि च्वनीगु किसिगः जक त्वाल्ल
च्वंच्वन । जिं न्ह्यः वयेके हे मफुत ।

कन्हय् कुन्हु सुथय् च्या त्वनेत डाइनिङ्ग रूमय् वनावलय् च्या कफी त्वँत्वं
हे छथ्वः साहित्यकार पासापिसं कनाच्वन । – ‘म्हगः बहनी लिबाक्क जंगली
किसिवःगु दु’ धकाः धाःगुलिं किसिगलय् जिपिं स्वःवनागु । तसकं हे भयानक
दृष्य खनीसा । गज्याःगु आक्रमण ! देब्रे लहरा ^१ यागु आक्रमण थें का । □

(“नेपाल” ऋतु पौ/दं ५०/ल्याः ३)

न्यालाल्ल !

संविधान सभाया मुँज्या जुयाच्वन । जुजु मिलिन्दया न्ह्यसःया लिसः बीगु कुतः थें थी थी नेतातसें संविधान सभाया ल्यज्याया बारेय् बांलाक ध्वाथुइकेगु कुतः यानाच्वन । जिं थःगु उत्सुकता दबुलिइ प्यपुंकाच्वना । ज्याभवः न्ह्याकामिं नां कयाः न्ह्यब्वयेवं दलया छम्ह नेता डाय्सय् दं वल । वया बिचाः, वया भावना माइकया छयं ग्वलं दुहाँ वनाः सःग्वंपचां (स्पीकर ध्वांग) स्वांपवः जुयाः ह्वल ।

“सुनानं जा बुकातःगु नये स्वयाः थः हे भुतूसुवाः जुयागुया जा इलय् हे नं नये खनी, लिसें सवाः नं साइ । बजारी सवाः स्वयाः थःगु हे ल्हातं दयेकागु नसाः भिं-उसाँय्या निम्तिं ताःलाइ । हः संविधान सभाया ल्यज्या नं अजाःगु हे खः । थःगु हकया भिं तातुनाः थम्हं कानून दयेकेगु । अय् धयागु जनताया बिचाःयात कःघाइपिं मनूतय्त भोट बियाः ल्यज्याय् ल्ययाः त्याका छवयेगु । थूपिं स्पूपिसं थ्व खँयात जनताया दथुइ थ्यंकेमाल । अले जक च्यागू दल व व्याक्क जनताया लोकतन्त्रात्मक गणतन्त्रया आकांच्छा पूवनी ।”

थुकथं दबूया माइकं पिहांवःगु न्वचु घोंसः व तिसः जक पाः, मेगु अथे हे खः । अय्सां जिं इमिगु न्वचु ध्यान बियाः न्यना हे च्वना । थबलय् छाये खः मस्यू, मेपिं स्वयाः यक्को हे अप्वः खँ ध्वाथुइका तःम्ह नं जुइफु, छम्ह मनू, गणतन्त्रवादी व लोकतन्त्रवादीत मुनाच्वंगु दुवातय् दनाच्वंम्ह अथें अथें हे न्हिलावन । अले भचा उज्यां थ्यनाः लँय् जूम्ह छम्हेसित खँ थ्वकल ।

“गय् च्वं, जिं धयागु मखु ला ! लोकतन्त्रवादी व गणतन्त्रवादी शक्ति मिले जुल धायेवं तिनि प्रतिगामी तत्व न्हनावनी । थौं अथे हे जुयाः लुल । जि साप लय्ताः । थ्व लसता व्याक्कसिगु जुया वनेमा ! जिगु देय् तःजि जुया च्वनेमा !” थुलि सुवाः बियाः व लँजुवाः दुवाः पुलाः जक छु वन, अवलय् हे छम्ह वें चिल्लाये दनाः हाल । –

“आसे, तराइ ख्वःगु दु । पहाडया चूरे भावर लागिचाःगु दु । तराइ व पहाडया दिलाय् खापां कानाः स्वनिगः घाःपाः जूगु दु । ख्वये नं मफु, न्हिले नं मफु । हा हा हा ! पाय्ण्डोराया पिला-सन्हू तज्यात ! पाय्ण्डोराया

पिला-सन्हू ! थाय् थासय् लूटपाट, अशान्ति, विद्रोह, आतंक !
थज्या:गु लकसय् चुनाव गथे जुइफइ ! हा हा हा हा !

सूर न ताल जुइक म्व: न्ह्यूगु खना: तसकं धैर्य दु थें च्वंक छम्ह मनू
फ:चालैय् दना: हालाचन ।

“छु पह:याम्ह मनू ! धात्थें वैं हे का हुँ । भचा ला धैर्य
दयेमा:गु नि । थ्व ला संक्रमण काल ख: नि । भचा भचा शान्ति भचा
भचा अशान्ति ला जुया हे च्वनी नि । गथे थ: मांबौपिं खनेवं मस्त दु:ख प्वंका:
प्याय्क खयाहइ । हारां हे जुइ, च्वापुका: जुइ, अले अस्य: हे जुइ, न्ह्यागुं
जुइ । अथे हा जक हालां संविधान सभा, गणतन्त्र अले स्वशासन ता:लाके फइ
ला !”

व मनू गुगु पार्टीयाम्ह ख: मस्यु । ला:सा गुगुं छगू सत्ताधारी राजनैतिक
दलया कट्टर समर्थक नं जुइ फु । ला:सा भावी उम्मेदवार हे ख: ला ! व नं धाये
मफु । अय्सां वया खँ जित: वच्छि थू, वच्छि मथू थें जूगुलिं मुसुक्क जक
न्हिला: जि सुतुसुतु छैय् वया ।

छैय् थ्यनेवं छु हू वल मस्यु, जिमि कला:या टि.भी. सिरियल स्वयाच्वंगु
च्यानल हिला: समाचार तयाबिया । जिमि कला: वातां च्वन । लिपा भचा भचा
तं ल्वाकज्या:गु ख्वालं दनावन ।

समाचार क्वचायेवं कान्तिपुर च्यानलं संविधान सभाया वारेय् थीथी स्वंगू
दलया स्वम्ह नेतातय्के अन्तरवार्ता का:गु ज्याभव: वल । जिगु न्हाय्पं व मिखा
नितां छपाय् जुया: टि.भी.या धकिनय् प्यपुं वन ।

ज्याभव: न्ह्याकामिं स्वम्हसिगुं म्हसीका ब्वये धुंका: कांग्रेसया नेतायात
न्ह्य:ने ब्वल ।

नेतां भचा त:जि पह: क्यना: घुंकया: न्यंकल । –

“थथे हे अशान्ति जुयाच्वन धा:सा संविधान सभाया ल्यज्या जुइफइ मखु ।
सरकारय् च्वना: सरकारयागु हे विरोध यानाच्वने ज्यू ला !”

अनं एमालेया नेतां स: थ्वयेकल । –

“संविधान सभाया चुनाव जुइ । अले जुइ नं मा: । मखुसा प्रतिगामी तत्वं
फाइदा काइ । अले जनताया म्हगस चुंचुं दली ।”

इमि खँ न्यने धुंका: माओवादीं घुर्कि न्यंकल । “ न्यालाल्ल ! चुनाव जुइ नं फु, मजुइ नं फु । संविधान न्ह्यः हे दकले न्हापां गणतन्त्र निं घोषणा यायेमा: । मखुसा जिमिसं हानं संघर्ष याना: सतकं हे गणतन्त्र कायेगु जुइ ।”

अन्तरक्रिया स्वयाच्चनाम्ह जिं सुनां सुनां छु छु धा:गु मसिया: ह्वाज्य: जुया च्वनाबल्य् ज्याभव: न्ह्याकामिं ज्याभव: क्वचायेके न्ह्यः वय्क:पिन्त सुभाय् व्युव्युं धाल । – “आ: न्यनादिल मखु ला, दर्शक भाजु मय्जुपिं ! जिं हानं छुं धयाच्चने मा:गु मदु थें च्वं । संविधान सभाया चुनाव जुइ लाकि मजुइ ! ”



(“सन्ध्याटाइम्स”/ने.सं.११२७ यंलाथ्व पारू)

१. देब्रे लहरा, अज्या:गु गसिमा ख:, व गुगुं सिमाया जवय् च्वंम्ह लाखि खिप: जुया: देपाय् च्वंम्ह सिमायात नां कायेमत्य:म्हं थें हित्तु हिनावी । अबलय् व देब्रे लहरां च्यूपिं सिमात आचाकलिं दायावनी ।

म्हगसया दुवातय् (१)

न्त्याबलें थें थौं नं म्हगसय् म्हनाच्वन । थ्व देश न्हापा तःधं क्यब हँ । थन क्वंसिमा दु । थी थी भंगःत व्वयाच्वनी । लापाचात प्याखं हुलाच्वनी । आः लाखे साःगाः हँ, दिप हँ, छू छु । पत्याः हे मजू । जिं न्यनातयागु ला न्हापा जकं दिप का । दिप दुथाय् तिर्थ नं ला दयाच्वनी । तर तिर्थस्थल सां खि बाःबाः वइगु धःया धः जक दुगु चःबि, पाइखाना । आः ला थन चःबि मदु, दिप नं मदु । ततःखागु छें दु । भवः भवः पसः दु । म्वः म्वः मनूत जू दु । तापाकं वइपिं लँजुवाःतय्त् भासु फीगु फल्विया पलेसा बालंया बालं जक वीगु लज थें ज्याःगु छें गुलि दये धुंकल ।

ख ला मनूया जीवन हे म्हगस मुनाच्वंगु छगः थल । गबलें थुगु थलय् मनूत दुसुना वनी, गबलें भय्भय् बिनाः वानाबी । मस्यू, त्यः ला मत्यः ला ! भिं ला मभिं ला ! जिं थःत सिथं यंकूगु हे तक्वः म्हंके धुन । बांलाःगु म्हनीबलय् म्हगसं दनावये मास्ति वइमखु । अन हे जक प्यपुना च्वने मास्तिवइ । गबलें वाय्वाय् हाहां म्हगस पिचाइ । म्ह जिग्रिंक च्वनी । सेंसें वइ । इक्कुसे च्वनी । चःबिइ तक वनाः च्व फाःवने हे ग्यानाच्वनी । न्ह्यःने सुं ध्वदुइ ला ! ल्यूने सुनां सालाकाइ ला ! म्ह हे पीसे पीसे च्वं ।

जीवन, भय व दुःखं जायाच्वंगु स्वये, म्हगस जक जीवन मखु गय् धाये ! जीवन सुख व दुःखया ल्वाकःबुकः धाइ । तर मनू सुख पियाच्वंम्ह अनुशासीत क्यासाबिंका खःला ? मनोवैज्ञानिकतसें धाइ, म्हगस नं यथार्थताया छुं खः । अय्सां जु हे मजुइगु, खँ हे मखनागु नं म्हनाच्वनी । गय् गय् ! तर जीवन हे मदुसा म्हगस गथे म्हनी ! म्वाना च्वंपिन्त हे जक ला म्हंकः वइगु खः । म्वानाच्वंपिसं सीपिन्त म्हंकः वन धयागु आःतक जिं मन्यनानि ।

खः, जिं गिरिजाप्रसादयात लाउदा फय्खः चलेयानाः चन्द्रमाय् थहाँ वनाच्वंगु म्हंका । प्रचण्डं कर्णदीपय् हरिशचन्द्र जुयाः धोति छपु जक चिनाः सी उनाच्वंगु म्हंके लं । गुलिखे आयोगं क्वःछयूगु उलाखँया कार्यान्वयन सिकं त्यलावंगु जितः अनुभव दु । तर थौं अथे मखु । म्हगस छुं छुं पूवं थें । छुं छुं पूमवं थें ।

जीवन लू थें, मलू थें, न्हाय्कनय् जक लावालाबा जुयाच्चन । व जिगु लिक्क दु, अय्सां जिं वयात थी मफु । जितः वया क्वाःजःया स्पर्श माःगु दु ।

म्हगस छगू लुमन्ति जक खः ला ! लुमन्ति धयागु नुगलय् जक प्यपुना च्वनी । इतिहास नं लुमन्ति खः । अय्सां वयात मखु धायेमफु । न्हापा जिमि जःपिं मदइबलय् कर्णदिपय् मि तयाः त्वःता वये धुंकाः लिहाँ वयेबलय् धलकों मवसे लुँतिया खुसि सिथं सिथं तपिंता जुनाः वयेमाः । देक्वया खुसि सिथय् हनुमान घः दुगु घातय् जिमि दूब्यंकः वयेगु । आः थन हे जिगु छें लाये धुंकल । ई हिल । बहत्तर फुटया व्या दुगु लिंक रोडं खुसिया घाटयात नुनाबिल । देक्व गल्लि व लिंकरोड त्वन । म्हगस खः धाये ला, छु धाये ।..... थन जि च्वनाः यक्को म्हगस म्हंके धुन । जिगु क्वचिनाच्चंगु दक्को दक्को मछिं मछिं च्वत्तुक चीकाछ्वये धकाः । अय्सां थ्व जीवन हे अजाःगु, थ्व जिगु म्हगस हे अजाःगु, गुलि गुलि बसिलां छात उलि उलि हे क्वचिना वनाच्चंगु छेंया भ्याः लुखा थें । घाटप्रतिघाट, विश्वास व अविश्वासया नाःचा-घाँय् बुया वयाच्चंगु पुखू थें । थन थः कतः जुइ, कतः थः जुइ ।

म्हगस हे खः नि न्हापा थन खुसि सिथय् ल्वहँतं सियातःगु घाट । खुसिइ कुहाँ वनेत खुसिसि धुछिं ल्वहँया स्वाँहाने त्वाथः । दथुइ दथुइ तुं प्यपुना च्वंगु दु । अन हे च्वनाः गुर्जु प्यं थयेकाच्चनी । जि हे ग्वःक्वः ग्वःक्वः ला जिमि थःथितिपिं मदइबलय् दू ब्यंकः वयेलं । व हे तुंछिइ च्वनाः नौचां जिगु माःबूगु छयं पाचुका च्वनी । छक्वः निक्वः व्वनेकुथिं विस्युं वयाः व हे तुंछिया काप्पिइ काप्पिइ असलाचा न्या लाः वये नं लं । प्वःतसें जाः प्यनाः सिंगे न्या कुरिंचाय् थनाच्चनी । सुयागुं जीवनया ह्युपाः बाय् अन्त थें ।

म्हगस छुमां नं खः । म्हगस स्वःतिपाँय् नं खः । थौया लोकतन्त्रं हःगु राजनीति थें । भगवान कृष्ण व चाणक्यत इप्पां थिप्पां । इमि नुगलय् व न्ह्यप्पुइ छु छु पुसा दु, माकःया कम्पाः दुगु न्याय जुयाच्चनी । प्रतिगामीतलिसे ल्वानाः त्ययेकाः नं इमि गर्दनलिसे प्यपुनाच्चंगु थःगु प्राण, भूत, प्रेत, बोक्सि बाय् जादूगरतसें थें गुगुं सिमाय् बाय् सुयागुं जिवय् सुचुका तइ । उकिं उमिसं प्रतिगामीतलिसे ल्वानाः नं प्रतिगामीत त्वाय् चिनाच्चनी, कृष्णया सुदामा थें ।

थ्व नं जिगु जीवनया म्हगसय् खः । नेपाली कांग्रेसया च्वजाःम्ह नेता कृष्णप्रसाद भट्टराइ लँ दापा जुयाः ला मस्यू, हनुमान ध्वाका लाय्कुलिइ वयाः

बिचा: फः वयाच्चन । न्हाचःतिनि म्हंगु जितः । – मस्यु, इमि थन सु सीगु जुइ ! इमि सु सीगु जुइ ! इपिं ला सी हे म्वाःपिं, इमि ला थःगु प्राण हे गनं बाय् सुयागुं जिवय् सुचुका तयेफुपिं । उकुन्हु तिनि जनकवि दुर्गालालदाइयात हनेगु ज्याभवः भः भः धायेक जूगु थाय् । आः छत्थुं गथे भःभः न्हूगु मस्यु । हानं थ्व ज्वलय् नं मखु थें च्वं ।

घाटया सिथय् सीम्ह हनुमान द्यः पुलिं चुयाः धयाच्चन – हुंकन च्वंगु जिगु लाय्कू ज्वःगु सतः न्हंका छ्वःसां जितः न्हंका छ्वये फइमखु । मस्यु व सतः गनया वयागु खः धकाः । छु इमिगु अन त्वहं पौ तिका तःगु दु ला ? दाता हे मेपिं । वया न्ह्यःने च्वंगु धाक्को वयागु जूसा भीगु छुं हे मखुत । धात्थें ला फुक्क भीगु धर्म चित्त ब्वलनावयाः थापना जुयाच्चंगु ला खः नि । आः हानं वयागु गथे जुइ !

मस्यु, व हनुमान द्यःचा नं सीम्ह ला म्वाःम्ह ला ! म्वाःम्ह नं गथे जुइ ! सीम्ह हनुमान द्यः धकाः जि मचाबलय्निसें न्यनातयागु । सीम्ह जूसां सुं सुं मनूतय्सं मस्तय्त ग्याः त्वय् वयेका वीयः धकाः लड्डु छाः वयाच्चंगु दु । म्ह छम्हं हिं बुले थें ह्याउँकाः फुक्कसित म्ह चिंक वंक थाराथारा न्हुइकाः ख्यानाच्चंगु दु । खुसि सिथय् लानाच्चंसां फिरिफिरि लापाचात थें पर्यावरणया छुमां मखु । व ला न्ह्याबलें ‘रघुपति राघव राजा राम’ रागया अलाप जक कया च्वनीम्ह वस्ताज खः । तर छाय् खः मस्यु, नुगः कःघाना मकाःसां व हे व हे धुन थ्वयाच्चनी । खः थें मखु थें जितः नं थिमिगु ‘सा रे ग म’ या थथ्याः क्वथ्याःलय् दुंबलय्, उघिमय् हे तपिंताया खुसि सिथय् धस्वानाच्चंम्ह कमरेड पुष्पलाल श्रेष्ठया भवातां थः फुसय् च्वंगु ह्याउँगु ध्वाय् क्वकयाः खबि हुयाच्चन । जिगु नुगः खुल्ल मिन ।

अबलय् हे ‘चोर ! चोर ! धकाः हालाहःगु सलं जिगु म्हगस गुत । जि न्ह्यलं चाल । ज्वलं च्वनाः म्ह भ्यातुसे च्वन । जिगु अवस्था खनाः जिमि कलातं ‘म्वाःल, लिबाय् धुंकल द्यं । थन थथे हे का । देशया अवस्था गपाय्चः स्यनावंगु ! देसय् दक्को मनूत थन हे दुहाँ वल । ज्याज्यि छुं मदु । नये माल, त्वने माल । मोजमज्जा अप्वः । धेवा जक गनं वइ । अले खू जुल । उकुन्हु नं अपाय्चः लि हे मबाःनि हुंकन नारांदाइयाथाय् बालं च्वंम्हेसित खुकुरिं पालाः लुटेयाना यंकल । हानं ल्यासे ल्यासेपिं मिस्त ग्या नं मग्याः । चान्हय् चान्हय्

मोटरं तः वयाच्चनी । होटल्य् ज्या याइपिं धाल थें च्वं । उकुन्हु भीगु हे छें
क्वसं पाइन्ट त्वःताः भ्वाल् च्व फानाबिल । मत च्याकाबियां वरु थः हे भ्याः
तिनाः दुहाँ वयेमाल । छु धाये आः ! का म्वाःल लिवाय् धुंकल चँ ।
जिमि कलातं मतिना यात । जिं द्यने पहः याना । गंगु मिखा नं लिपा ज्वलं
च्वनावल । न्ह्यः बछि ज्वः बछि । जि हाकनं म्हन । तर जिं चाः । थ्व म्हना
च्वंगु खः । मस्यु, थथेभनं गुलि जक म्हना च्वनी तिनि जुइ । जि द्यने हे ग्यात ।



(“नःलि” ल्याः १६, हेमन्त ११२७, कौला - कछला)

म्हगसया दुवातय् (२)

थुगु म्हगसय् जि छम्ह पासानाप यलय् लात । लँ फुक्क चिकंअप्पां जक सियातःगु । गाःवाहालं अगिमथः वनेगु चुक थें जाःगु लाछि त्वाः हँ । जिलिसे वःम्ह पासा गुन्दाकाजि जुयाच्वन । व म्हगस जितः नसंफाःगु थें बाबू वन । वच्छि बू, वच्छि मबू । म्हगसय् म्हंगु धकाः चाः, अय्सां म्हगसय् नं मखु । आज्जु दयेकाः जिपिं गन वने त्यनागु खः, जिमिसं हे तिप्याये मफु । लँ हे दापा जू थें । गन वने त्यनागु जिपिं, गन लात ।

साप अजू चायापु, व तिनिख्यः थें च्वंगु त्वाःया लाछि । खव पत्तिइ सिथय् छवालाचा जक तहाकय्क छें दु । मेगु लाछि छगुलिं त्वपुइक गनं नं बीम धलिं मदयेक इलां छपातं ढलान यानातःगु दु । क्वय् फुक्क त्वातां च्वंक चकं । चय् सर्गः खनेमदुसां चक्कंगु सर्गतं थें स्वाभाविक जः दु । खव सिथय् छवालाचा फः थें तःहाकःगु छें, क्याम्पस व नेपालभाषा ख्यःयाम्ह पासा रूपेश बज्राचार्ययागु हँ ! आज्जु ध्वदुकेगु लँय् ववं गुन्दाकाजि तन । उकिं लकथं रूपेश बज्राचार्यया छेंय् थाहाँ वनेगु त्वहः दत । रूपेशयात सःतु सःतुं थाहाँ वना । पुलां छें । चां दनातःगु । छेंया बँ फुक्क चा जक । खाःचिं खाःगु अप्पा खने दुगु अंगः । छेंदिया स्वाहानें मातं खनेदु । रूपेशया बाः च्वतं कुहाँ वल । तसकं ल्त्वं । बागःचा धयां तसकं मखु । खाः नं हुप्प च्वनाः चतांमरि थें । न्हापा अपाय्चवः ल्त्वंम्ह मखु । युरिक आइसिदया ल्वय् दुम्ह । न्ह्याबलें तुति स्याः धकाः म्हुतु म्हाले माःम्ह । जिगु हे क्याम्पसया अंग्रेजी विषयया प्राध्यापक । साःप मिलनसार । न्ह्याम्हलिसें भ्यलय् पुं । वसपोलयात खनेवं हे जिं हनाबना तया । – ज्वजलपा सर ! छःपिन्त मखनागु यक्को दत । म्हं फु ला सर ! आः नं अथे हे तुति स्याःनि ला ? अं, सर ला साप ल्त्वनाच्वन !”

“अथे हे खः, भाइ ! फुक्क पाय्छि हे जू ।” तसकं नुगः चकंका वसपोलं लिसः बिल । अवलय् रूपेश नं थ्यंकः वल । – खः लकथं छक्कः थाहाँ वइगु ।” थुलि धयाः जिपिं थःगु लँपुइ तुति ज्याना । गुन्दाकाजि हानं तन । गन वं गन वं । जितः गन लाः गन लाः जुयाः मेगु हे थासय् लात । अले हानं जि रूपेशयाथाय् वना ।

मातंया वँ थिलातःगु लव कोथा । सुकू लानातःगु दु । तिनातःगु भ्याःया फलय् फ्यतुनाः रूपेशया बाः धिसिमिसि धायेक फ्यतुना च्वन । अथे हे ल्ह्वं । जि न्ह्यःने लिक्क वनाः ज्वजलपा याना । टि. भि.इ वइगु विज्ञापनय् थें वसपोल छत्थुं स्वाइँया धायेक खने मदयावन । दुरुस्त मिष्टर एक्स थें । जि थारा न्ह्याः ग्यात । लाःसा ध्यान च्वनाच्चंगु जुइ । तन्त्रमन्त्रय् दुनाच्चंगु जुइ । म्ह थुरर खानाच्चन । मसीक जिं छुं अपराध याना थें । लिपा रूपेशया मां व निनिपिं सु सु खः मस्यु, स्वम्ह ति जिथिपिं मिस्त पुजाभः ज्वनाः कुहाँ वल । जिं जिगु छुं दोष मद्दु” धयाथें क्वमालि जुयाः जूगु फुक्क खँ कना । इपिं न्ह्यःने वनाः स्वां छाल । पुज्यात । अले हानं न्हापा गथे खः, अथे हे प्रत्यक्ष खने दयावल । दर्शन बी थें ।

सु जुल मस्यु, छम्ह पासानाप सुतुसुतुं कुहाँ वया । – जि ला थज्याःगु खँ पत्याः हे मयानाम्ह । थःगु हे मिखां खंक खंक । आः पत्याः यायेगु लाकि मयायेगु ! लाःसा सर, प्राध्यापकं रिटायर जूगुलिं छें च्वच्चं योग अभ्यासं तन्त्रमन्त्र अध्ययन यानाः पूर्वंगुलिं अथे शक्ति लुयावःगु खःला ! जिं ला छुं हे थुइके मफु ।

पिने लाछिइ थ्यन । यलयया महाबू बाहाः पिनेया लाछि हँ ! अप्पा व चा त्वाकज्याःगु लँ सिथय् सिथय् धः दु । गुन्दाकाजि हानं खने दत । तर ख्वाः बांलाक सी मद्दु । व लँ सिथय् छम्ह मनू आकाभाकाय् भ्वाक्क ग्वतुल । तिल्वय् वःगु थें वाथावाथा कन । म्ह फ्याताफ्याता कनाच्चन । बलि बी धुंक्मह बाहां थें । लः मुनाच्चंगु धलय् वया म्ह बछि दुं । जिं लाय्लाय् बुया । सुं की क्वः हे लँय् जू मद्दु । वया लिक्क छम्ह बुरिम्ह मिसा, वया थः जहान थें च्वं, वया लिक्कय् च्वनाः छुं हे मखु थें च्वंक छ्यनय् उसिससि यानाच्चन । जितः मतिइ वन । – अथे तिल्वय् वःपिन्त थी हे मज्यू धाइ ।

म्हगस अद्भुत खः । छु जुयाः गथे जुयाः म्हनिगु खः जिं छुं हे मस्यु । न्ह्यलं चाये धुंकाः लिपा थथे म्हंगुया हुनि मालाच्चना । थ्व म्हगसनाप जिगु जीवनलिसे छु स्वापू दु, जिं छुं थुइके मफुत । जु हे मजुइगु म्हनिगु । ‘ख ला, मजुइगु छुं थुइके मफुत । जु हे मजुइगु म्हनिगु । ख ला, मजुइगु छुं जुलकि म्हगसय् थें का’ धाइ । ‘सिकं म्हंकः वलकि जनबाहाःद्यः छक्कः पुज्याः वनकि ज्यू’ धकाः पत्याः याइ । थथे म्हनीगु लुइ थः जुइ धुनागु थाय् नं दयाच्चनी । थः

गबलेँ मथ्यंगु थाय् नं लुयाच्चनी । नवाःकिपाय् जक खनाम्ह मनूयात आत्मियता दयेकाः लहना तयाच्चनी ।

अं थौं म्हनाच्चंगुयात माः हनाः लुमन्ति छक्कः व्वयास्वया । रूपेश व वया बाःयात बांलाक हनाबना तयाच्चनापिं हे जुल । रिटायर जीवन हनाच्चम्ह नं खः । त्वय् नं दुम्ह खः । उकिया च्यूताः जि नं न्हापा छक्कः पुलि व तुतिया गौचा वँचुक मना वयेके लं । उकिं वसपोलनाप दुबिस्ता व्याः । थ्व सत्य खः । जिगु जीवननाप स्वापू नं दु । बैस वंकाः ल्त्वंके मज्यू धाइ । ल्त्वनिगु धयागु थी थी ल्वय्यात व्वनेगु खः धाइ ।

थथे ल्त्वंगु खँयात कयाः, अं, म्हिगः ख्यालिगुलु मुँज्याय् कलाकार च्वमि रामशेखरदाइ नापलाःगु । अबलय् रामशेखरदाइ यक्को हे ल्त्वनाच्चन । उकुन्हु उकुन्हु नापलाःबलय् स्वयाः यक्को हे पाः । न्हापा भचा गंसि । आः यक्को स्वये जियाः ल्त्वनाच्चन । प्वाः तग्वः जुयाः तःमिम्ह साहु थें च्वं । तुति स्याः धाःगु ला जिं मन्यनानि । दम वयेयः धाःगु जक न्यनातयागु । सेंसें फुंफुं वइम्हेसित अपाय्चः ल्त्वकेमज्यू धयागु खँया छुमां जक बियागु खः । उकिं नुगः क्वतुंकी धकाः मेगु छुं धायेगु मज्यू ताया । लाःसा उकिया हे लिचः भचा विकृति जुयाः रूपेशया बाःयाके लाःवन ला ! रामशेखरदाइ व रूपेशया बाः निम्हं छम्ह जुयाः दं वल ला ! धात्थें म्हगस धयागु अजूचायापु, कलाकार लियोनार्डो भिन्सिया कोलाज कला थें ।

वरु उगु म्हिगःया म्हगसय् खंगु त्वाःया बारेय् म्हिगः व हे मुँज्याय् यल नेपालभाषा मंकाः खलःया नायः सुरेश प्रधान व किरण शाक्यपिन्त कनागु – गाःबाहाः त्वाःया भचा उखे थुखे जुइ, पाय्छि थन हे धाये मफुत । न्हापा ख्यालि न्हिलि व ध्याचुलिं जाःगु चिनाखँ च्वइम्ह छम्ह कवि दु । वय्कःया नां लक्ष्मीदेव ‘श्रान्त’ खः । वया ध्याचू चिनाखँ न्हापा च्वसापासां पिथंगु ‘नसला’ साहित्य मुना सफुतिइ पिदंगु दु – “यः तता ! जि गन पँय्न वनेगु !”

तर यलयापिं जुयाः नं इमिसं ‘श्रान्त’ वाजेयात म्हसीके मफुत । अले त्वाःबाः म्हसीके फइगु ला खँ हे मन्त । थ्व खँ म्हिगःया ख्यालिगुलु मुँज्याय् मदनमोहन मिश्रयात ध्याचू विधाय् सगरमाथाय् दक्के न्हापां पलाः तःम्ह तेजिङ्ग नोर्गेलिसे ज्वःलाकूगुलिं वःगु खँ खः । थुगु बिचाः सायद लक्ष्मीदेव ‘श्रान्त’ वाज्या मदन मोहन मिश्र वाज्या स्वयाः थकालि खः लाकि’ धकाः शंका

जूगुलिं पिकयागु खः । ध्याचू कवि लक्ष्मीदेव 'श्रान्त' ला भीगु लिक्क मदये धुकल । अय्सां न्यनेकने व मालेकुले ज्या जुल धाःसा क्वःछी फइ । बस् वहे लक्ष्मीदेव 'श्रान्त' या त्याजिके मफुगु त्वाःदंवःगु जुइ ।

अले म्हगसय् छम्ह म्हमस्यूम्ह मनूयात तिल्वय् वःगु व वया थः ज्यथिं छुं हे मखु थें माकःया मतिना यानाच्चंगु थौया लकसय् थुंदीगु राजनैतिक विडम्बनापूर्णगु अवस्था खः ला, जिं मस्यू । खँ छु धाःसा थौं लोकतन्त्रया फसय् नं व हे पुरातन शैलीया जीवनं लिचिलेत थाकु चाःनि भीत । व हे ध्वग्गीगु सिक्के धर्म व संस्कृतिया सवाः भीत यःनि छु याये !

थौं जिगु म्ह छम्हया चेतनाय् संविधान सभाया व न्त्यसः ल्यहँल्यहँ पुयाच्चंगु दु । व्याक्क थी थी जनतां थःगु मछिं व मज्यू ताःलाकेगु हकया छुमां हे संविधान सभा धयाच्चंगु दु । तर थ्व ताःमलाकेत लाय्कूया हनुमानतसें देय्या कुमिचा जुयाच्चंगु जितः महशुस जुयाच्चंगु दु । जनतां भिंगु म्हकाच्चन । ज्वलय् उकिया अःखः जुयाः लुयाच्चन । थुकथं तेलकासा म्हिताच्चंगु राजनीतिं देसय् गणतन्त्र वइ लाकि मवइ भविष्य थें ख्युनि । अले जनताया इच्छा आकांछा नं म्हगस हे जुया ब्यूसा छु यायेगु ।

अं थ्व विचाः व भावना नं म्हिगःया ख्यालिगुलु मुँज्यालिसे स्वापू दु थें ताल । गणतन्त्र व्यवस्थायात स्वापू लिनाः GUN तन्त्र धकाः लोकतन्त्रयात ध्याचू ब्वयेगु ज्या जुल । ख्यालः शैली न्त्याः वनाच्चंगु बांलाः । ध्याचू सकसिनं पचय् यायेसयेकेमाः । थज्याःगु ख्यालःया भावना व विचाः समसामयिक मजुसे याकःचिया जुइमज्यू । सम्पूर्ण नेवाःत गणतन्त्रवादी मजुइ नं फु । तर ख्यालः च्वमि निशपक्ष जुइ मफुत । राजतन्त्र मन्त धायेवं नेवाःतय् खड्ग जात्रा जुइ मफइगु धारणा ब्वःगु जनद्रोही गन्ध खनेदत । थ्व च्वमिया छ्वासु धारणा जुल ला धयागु जिगु विचाः । अय्सां थःगु विचाः व धारणायात स्वतन्त्र नक्सां ब्वयेगु हक न्त्याम्हसित नं दइ । थुकेय् छुं कुं खिनेथाय् मदु ।

अथेसां नं थः यःम्ह च्वमि व कलाकार जुइवलय् थथे म्हगसय् नं बिकृति वइगु खः ला मस्यू । अले म्ह हे हसंमसं धायेक म्हगसय् नं तिल्वय् वःगु खः ला मस्यू । □

("सन्ध्याटाइम्स" ११२७, यंलाथ्व ९)

साक्षात द्यःपिनिगु थाय्

थौं अष्टमी । थनिं च्यान्हु लिपा ला पुन्हि हे जुल । व नं स्वांया पुन्हि ।

स्वांया पुन्हिया खँचु ल्हवना: छपु च्वसु धयातःगु “ज्वला न्हाय्क” लसता पौयात । तर जितः छुं च्वयेगु लसता हे मवः । अथे ला छुं मच्चयागु मखु । कि करंवरं क्याम्पसया निम्ति नोट्स च्वयागु दु, कि म्हा: धाये मछाला: थ: च्वये धका: ग्वसा: ग्वयातयागु नं ध्याक्व लिका: प्रुफ स्वयेगु ज्या यानागु दु । थुकथं नये त्यनागु जाप्यय् देय्माय् तुं तया: ख्वाउँका वी थें जिगु नुगलय् छुं च्वयेगु लु व खँ घाजःमुजः जुल । चापा: मुना: द्रँ चिन । गबलें ब्याक्क बिक्क छखे छखे चीका: छुं थःगु हे ज्या यायेगु स्वये । तर न्ह्याक्को प्रूफ रिडिङ्ग या:सां उलि हे स्पंगु आखःग्वः जाभुइ वा व फि ल्वाकज्याना वःथें ल्यहें दनाच्वन । अय्सां जिं हानं थःत थम्हं मुल्याङ्गन यानास्वया ।

“खः, प्रूफ स्वयेगु धयागु कुं खिनेथाय् मदयेक वइगु जस भाःपीगु मूर्खता खः । जि ला छम्ह कारिन्दायात म्वाःल धायेवं वांछवये बहःगु खेसा भ्वं जक खः । अहो थ्व गज्याःगु लकसं बुलातःगु ज्या, भिंकेत स्वस्वं हे मभिना वनेमाःगु !

जिगु नुगलय् छभा: भसुका:या लःपवः तज्यात ।

थुजाःगु लकसय् जिं छु च्वयेफइ ! उकेसनं बाखं च्वयेगु ला लकस हे ब्वलनी मखु । हानं..... पलिस्थाया बाखं मुँज्यां हँ । छु च्वयेगु जिं ! छु ब्वयेगु जिं ! अहो ! जि हीमी चाल । जि थौं क्याम्पस नं वने मखु । आखिर क्लास नं ला द हे मदु । हाजिर छक्कः जक यायेत क्याम्पस वनेगु छाय् ? जिगु क्वाःगु न्ह्यप्पु छकः सिच्युसे च्वंके मास्ति वल ।

थुकथं थौं जि क्याम्पसया पलेसा द्यः तुयुतुयु जक धाःबलय् स्वयम्भुइ चाःह्यु वना । तपिंताँ पुलेवं निम्ह धर्म पासापिं “भगवान शरण” या शिर्षक थ्वयेका: थः थवय् खँ ब्याका: वनाच्वन, साइफनया मुलुं चाःहिलाच्वंगु रेकार्डया संगु-गिया ध्वलय् चू वनीबलय् संगीत थ्वयावइ थें ।

– भगवान शरण !

– भगवान शरण !

– थौ ला अष्टमी जूसां मांयाथाय् म्वः म्वः जुइमखु ख्वाः वः । बृंगद्यके वनीपिं आपाः दु ।

– अय् म्हिगः ‘नुगः याः’ धाःगु मखु ला ? थुगुसी ला प्यखा न्याखा छें हे नल हँ मखु ला ?

खः, अय् धाल । जि नं स्वःवनागु ला मखु । लँ दयेकल धाल । आप्पां सियातःगु ल्हानाः पिचु लँ दयेकल । न्हापा सा बृंगद्यःया रथया घःचाः न्ह्याके जीक लँया जवखवं निख्यरं धःचा दु । धलं धलं सालाः रेल थें अःपुक न्ह्याकी । गनं छुं मलाः । न्ह्याइपुक याः न्याइ । नखः हनी । आः जुलं, का, थुखें वनेगु मखु ला ?

धर्म पासापिं दल्लोया चीभाः चाःहुलाः बायावन । जि तप्यंक वया । इमि सः सालुयावन । जिगु न्हाय्पं ख्वातुयावन । जिं पलाः भचा च्वयेका । सिचुक फय् वल । आलं चमकं । हाकु सुपाँय्या सांगां फायाच्चंम्ह सँमिनी सिमा कचाकिचा प्वाँय् चिनाः बँ पुइत तुफिया रूप कयाच्चंगु गबलें मिखाय् लूसा गबलें छगू अदृश्य शक्तिं भातापाता याकाः चिल्लाय् दनाच्चन । ईईपंगु व फसय् सुनानं ध्वातुमत्तु ध्वानाः धितुधिना बीका च्वनाम्ह जि म्ह कय्कय् कुंकाः स्याकु नयाच्चना । अबलय् हे लिउने “भगवान शरण गुरु” धाधां छथ्वः म्हस्यूपिं भक्ततय्सं जितः लिलाकः वल । जिं नं भगवान शरणं तुं लिसः बियाः हनाबना द्यछाना ।

वाफय् दित । ख्युंगु धकिं चिलावन । जिपिं निपु हितिइ थ्यनाच्चन । जितः खनाः जक दिपाः काःपिं थें च्वंक इमिसं खँ न्ह्याकल ।

– थुगुसी ला दानमाया ध्वंमां देय्पंज्रां न्यायेकीगु हँ मखु ला ? नांयात त्वयेक आः ला धर्मय् लिना जुल थें च्वं, ह ला ?

छम्हस्यां नुगलय् लूगु खँ प्वंकल, जवगु पलाः छीवं देय्पागु पलाः ल्हवने वः थें मेम्हं खँ सायावन ।

“धर्मय् ला जुल ... , तर भीथाय् धर्म यचुया मवं ।”

“जिं ला खँ मथुल भाइ ! वं ला विहारय् नं यक्को हे ग्वाहालि यात धाःगु न्यना । गुबलें बसुन्धरा धलं मुंकाच्चंगु दु । गबलें पंचरात्री मुंकाच्चंगु दु ।”

“वहे ला धयागु, गुरुमापिन्त ग्वाहालि हे जक माःगु दु, वयात ब्याक्कं थःगु

यानाकायेगु थःगु नां माःगु दु । मेगु छु माल । नु, थुखें चाःहिला वनेगु मखु ला ? ”

धिमेयुल्वहं थ्यन । भवःलाक फ्यतुनाच्चंगु निगः चीभाःद्यः जवय् लाकाः सकलें देय्पां चाःहुलावन । इपिं धिमेयुल्वहं कापिं चाःहुलाः थहां वंवल्य् जि च्यापलाः ति लिउने लात । इपिं थःगु हे पलाख्य् थःगु हे लँपुइ न्हिन्हिं थें लीग छुनाः न्ह्याःवन । पलाः ला जिगु नं न्ह्यानां तुं वनाच्चंगु खः । अय्सां जिगु मिखायात वानाः इपिं बुलुयावन ।

थःगु हे मताःपय् न्यासि वनाच्चच्चं भुइख्यः थ्यन । लँया जवय् गनाच्चंगु पुखू द्यःने चीभाःद्यः छगः थिंग दनाच्चं थें च्वन । न्हापा व चीभाः द्यःयात स्वस्वं स्वाहाने लिनातःगु कःसिं कुहाँ वये मफयाः चिल्लाय् दना च्वंम्ह मचा लुमना वइगु । तर थौं जिगु मिखां तिफ्याये मफु । लाःसा व लु जिगु विगतया म्हगस जक खःला ! देपाय् ग्रील स्यंकातःगु पःखाः दुने च्वंगु भुइख्यः मचांनिसें तःधी तक मिसा मिजंतसें करांते कासा म्हितिगु दबू जुयाः लुयाच्चन । जितः लुमं व ख्यलय् छायाहायेका भवजंनिसें व्याहा भवय् व पँयन बिया भवजय् तकं जिमि अजिलिसे घाव्वः जुयाः भवय् नयेलं । अले सम्यय्वल्य् तःक्वः हे पंज्रां नं काये लं । थुकथं लुमन्ति किनावःगु उगु किपाःया न्हिप्यं घानाः जि स्वयम्भुया पाखा तँ गयावना ।

बुलुहुं थहाँ ववं बातनय् थ्यंवल्य् स्यँस्यँ वःगुयात भचा भासु फीत दिना च्वना । जिगु मिखा ल्वहंया ततःधिकःपिं भगवानद्यःया कापिं केलेहें मिखा कना च्वंम्ह स्वयम्भु चैत्यलिसे मिखा ल्वाका । थवल्य् हे ल्यूने निम्ह स्वम्ह मनूत भचा ततःसलं थःथःगु दुबिस्ता ब्याकु ब्याकुं थहाँ वयाच्चन । इमि सलय् विडम्बना दु । सुयागुं शोषणया घाःखू दु । जिगु न्हाय्पं निपां इमिके प्यपुनाविल ।

– व जिमि निनि धाये माःम्हेसिया किजा धयातःम्ह गणेद्यःचा स्यस्यः भाजु का । वकिल ज्या याः जुइम्ह का । वया छें बागलुङ्गय् धाइ । भी थें ज्वःपिं काय्पिं दु धाइ । छक्कः जिमि निनिया लिक्कसं च्वंगु प्रेसय् वया काय् कम्पोजिटर जूवल खनी । व वकीलचां वयागु बेइज्जत याः वल धकाः ख्यानाः हे ज्या याके मब्यू हँ । फुक्कस्यां स्यू । का स्वरे कलाः दु, मचाखाचा दु, थन व बुरि सु धकाः नालाः च्वंवःगु जुइ । न्हापा ला व बुरि नं वंगलय् हे ला खःनि । आः तिनि धकाः बूँ ज्याना च्वच्चं फुक्कं थःगु हे याना छ्वःगु । न्हापा वंगलय् नं व खनाः सकलें

ग्याः । ली त्यः लिलाके मत्यः धाइगु । जिमि कलातं तप्यंक खाः हे व्वयेमफु ।
ग्याः धाइगु । बोक्सी सः धाइगु । जितः धाःसा अजाःगु खँ पत्याःमजू ।

न्हापा मचा बुइकीगु ज्या नं यानाजुइम्ह । मचा मयःनिपिन्त क्वकया नं
वीगु याः । उकिं व न्ह्याग्गु छेंय् नं दुमचाः धयागु द हे मदु । वं न्ह्याम्हसिंगु
आगं स्यू ।

सायद अथे जुयाः हे जुइ, व जिमि निनि खनाः सकलें ग्याः । गय् धायेगु ख
ला, वं ला जितः बिडम्बना हे यानाबिल ।”

छाय् !... छाय्, व बाखं कना वयाच्चंम्ह मनू प्रति कन्ना बुयावल । वया
ख्वाल्य् छक्वः पित्तुपियाः स्वये मास्तिवल । तर जिं इमित मफुते स्वया धयाथें
जुल । इमिगु सः तक्क दित । जिं छत्थुं मखं पहः यानाः भचा दिनाबिया । इपिं
न्ह्यःने वन । न्ह्यःनेया त्वाथः इमि यकःति जुल । इमि हानं खँ न्ह्यात, पज
(Pause) ल्हवनातःगु टेप रेकार्ड थें ।

ख ला जिगु मुद्दा जिमि निनिया व किजा धयातःम्ह गणेशःचां हे त्याकाबिल ।
त्याका व्यूगु बापत वकील खर्च ला जिं पुले म्वाःल । तर वं त्याका व्यूगुलिइ
बुँ बछिं मयाक कयाबिल । बुँया हक सज्यान्तं जिगु हे । बुइगु मुद्दा ला ख हे
मखु, यदि न्याय धइगु दुसा । अथेसां, जिगु जितः हे यानाबिल । छुं धायेगु ला
खँ हे मन्त । तर बछिं मयाकं बुँ काःगुलिं धेवा काये मखु धाःपिं ला इमि छें
दनेत चा जक वायेत ट्याक्टर निगलं इमिथाय् हे । अप्पा निगू टीपं मयाक
हया बी धुन । फि व रोडा ला जिथाय् मदु नि, मखुला ? मेथासं हे हये माःगु ।
त्याः भचा मिले याना बी माःगु धालकि नरथक्क व्वःबियाः ध्याचू न्यंकाहइगु ।
..... “आय्यामां, थौ ला त्यानु का ।

स्व रे थौकन्हय् यक्को ज्या वः दु, ट्याक्टर धाः वइ । तर न्ह्याम्हसितं
मलाः धया छ्वयेमाः । वयाथाय् धायेसात यंका मबिल धायेवं “छन्त थय्
यानाबिया, अय् यानाबिया । कुजाततनाप संगत याये माल धकाः लाक्वपाक्व
धयाः ल्वाः वइगु । आः छु यायेगु ! जिमि कलाः व जिमि मां ला व खनाः सिक्क
ग्याः ।

मचायेक जिगु पलाः च्वत ला गय् थें इमि नाप नाप हे लात । इमिगु खाः
जिगु मिखाय् हात । अय्सां इमिसं जितः स्व हे मस्वः । थः थम्हं सुं मदुगु लँ
थें लिप्याना वन । इमि बाखं जिगु जीवनलिसे नं स्वापू दुगु थें जुयाः इमि खँ

मचाइभनं जि न्याकु खुकृति लिउने ला:सां न्हापा लिफ्याना वंषिं धर्मपासापिं थें तापाका छवये मास्ति मवल । जिगु पला:या गसि गुगुं यन्त्रया दाति थें न्ह्या:वनां तुं च्वन । भव:लिं वंता: स्वया: थ:गु आसनय् फ्यतुनाच्वीपिं भराय् भराय् धिक:पिं बुद्धपिसं मिखा कना: स्वयाच्वन ।

भराय् भराय् धिक:पिं स्वम्हं तथागत बुद्धपिन्त ल्यूने लाका: बज्रलिसें स्वानाच्वंगु धस्वा:गु स्वाहानें नया भतपंज: व: काकां थहाँ वनाच्वना । ल्वहं त्वाथ:या जवंखवं सल, किसि, सिंह, गरुड व हितिमंग: आदि भव:लाक पा: च्वंच्वंगु दु । इमिसं व त्वाथलं थहाँ वक्को थीथी मनूतय्गु दु:ख, सुख खं ला मखं ला जिं मस्यू । इमिसं थ:गु नुग: याउंकेभनं नुग: च्वला: थथे खँ व्याका व:गु न्यं ला मन्यं ला, ता: ला मता: ला जिं मस्यू । तर व न्हाच: व धोमा व थ: ला:म्ह निनि अले किजा धायेका च्वंम्ह गणेद्य: वकीलया क्वा:गु खँ प्वंकुप्वंकुं वयाच्वीपिं मनूत अनायास स्येस्ये मिंका: त्वाथलय् तुं भवातां दिनाच्वंगुलिं जि थ: नं दिनावीगु मछिं ताल । जि मखु पह: याना: मदिसे धर्मधातु चैत्यया द्य:ने छाना: साधना यानात:गु बज्र मथ्यंतले सुतुसुतुं थहाँ तुं वनाच्वना ।

स्वयम्भु बिहारया खवय् अनन्तपुरया ल्यूने बसुन्धराद्य: चा:हुला: गुरुजुपिसं पाथ्याना च्वनिगु पुलांगु गुम्बाया न्ह्य:नेसं इता: व देवा च्याकेगु त्वा:देवाया कापिं मू भगवानद्य: अमिताभयात ल्हा: ज्वजलपिया: अजिमा द्य:याथाय् वया ।

धात्थें थौं अष्टमी जुया: नं अजिमाद्य:याथाय् म्व: मजू । निम्ह स्वम्ह जक देय्के व:पिं दुने दु । निम्ह स्वम्ह मे:पिं पिने देवा च्याकुच्याकुं खँ व्याकाच्वन ।

– गय्, श्रीलंकाय् बौद्ध तिर्थ यात्रा वंथाय् ला मनमाया साहुनी व माहाद्य:चा छगू कोथा हे इपिं निम्ह जक च्वन धा:गु न्यना नि । धायेबलय् किजा धाइगु । तता तता..... धाइगु । बुरि जुइ धुंका: नं गुलि यच्चानाच्वंगु जुइ ख ला ?

– छगू हे कोथाय् जक ला छु, छगू हे खाताय् च्वना: फांगां भुनाच्वंगु अनार साहुं हे खंगु हँ । अकिं अनारसाहुयात मिसाह्य: धका: ध्याचू नका: छुं धाल कि ला वं नं – “उखे स्व, थुखे स्व, थ:गु ख्वा: थम्हं स्व” धाइगु । अनारसाहु थथे ह्यामि जुइबलय् “खि न:म्ह ध्वग्गी ख्वा:” धका: म्हुतु पकु चिंका: ल्हा: पालावनिगु ।

– अथे ला न्हापा नं थिमी छम्ह वयाथाय् तया तःगु ला खःनि । गबलें गबलें म्हाय्म्ह नं व नाप हे जू धाःगु न्यना । आः छु धायेगु, अपाय् अपाय् धिकःपिं जखुपिं काय्पिं दु, म्हाय्पिं दु, भाःत दु ।

– अँय्, ! भाःत ला नां जक का । कोथा छकू हे बियातःगु मदु । कःसिइ बल्वा थें दयेकाः वानातःगु ला खःनि ।

– “अहो ! हे हारतिमां, हे परमेश्वरी !” देवा च्याकाः धेवा व प्यारा छानाः जाकिं पुज्यानाः छम्ह देय्के वःम्ह मिसां अजिमाद्यः अन्यात । द्यःपाःलाः मुसुमुसु न्हिलाच्चन ।

– अय् नं ग्व, देपंजां वं हे न्यायेकल । विहारय् दराज, मेच, टेबिल व माक्व थलबल तयाबिल । संघ संस्थाय् हापं तयाब्यू ।

– का म्वाःगु खँ । थःगु तये मालं ला व । गन गन छु छु सामान कयाहल, न लित बी माः, न धेवा हे पुलेमाः ।

थुलिमछिं मिसा खँ व धर्मचित्त च्वजाःम्ह मनमायाया विरोधय् खँ ल्हात नं अजिमा द्यवं प्यारा ल्वछुना च्वंगु च्वनं हे । तर जितः थुपिं धर्मपासापिनि खँ व न्हाचः लँय् व त्वाथलय् बाखं कना वयाच्चंगु छता हे ताल । पुलां प्याखनय् थी थी पात्रतय्सं विधिवत न्हाकाच्चंगु अभिनय व वर्णन थें ताल । नर व नारीया प्याखंपाःया दथुइ दथुइ सुत्रधार वयाः खँ कं वयाच्चन ।

– “त्वाः त्वालय् अजाःपिं छम्ह छम्ह धोमा पुरातात्विक जुयाः ल्यनाच्चंगु दु । अमित चीके साःप थाकु ।”

अले थुगु सुत्रधारया सःलिसें जिगु नुगलय् मेःगु सः थ्वल ।

– खः जिमिथाय् त्वालय् नं अजाःम्ह हे छम्ह धोमा दु । दिदीअजि नं जुइ धुंकूम्ह । विहारय् नं वनीम्ह । दानपुण्य नं याइम्ह । वयात मनूतय्सं धाः – ‘वयात छुं त्यासा बी धयागु हे खिचायात ला त्याये बीगु खः ।’

छक्वः जि थः हे ख्याः यायेगु बानिं ध्वपय् तुंगु दु । वया काय् छम्ह दु, अय्लाः यक्को त्वने माःम्ह । धा ला मांया हे पीरं वं अय्लाः त्वंगु धाइ । अं छन्हु अय्लाः त्वनाः लिबाक छँय् दुहाँ वःगु । लँ छपुं थःगु याना वःबलय् लाछि खिचां उल धकाः खिचानाप जवाःसवाः यानाः ल्वानाच्चन ।

– जि थ्व त्वाःयाम्ह जुजु । छं दः जितः उइगु ला ? खबरदार ! जुक्का बीगु जुइ । छं दः उइदइ मखु । जि ला थ्व त्वाःयाम्ह जुजु । जि जुजु !

खः अबलयन्सिं वयात जुजु....., जुजु, धकाः हायेकीगु जुल । ख ला, वया नां सँय्चा खः । अय्सां व जुजु जुल । छन्हु व हे जुजुपिनि छें दयेकल । लँय् जूपिसं न्हापा बलचा जक जुयाच्चंगुयात तखाक्क बांलाक दयेके त्यंगु खनाः थथःस्वया वनिगु । छन्हु छम्ह मनुखं पत्याः मजुयाः न्यँ हे न्यन ।

– “भाजु, सुया छें दनेत्यंगु थें, साःप हे तःजि जुइक दनेत्यन ।”

– “जिगु अस्यःगु म्हुतुं प्वाक्क खँ पि हे ज्वल ।”

– “जुजुपिनि लाय्कू दनेत्यंगु का..... छिं ।”

थुलि जक छु धया, धात्थें क्वः जूगु व सिमा क्वःदःगु पाः लाः थें व त्वाःया जुजुचिया मां अजिचा धोंमा ध्वदुक्क हे वःगु पाः । “का मखु थे जुल ! वं छु छु जक मतिइ तल जुइ आः..... , व ला ख्वाः फस्वयेकाः सरासर लिफः हे मस्वसे न्त्याःवन । व अजिचा धोंमायात ली त्यः लिलाके मत्यः धाइगुलिं जि ल्यू ल्यू वनाः क्षमा फ्वंवना । तर वं छुं हे मधाः । जिगु ख्वाः तक नं मस्वः । लिपा त्वालय् खँ बय्बय् जुल ।

– जितः लाय्कू दन धकाः धाःगुयात बदला मकासे त्वःते हे मखु हँ ।

थुलि जक मखु, स्वांया पुन्हिबलय् अजिमा द्यःया न्त्यःने द्यःके वःम्ह अजःम्ह छम्ह बुरियात द्यः वल धाःगु न्यना । न्हिन्हिं द्यःके वनाच्चपिं धर्म पासापिं गुम्हं ग्यानाः बिस्युं वन हँ । गुम्हं भक्ति यानाः पुज्याना च्वपिं हँ । बुद्ध पुजा वःपिं व पर्यटकत वातां च्वनाः हालाहल हँ ।

“धात्थें नेपाः धयागु देश ला साक्षात द्यःपिनिगु थाय् हे जुयाच्चन का ।”



(गवय्स्वां/ल्याः ८, काठमाडौं बहुमुखी क्याम्पस)

शान्ति मामां

शान्तिया निम्तिं ग्वसाःग्वःगु उगु वन महोत्सवय् वनी धकाः न्हिन्हं रेडियो व टी.भी.या समाचारं ग्रसीत जिमि जःपिसं युद्धय् वने त्यंम्हेसित थें जितः पनाच्वन । – “म्हगः ताम्सिपाखाया पुलिस वीटय् पेट्रोल बम कयेका थकल हं न्यं ला । उकुन्हु हे जक परोपकार अनाथालयया ताँय् नं बम मुयाः ग्वःम्ह ला अस्पतालय् भर्ना जुइमाःगु धकाः छं सि हे स्यू । सामाखुसि थें जाःथाय् ला छेंय् वनाः हे छम्ह प्रहरी निरीक्षकयात गोलिं कयेकाः स्याना थकल हं । हानं चितवनय् हे नं छगः रात्री बस छवयेका बिल” धाल स्वः, अन वनेगु खँ हे ल्हायेमते । छेंजःपिसं गंक गंक वनकि छुं मजुइ धकाः धाये फइमखु ।.....”

जिमि म्हाय्या लागिमिगि चाःगु सलं थ्वःगु जिगु म्हाय् इन्न मिना हे च्वन । ख ला छेंजःपिसं जितः थुकथं सराः हे बिल धाःसां छुं पाइमखु । धात्यें खः, थुकथंया बेअनुमति गुगु जिगु हे सुरक्षाया निम्तिं तःजिगु सल्लाह साहुति खः लाकि छगू मेगु हे भयावहया उत्पति खः, जिं मस्यू । सुरक्षा गन दु, छेंय् दु लाकि बुँइ दु ?, जिं तिप्पाये मफुत ।

का, उकुन्हु जकया खँ खः । कथु हीसे च्वंक स्यानाः सिंचि क्वाःलखं गररं यानाः ग्वारा जक तुलागु बल्ल आनां न्ह्यः जक छु वल, बहनीसिया भिंछताः इलय् जिगु छेंया ग्रील लुखाय् सुनानं खापा भ्यान्तांभ्यान्तां सालाच्वन । आकाभाकाय् भ्वखाय् ब्वयाः आरक्षणया निम्तिं थंवःगु थें जिमि काय् जि चनाच्वनागु कोथाय् वल । वया ख्वाः चःतिं माःबू । म्हुतुइ सः मदु । मस्यु, सु जुइ धकाः भ्याः चायेका स्वया । गुं च्याःच्याःपिं वाउंसे च्वपिं मिलिटरीत व वँचुसे च्वपिं पुलिसत च्वय् थथःस्वयाः मनू नये धुकूपिं धुँतसें थें सवाः कयाच्वन । जितः जक छु खन, स्टेनगन व बन्दूक ल्हातं धधस्वाकाः “ढोका खोल, ढोका खोल !” धकाः खापा ल्यहें थने थें यानाः हालाच्वन । काचाकाचां खापा खं वना । सिल्ला फुनाः चिल्ला - चौला क्यने धुकूसां थुरर चिकु नि । कय्कय् कुंगु म्हायात फयां फक्को धस्वाकाः जिं खापा चायेकः वना । खापालिसें हे तुपः धस्वाकाः इपिं जिगु छेंदिया लवय् त्वंवां वयाः धाल । – “यहां को को डेरा गरी बसेकाछन् ? ल भन ।”

फिल्मया पोजय् हायण्डस् अप् याका: इमिसं जिके पररं न्यनेकने यात ।
हारांम्ह मचायाके मास्टरं पाठ न्यने थें । –

“थन सुं बालं च्वनेत न्यं वःपिं दु ला ? गुजाःपिं वइगु ? विद्यार्थी थें च्वपिं
खःला ? गलैचा थाइपिं खः ला ?”.....

छगूया लिसः बीत हे ई दिपा: मबिसें छक्कलं न्यंगु ब्याक्क न्ह्यसःया लिसः
जिगु न्ह्यपुइ ग्वारा चिनावन । गोलि थें छ्वाराक्क छ्वाराक्क यां कया: वःगु
इमिगु न्ह्यसःयात भचा दिपा: कया: जक लिसः बीत न्ह्यचिलेगु साहस
याना । –

“जिमित हे च्वनेत पूर्वक कोथा मदु, गन बालं तयेगु ! थन ला सुं नं बालं
तयातयागु मदु छिगु ।”

इमिसं गुंखिचा न्ह्यसः छुत । –

“अय्सा न्हिनय् न्हिनय् बालं च्वनेत सुं सुं मनूतय्सं न्यं वः जुइ नि मखु
ला ? इपिं गुजा: गुजाःपिं खः ? का धा ।”

गुंखिचां न्यनिगु ध्याचःया न्ह्यसलं ईई पंक छ्वाका: इपिं भन घने क्वथाय्
दुने दुहाँ वल । जि ग्यात । –

“ला:सा थिपिं सक्कलिपिं हे सुरक्षाकर्मीत खः लाकि मखु !”

तर, अय्सां जितः इमिके परिचयपत्र स्वये धायेगु नं आँट मन्त । कोथाय्
च्वंगु नँया दराजयात म्हं किका: पनेत स्वया । लिपा छु हे दुगु खः धका: ।
इमित ब्याक्क ब्वया क्यनेगु हे भिं ताल । इमिसं छु छु न्यन, उकेया लिसः
बिया । इमिसं गन गन स्वये धाल अन अन क्यनाबिया । इमित थःगु सर्च
पूमवं मखा ताल जुइ, इमिसं हानं खँ छुत । –

“छि गन ज्या ?”

“नेपालभाषा केन्द्रीय विभाग, पाटन क्याम्पस ।”

“हुं सु ?”

“जिमि कला: मय्जु ।”

“हुं सु ले ?”

“जिमि काय्,”

“व सु ले ?”

“व जिमि भौ ।”

“थुके कोथाय् सु सु दु ले ?.....”

“जिमि छयय्पिं दनाच्चंगु दु ।”

“अय्सा कोथाय् स्वयेमाल ।”

“ज्यू स्वः भासँ ।”

बन्दूक व स्टेनगन धधस्वाकाः याकःचा दनाच्चंम्ह जिमि तःधीम्ह छय्या फांगा ह्वतय् क्वथीक स्वत । अले उखे पत्तिइ कोथाय् नं जिमि निदँ जक दुम्ह छय् दनाच्चंथाय् बन्दूकया च्चकां खिनाः स्वत । जिमि काय् व भौया खाः द्यूव लाइटया जलय् ख्युंसे ह्याउंसे च्वंगु बांलाक सी दु । जि, मचा दनाः चिल्लाय् दनी धकाः ग्यात । नँ जक न्याःसां ग्यानाः म्ह कय्कय् कुंकीपिं जि मस्त, छुं जुयाः बन्दूक मूसा छु याये धयाथें मतिइ वन । कोथाय् छुं मखनेवं सकलें पिहांवन । इमित पिखालखुइ तक लँस्वः वनेगु हनाबनां जि इपिलिसें पिनेथ्यन ।

“छि आसे नि ! थन पिनेसं भचा च्वना च्वँ ! दुने भाये दइ मखुनि ।” – इमिसं जितः सस्पेण्डय् तल । जिमि छेंया लिक्क च्वंगु टहराय् मत च्यानाच्चंगु खनेवं हानं न्यनेकने यात । –

“थन ला मनू दु । का धा, थन सु सु बालं च्वंपिं दु ?” –

“व जिमिगु टहरा मखु । अन सु सु बालं च्वंच्वंपिं दु खः, जिमिसं मस्यु । अन छेंथुवाःतय्के न्यनादिसँ ।”

खःगु खँ, थुलि हे जक छु धया इमिगु म्हुतुं छक्कलं बारा मुल । –

“गय्, अय् धयागु ? शिक्षक जुयाः अय् धायेगु ला ? थःगु छें लिक्क बालं च्वंच्वंपिं सु खः, नां छु, ज्या छु, गन च्वंपिं खः” धयागु सीका तये म्वाःला ? कन्हय् गथें समस्या वःसा छु याये ?

जि वाल्ल च्वन ।

अन बालं च्वंपिं खुं खःला । डाँका खःला ? लाःसा माओवादीतय् आन्दोलक जक खःला ?

जितः न्वाःपिं मध्यय् तुयु खाःम्ह छम्ह म्हस्यू म्हस्यू थें च्वनावल । लाःसा थःगु हे क्याम्पसया छम्ह विद्यार्थी खः ला ! थौंकन्हय् छम्ह शिक्षक विद्यार्थी हे न्वाका च्वनेगु न्हूखँ मखुसां नेपाः देय् छगुलिं दूमाःगु छें जुल । धात्थें उज्ज्वःगु समस्या जितः वइगु खत ला ? इमिगु सः चीसः यायेत ‘खः, व ला’ धकाः धयाबिया । मेगु छुं हे धाये मसयाः जि सुम्क तुं जक दनाच्चना । लिपा

लिकक लिकक च्वंगु छैय् छैय् नं खापा ध्युं वनेवं जिगु तुतिं जिगु छैदिया ल्हाः
ज्वंवन । अले खापा तिनाः बिलागः ग्वयाकथं सासःयात लप्पू ज्वनाः दुतकया ।
शान्तिया निम्तिं शान्ति कुनाबिया । उकिं शान्ति नेपालय् गनं माः वने मानि ।
सुरक्षा गन दु, जिं मस्यू । थन ला सकलें थःत थम्हं कुंकाच्वपिं बन्दीत जक ।
पंजलय् कुंकाच्वपिं 'बालक बबुरोत' जक । थःत थम्हं कुंकाः आजन्म कैद
जुयाच्वनेगु ला ? जि चकंक छक्कः ब्वयेगु हक अधिकार तंका च्वनाम्ह थें
जुल । उकिं साहित्य वन महोत्सवय् वनेगुलिइ जितः पनाच्वपिं जिमि जःपिं
खनाः जि हीमी चाल । घटना गन जुइ, सुनां धायेफु । थुकिया सुरक्षा सुनां
याइ, मस्यू । लिपा मतिइ वन । न्ह्यात्थाय् च्वंसां, न्ह्यात्थाय् वंसां आः थःगु
सुरक्षा थम्हं यायेमाः ।

तर भाग्यवश सर्प नं सिक्क कथि नं त्वःमधुइक बैशाक १० गतेनिसें १४
गते तक नेपाः बन्द जुइगुलिं वन महोत्सव नं लिज्यावन । शान्तिया निम्तिं
साहित्य वन महोत्सवया थमौटी जुल । बुद्धया शान्ति किनाच्वंगु पाल्हाः ब्वयाच्वंगु
मूर्तिया उद्घाटन जुइगु न्हि छ्भाः लिज्यात ।

समाचारपत्रतसैं पुलिस स्यायेत, सैनिक स्यायेत अले माओवादीतय्
स्यायेत छूट बियाच्वन । रेडियो, टि.भि. चायेकेवं क्वाःगु कराइलय् लः लानाः
हा पिहां वइच्वन । चां त्वपुनातःगु भ्वाथःगु न्वकूकापः थें अन्धकारगु सुथ ।
सुथ जुल नं यचुगु जः मलू । सुथ गूगु आलंया नुगःपा ह्याउँसे च्वं । सुथय् हे
गुँइ तुं दुसुना वंगु सनिल । भुजिं भ्वाईयां भुंक मचूगु ला ब्वयातःगु नाय्या
पसः । टि.भी.इ काय् सीपिं, भाःत सीपिं, बौ सीपिं मनूतय्गु विभत्सतां जाःगु
ख्वःसःया भोल्यूम ह्वालय् च्वन । न्हिं न्हिं आक्रमणकारी माओवादीत सीगु
धलः जायाच्वन । गबले गबले बंकरय् लानाः सुरक्षा कर्मीतय् दुर्भाग्यपूर्ण मृत्यु
नं जुयाच्वन । तर रावणया छयं बुयां तुं च्वंगुदु । इमित सुनां वरदान बिल ?
महादेवं बिल लाकि विष्णुं बिल, सुनां मस्यू । अय्सां नेपाः देय् छगुलिं दूमाःगु
छै जुल । थुकथं नेपाः माया दूमाः ग्वःन्हुं व्यनिगु खः, न सुं पुरोहितं धायेफु न
सुं जयमापिसं हे स्यू ।

उकिं धुप्वः दनाच्वंगु थ्व शहरय्, खसुं भुनाच्वंगु थ्व गामय्, च्वापुं त्वपुनाच्वंगु
थ्व गुँइ नेतातय्गु धाक्को सिक्कोया गसिं जक घालःमुलः जाःगु क्यव जुयाच्वन ।

आतंकित धुप्वःया दथुइ आक्रमणिक क्वाःघासा तयाः राहुयात शान्तिया भव्य
नकाचवन ।

“थन क्रान्ति मदयेकं शान्तिया भव्य नये हे मखु । क्रान्तिया क्वाःघासा
छता निं ति ! अले तिनि नये मखुसा क्रान्ति मदयेकं
शान्तिया चि सवाः हे मदु । तर शान्तिया निम्तिं क्रान्ति जुयाच्वंसां शान्ति
ख्युंसे च्वं । दिपय् च्याःगु मिलापू ।” राहुं माय् फ्वयाचवन ।

खः थ्व भीत जूगु आक्रमण पेन्टागनया घाःपाः मखु । तर घाः ध्वगिनाः
छगू पुने यःगु ल्वय्या संक्रमण लकस खः । पेन्टागनया एड्सं ग्रसीत ल्यासं
ल्यवःकाःगु थ्व नेपाः । वैंचाःम्ह खिचाया त्वाल्लां प्यपुना वयेयःगु लाः । थ्व ल्वय्
पुन कि लनी मखु धाइ । थुकथं ‘आः छु याये ! आः छु याये’ या कोलाहल सलं
जाःगु हहःपनाय् व्वःगु भवखाचय् कवि द्वारीका श्रेष्ठ व बाखं च्वमि जलेश्वरी
श्रेष्ठपिं मां तपिं मचात जुयाः हिकुहिकु लनाः ल्हाः व्वयेकाचवन । इमिगु
ख्वखना सः मातृ वात्सल्यतां जाःगु छगू मानव ल्वय् – शान्तिया छपाः तप्पाःगु
क्यानभास स्वनेगु । शान्तिया निम्तिं साहित्यिक वन महोत्सव यायेगु । आत्मदाह
हे मखुसां शान्तिया निम्तिं लूलाः यायेगु ।

वन महोत्सव धात्थें महाभारत कालिन थीथी ऋषीपिनिगु न यज्ञ कुण्ड हे
खः न बालमिकिया आश्रम हे खः । खः ला महापरित्राणया जजंका चिनाः तारण
तयेगु ग्वसाः नं मखयेफु । बस, नेपाःया छगू पर्यटन केन्द्र, चितवन जंगल
लजया पर्णशालाय् शान्तिया निम्तिं न्ह्यानाच्वंगु मुँज्या छगू विपश्यना शिविर
थें तरलताया आभास जुयाचवन । आः ला बुलुहुं शान्तिया सुथ लुइ । चौलागा
सप्तमी, अष्टमी व नवमी, भूत, वर्तमान व भविष्यया स्वकुं लाःगु छगू यन्त्र
जुयाः लुयाचवन । थी थी स्वहाकः आय्क्सीस ह्वनाच्वंगु छगू स्वकुं लूगु
स्वापूया कोथा थें । खः थुमि दथुइ गुलि अन्तर दु, उलि हे समता नं दु, उलि
हे बिडम्बनाया सः नं लिक्नुनाच्वंगु दु । अथे नं गथे जिं गुगुं यन्त्रयात तिप्प्याना
काये मफु, तन्त्र मन्त्रं जाःगु छगू गुह्य दर्शन थें ।

तर, शान्तिया बँ थिलेत कुतः जुयाच्वंगु उगु चितवन क्यब नं लुम्बिनी थें
चकंके मफु । कुचाकुचा जक ह्वनातःगु चापाःया द्यःने भुनातःगु पिबःसा थें
बुल्लुसे बुल्लुसे मिखाय् लुयाचवन । – छैय् छुं जुयाचवन ला ! त्वाल्य् छुं जुइ

धुंकल ला ! क्याम्पसय् छुं जुइत्यंगु दु ला ! जिमि मस्त, जिमि जःपिं जिमि
पासापिं सकलें सुरक्षित जू ला थें !

मफु मफु शान्तिया कु क्वबिया: वया च्वनाम्ह जित: शंका उपशंकां बासा
लाया: ताय्तिता याकाच्वन । – शहर थें तूलबम, बाल्टिन बम, भोला बम व
प्रेशर कुकर बम जक मखु, थनं लिहाँ वनेबल्य् जंगलय् सुरक्षाकर्मी माओवादीतय्
माओवादी सुरक्षाकर्मीतय् ठरापय् लाकिगु, यम्बुसय् दुनिगु खःला !
अहो, जिगु नुगलय् सपानिचात कुमिचा जुयाबिल । जिगु शान्ति छत्थुं सोम
शर्माया घःचा थें चिच्चा: दना: छवर्हुल । थुकथं जिपिं चेकपोष्टं चेकपोष्ट
चेकअप याकुयाकुं शान्तिया कामना याना: साहित्यिक कलाकार पासापिलिसे
बाया: छें लिहाँ वया च्वनावल्य् लैय् छम्ह पासा नापलात । जित: खनेवं हे वं
छत्थुं लय्ताया: न्यन । –

“गय् छिपिं ला शान्तिया निम्ति साहित्यिक वन महोत्सवय् ब्वति का:वना
च्वन धा:गु हसना व्वनागु । गुबलय् लिहाँ वया ?”

तःदै लिपा जक नाप ला:म्हेसित थें जिं वयात च्वाक्क लिस: बिया । –

“नकतिनि हे जक वयाच्वना । सकलें म्हां फु ला ? छु छु हालखबर दु ?
आ: ला भचा शान्ति जुल जुइ ह ला ? !”

वं कापू कयागु सुकायात गथ: चिना: लताइलय् तुले थें जिगु खंयात तुला:
धाल । –

“ग्व, छु धाये भाइ । लूटपाट, आतंक, हत्या, हिंसा हे थौकन्हय्या बुखंपौया
हट-न्यूज जुइ धुंकल । गन सुरक्षा दु धाये ग्व ! लैय् जुइ ग्यानापु । छें च्वने
ग्यानापु । सुरक्षा गन दु ! भय गन मदु ? छुं मस्यूपिं जनतातय् उलिमछिं हत्या
जुइ धुंकल नं सुयां छुं च्यूता: मदु । शहीद आतंकवादी जुयाच्वन । आतंकवादी
शहीद जुयाच्वन । थ्व देय् ला सुयां ख्वस: न्यं मदुगु अरण्यरोदन जंगल जुइ
धुंकल । थ्व जंगली ख्वा:पिं नेतातय्सं याना: ।.....”

जिगु शान्तिया कामनायात मसांकुं नन्वयेका: पासां म्वाय् चुइकाबिल ।
शान्तिया जंगलं शहरय् थ्यन नं जिं शान्ति लुइके मफु । □

“लुमन्ति पौ”, नेवा: पुच:, नारायणघाट, १९२३)

अनिष्टया बाखं

पासा चितासुलि पःमाय्या ईमेल वयाचन ।

Mail in, To : rshakya@.com.np
From : Chitasuli www.yahoo.com

काचाकाचां कर्सर तिया । ईमेल चाल । कम्प्युटरया धकिनं जिगु मिखा
त्वाल्ल चन । आतुरताया क्वाःलखं लुकाः पौ वनास्वया ।

अंग्रेजीभाषाया रोमनं चयाहःगु ।

RAJA BHAJU, JOJALAPA !
THOUN KANHE NEPALAY ANDOLAN JUYAA YAKKO HE MANOOTA SITA
DHAAGU NYANA. INTERNETAYA HASANA KATHAN DHATTHEN KHA: LA ?
INTERNETAYA KHABAR PAYCHHI HE KHA: LA ? THOYA BARAY DETAILLY CHOYA
HAYETA INAP YANA CHONA. CHHAN PASA, CHITASULI. SUBHAY.

जिं पासाया इनापयात वचं तायेकाः Keyboard य् त्वाक्क त्वाक्क टाइप
याना । तर नेपालं पिने चना नं ख्वःसः थ्वयेकाच्वंम्ह पासाया खँभासं छुभाः
भसुकाः लिसा काल । लिपा अथें हे जिगु न्यताः च्यानावल । कपाः भ्यातुसे
चनावल । कपाः व लिछ्यंया दुने स्यःका जुयाच्वंगु हिनूत तिल्ल तिल्ल
प्यनावल । लिछ्यननिसें गःपःतक कपं साल । जि हीमी चाल । नुगः चिल्लाय्
चिल्लाय् दन । आन्दोलनया व्याक्क खँ व लु व्वयेत स्वत्तुमत्तु स्वयाबिल । छाया
खः मस्यु, न्ह्यःने च्वक्क वस्तुत फुक्क फाक्क घाराघुरं स्यंका छुवये मास्ति
वल । छत्थुं बइगः-चुपि ज्वनाः पायः खाये मास्तिवल । जिं वाक्कु छिना । तर
चित्तधर “हृदय” आचाकलिं दाःगु लुमंसे वल । जिं थःत कःघाना ।

जितः पासा चितासुलिया ईमेल वःगु दु । हानं छक्कः माउस तित्युं पौ
व्वना । पासां न्यना हःगु मखुगु खँ मखु । फय् मवयेकं सिमात सनीमखु ।
शासकं बर्दी वसः पुनिगु देस । रक्षक हे भक्षक जुल कि सुरक्षा गनं दइ ! जिगु
नुगलय् भजन कीर्तन जुल । – छु पिना वहे लयेगु । धर्म प्युसा धर्म, पाप प्युसा
पाप । उकिं हे खः, लय् ध्वद्दक्क चीभाः थूपिं बंजाःतय्गु पापं जुजु
सिंहसार्थबाहुं तकं लसिंतय्गु चपेत नयेमाल । जनबाहाःद्यःया रथयात अखडा

याना: जनता स्यायेवं जुजु बीरेन्द्रं न्हासं ल:त्वन । आ: नं जनबाहा:घ:या
रथयात्राया लँपुइ पंग: थना: अनिष्ट यात । थुकिया ब्वला ला वं फये हे माली ।

ने.सं.११२६ चौल्लागाया अष्टमी कुन्हुया दिं तक लोकतन्त्रया निम्तिं
आन्दोलन जूगु भिंखुन्हुगु दिं । अनिश्चित दिन तक कर्फ्यु चिका: न्हिन्हं
कोथाय् कुंकाच्चनागु । घौ पत्तिं कान्तिपुर एफ.एम. व थीथी च्यानल स्वयाच्चना,
न्यनाच्चना । इलं ई ककु व ग:प: त्यानु मधासे 'वीर' स्वयाच्चना ।

राजनैतिक दलतय्त जक मखु, न्ह्य:ने ध्वदुक्क मनूतय्त कथि पम्हुइका:
आन्दोलनकारी दयेकाच्चन । व्यक्ति पुजा याइपिं अविवेकी पुलिस व सुरक्षाकर्मीतय्त
सु आन्दोलनकारी अले सु लँजुवा: । थबलय् हे ब:चाधिक:म्ह मिसा मचायात ल्हा:
ज्वना: हूल चीका वयाच्चंम्ह छम्ह मिसायात इसाथिसा याना लुतुलुया यंकाच्चन ।
मिसां थ: निर्दोषया दसि ब्वया: “जिपिं देय्के वना वयापिं” धका: चिल्लाय् चिल्लाय्
दन । मिसामचां ‘य मां ! य मां !..... जिमि मांयात त्व:ता ब्यु’ धका: गुलि भव्य भव्य
कना: हाल । तर लुतुलुया: भाय्नुय् नुनेगु मत्व:तू । अर्नालि फोटो पत्रकारं थ:गु
क्यामेराया लेन्सयात बिस्सुं वने मफुम्ह छम्ह त्याय्म्हपाखे स्वकल । मेगु हे त्वालं दुत्युं
व:म्ह छम्ह टुरिष्ट खिचायात थें न्हय्म्ह च्याम्ह पुलिसतसें च्वातु च्वाना: ला चिचि
त्यानाच्चन । क्यामेराया लेन्सयात छगू पस:या शटरं पनाविल । शटर तज्याना: नसा
ज्वलं लुटे जुल । टेबिल दराजया लिउने सुलाच्चंम्ह साहुनी ख्वये नं मफु न्हिले नं मफु ।
सामाखुसिइ नं छगू ग्यारेज तज्यात । म्हं मफया: उपचारया निम्तिं ग्यारिजय् बासं
चवंचर्वपिं थीथी मोटरतय् ख्वा:या न्हाय्कं तज्यात – छ्याल्लल
छिल्लल ! छखा छँय्या बापा:भ्यालं बन्दूकया गोली मुल । कलंकीइ न्हिन्हं समय
तालिका कथं कलंकया धुपव: दन । छँवापत्तिं आन्दोलनकारीतय्त ल: ह्वला: ग्वाहालि
या:पिं धका: भ्यालय् भ्यालय् बन्दूक धस्वात । लुखा खापाय् बज्रमल: जुत ।

अं, टी.भी.इ ‘आजको विचार’ ज्याभवलय् छम्ह नेपा:मिं थ:गु नुग:खँ
ब्वयाच्चन । देसयात ह्ययेकाच्चपिं नेतातय्त इमिगु स्वार्थ व मनोवृत्तियात
पत्तिनं सुया: कूलाच्चन । – “निश्चित माग प्राप्तिया निम्तिं ल्वायेगु छता
ख:सा, मेय्ता सा स्याना: धुँ प्वसे यायेगु थमजुइमा: ।”

मेम्हस्यां थ:गु आवेशयात च्यूता: हे मतसे धयायंकल । – “थन आमूल
परिवर्तन वयेमा:गु दु । गणतन्त्र स्थापना यायेमा:गु दु । देसया व जनताया
चाहना हे थ्व ख: ।”

देस व जनताया बारेय् छिगु छु धारणा दु ले धा:गु न्ह्यस:या लिसलय् नुगः चकका: लिस: बिल – न्हापा सा जनतायात दु:ख जुइबलय् थ:त थ:म्हं भलसा कया: “जुजु मदुगु देस ख:ला थ्व” धका: न्यायया भलसा कायेगु चलन । आ: ला गन जुजु दइ, अन जनता असुरक्षित । जुजु च्वय्च्वय् धा:लिसे जनता दास जुइ । उकिं थौंया लोकतान्त्रिक गणतन्त्रया निम्ति व:गु ह्यूपालय् जुजुया औचित्यता मदु ।

ख नं द्रलद्र: मनूत धा:पा: जुया: अंगभंग जुल । अनगिन्ति मनूत वेपत्ता जुल । गुलिखे नागरिकतय् हत्या जुल । देखिं हाहाकार जूगु तुलुतुलुं स्वयाच्चम्ह जुजुया नुगः हे स्वब्याना: तनावन । लाखय् लसितय्गु बसय् ला:म्ह मनू थें गुबलें त्वहं जुल गुबलें कां जुल । जित: मतिइ वन – भीगु भासय् ‘सिन्हाय्’ धायेगु स्वया: नं ‘नांगा नाचे हजार दाउ’ खँत्वा:यात बांलाक मनन याये बह:जू ।

“सम्पत्ति धयागु त्याग याये थाकुगु जुयाच्चन ।” सन्ध्या टाइम्सया छम्ह स्तम्भकारया धापू जिगु न्हाय्पनय् घुनुन्न थ्वयाच्चन । नेपालय् सत्ता धयागु देस व जनताया नासो भा:मपिसे सम्पत्ति नालाच्चंगु दु । अजा:पिं महत्वाकांक्षित धन सम्पत्ति प्व:चिना: तुं सिनावनी । थजा:गु मोह थन जुजुनिसें कया: प्रगतिशील धा:पिके नं दु । थन विश्वास व बचं वर: तया: मित्रता नुनाच्चनी । थन दास व बाउचा जुइ मफुत कि प्रत्येक जनता, प्रत्येक मित्र अले प्रत्येक ज:लाख:ला षडयन्त्रया चक्रव्युहय् लानाच्चनी । अले बहुजन हितायया बौद्ध सिद्धान्त नं नसंफाना वनी, अले प्रजातन्त्रया नामय् एकतन्त्री उदय जुइ । थथे हे जुजु ज्ञानेन्द्र नं उदय जुल ।

आसे न्है ! पिने घाराघुरु जू थें च्वं । ख: ख:, बेय्स:क्वया न्हू बस्तीइ ‘ज्ञाने चोर देस छोड ! लोकतन्त्र – जिन्दाबाद’ या नारा चिल्लाय् दना: थ्वयाच्चन । गथांमुग:यात मि तये थें दनदन मि च्याना: आलमय् मिप्ला: थहाँ वनाच्चंगु दु । पात पुत, पात पुत सलं जुलुस व नारायात नुनेत दुस्सहास यानाच्चन । मनूत चिच्चा: दना वनाच्चंगु सी दु । विष्णुमति खुसिया द्य:ने च्वंगु तपिंताय् कर्फ्यु पा: च्वंच्वीपिं सुरक्षाकर्मित खनेमन्त । छक्व: पतिं भ्यालय् च्वंच्वंगु खनकि बन्दूक थस्वका: दुहाँ हुँ धका: ख्याच्च: बिया च्वनीपिं । ला:सा व, इमिगु हे ज्या जुइ । ग्व, आ: ला आन्दोलनकारीतय् स: नं सालुया वन । तर एफ. एम. रेडियोया त्वाँय्त्वाँय् स: जिगु न्हाय्पनय् इन्न मिना: थ्वयाच्चन । भापाय् गोलिं लाना: स्वम्ह मनू सित,

तःम्ह घाःपाः । दाडय् लाखौया जुलुस पिहांवल । ख्ववि वड्गु ग्यांसं लानाः निम्ह
 घाःपाः जुयाः अस्पतालय् यंकल । नेपालगञ्जय् गोलिं लानाः निम्ह सित, नीन्हय्म्ह
 घाःपाः । प्यम्ह तच्चः । पोखराय् स्वम्ह गोलिं लात । बुटवलय् भ्यालय्, कःसिइ
 च्वनाः स्वयाच्चीपिं ल्यासेपिं तःक्यहौपिं निम्ह गोलिं लानाः अस्पतालय् सित । कलंकीइ
 शान्तिपूर्ण जुलुसय् ब्वति कयाच्चंम्ह मेम्ह नीछ्दं दुम्ह शहीद दीपक सुनुवारया सीम्ह
 वया अबुयात जवरजस्ती बुभे यात । चितवनय् जुलुसया आवेगं नारायण खुसिलिसे
 जानाः किसि-द्वम्बः काल । थुपिं बुखं जिगु न्ह्यप्पु प्वं गायावल । तर
 कर्पु बन्दी जुया च्वनाम्ह जि व जिगु कोथा प्रजातन्त्रया सू नवयाच्चन ।

ट्रान्जिष्टर रेडियोयात दिपाः हे मब्युसे गबलें एफ. एम. ट्युनिङ्गयात जिगु
 पतिंचां तुलाच्चन, गुबलें टी.भी.या च्यानल पलख पलखय् हिलाच्चन । अले मेट्रो
 एफ. एम.या ९४.६, कान्तिपुर एफ.एम.या ९६.१ मिटरया त्वाथः कुहाँ वनाः
 एच.बी.सी.या ९४ मिटरय् पतिंचा दित । समाचार क्वचालाः पलख लिपा
 डा.विकाशानन्दया मनोकान्ति ज्याभ्वलं जिगु न्हाय्पंयात खराःचां थें तिंस्वाका
 बिल । जि स्वयाः नं क्वकालि जुयाः खःला मस्यु, साप बुरानवःम्ह विकाशभाइ
 जितः गबलें गबलें वयागु न्हिलां ख्वाः हे ट्याउँका बी यः । तर थबलय् धात्थें जिगु
 नुगः हे भस्याय् भस्याय् जुइक मनोकान्ति यानाबिल । “लोकतन्त्रात्मक गणतन्त्र
 व सम्बिधान सभाया निम्ति माग यानाः जूगु जन आन्दोलनया मर्मयात भ्याः
 भचा हे मथुइकुसे घोषणा जूगु शाही सम्बोधन धोखा खः । अले सुरक्षाकर्मी व
 प्रहरीतय्सं जनतां पूगु करं तलब नयाः जुजुया सेवा याःगु दु । धात्थें पुलिसया
 लाठी चार्ज, आतकं जनद्रोही व देशद्रोही सेवा खः ।”

धात्थें धाये माल धाःसा ‘थःत जक प्रधानमन्त्री नकूसा प्रजातन्त्र सफल
 जुल’ धाइपिं सुं नं नेतातसें थथे निर्भिक जुयाः आँट याःगु मदुनि । तर व छम्ह
 नेवाः योगी । उकेसनं विकासमान श्रेष्ठ । वयात सुनां च्यूताः तइ ।

छन्त न्हाचः ‘सन्ध्याटाइम्स’ या छम्ह स्तम्भकारयागु विचाः व भावना ब्वया
 नि, अं वया मेगु खँधी छगू नं लुमंसे वल । “देसया कानून कःघाये माःपिं रक्षक
 माहाँत छम्ह सरदारया सेवक जक जुयाबिल । गन भत्ता व सत्ता दइ, इपिं अन
 हे धेचुइ ।” म्वाःल थ्व खँ थन हे त्वःता छ्वये । छ ला आः पिने तापालय्
 च्वंच्वन । ख ला छ नं जि थें अधिकार व कर्तव्य कःघाये माःम्ह नेपाःमि खः ।
 स्वास्थ्यकर्मी, कानून व्यवसायी, शिक्षक, कर्मचारी, मजदूर, विद्यार्थी व राजनैतिक

दल जक मखु, ब्याक्क जनजातित ल्यहेंदना वःबलय् छ जक आम्कन गथे मन चिना तयेफइ । आम्कन नं नेपालय् लोकतन्त्रात्मक गणतन्त्रया पक्षय् पतिं धस्वाकेगु जुलुस जुल धाःगु खँ न्यना । छिमित यक्व सुभाय् दु । देशं पिने हे च्वंसां छिपिपाखें कमसे कम 'हय् !' धकाः न्वायेगु ज्या ला जुल । उकिं हे छं च्यूताः कयाः न्यनेकने याना हयाच्चन । छन्त हाकनं छक्वः सुभाय् दु ।

तर छन्त कनाच्चने माःगु मदु । थन स्यूपिं नं अथे हे, थूपिं नं अथे हे । सियां जक नं मज्यू, थुयां जक नं मज्यू । नियत हे भिनेमाः । विलियम ब्लायाकया ब्लायाण्ड ब्वायनं थें थः हे जुजु जुयाच्चनेगु भावुकता थ्व मखये धुंकल । उकिं कवि विलियम ब्लायाकया लकसं पुलाः क्षमता बोध यानाः हक व अधिकार दावी यानाच्चन अपाङ्गतय्सं नं । म्हालिकाय्चा प्रवृत्ति दुपिं दलया नेतातय्सं आः जुजुयात तारण तये थें 'सेरिमोनियल किंग' धकाः लाय्बुयाः ला क्यनाच्चन । मस्यु थ्व मिखाय् धुलं छुवाकेकथं 'छं दाये थें या जि ख्वये थें याये' या छुमां जकं खःला ? ! जितः छाया थें हानं छक्वः विकासानन्द "शाही घोषणा घोखा खः" धकाः धाःगुयात हीज मास्टर भ्वाइस जुयाच्चने मास्तिबल ।

छं मस्यु, थन ला एफ.एम. व टी.भी. बाहेक मोबाइल व टेलिफोन लाइन नं मचाः । म्हिगः घौछि निघौ कर्पुं दिपाः काःबलय् असनय् च्वंम्ह तुयुकाजिया अजिं लाखे थः छय्पिन्त बाखं कने थें छुनाखँ न्यकाच्चन हं । "बांलाःगु खँ धयागु न्ह्याम्हसिंगु न्यने बहःजू हं छायाधाःसां "म्हुतुमदु कैइया न्ह्यछें हे लिकाये मधुंतले व ल्वय् गबलें लनी मखु हं ।" अकिं गबलय् गबलय् अति अन्याय, निरंकुशता न्यनाः हत्या हिंसा जुयाः व जनता हाहाकारं इतिमिति कनी अले अबलय् देय्या थाय्पा नायःत पंचकय् लाइ हं ।" अथे अजिं कंगु खँ इमिसं छु थुइ धकाः च्वनां ला मस्त फुक्क 'खः अजि, खः अजि' धकाः जुरुमरं दना वन हं । आसे आसे कर्पुं मचीकूनि धयां गन गने फु धकाः इमित हं ।

अं, अय् जिं छ्वया हयागु 'जनबाहाःद्यःया शान्ति सफुतिइ च्वयातःगु घटनावली छं व्वन हे जुइ । नेवाः सांस्कृतिक इतिहासं थथे हे कनाच्चंगु दु । गुम्हस्यां अनिष्ट जुल' धाइ । छं नं थ्वयात छु नां वी मास्ति वः व्यु । जितः छु आपत्ति मदु । □

(“नःलि” – १९२६ वछलाथ्व)

भाव विभोरगु किपा

थौं सुथय् चाःह्यवना कथं किपाच्चमि कलाकार पासाया थाय् छधू दुहाँ वने धकाः वनागु । वय्कलं थःगु चित्रशाला कोथाय् यंकाः “जिगु न्हूगु च्वयागु किपा छन्त छक्वः क्यने” धकाः न्हय्पाः ति क्यानभास क्यनादिल । थः च्वये मसःसां छुं नं कलाकारतय् पेन्टिङ्ग धाल धायेवं जितः स्वयेयः । उकेय् दुगु अभिव्यक्तियात थूसां मथूसां कुतुकुलाः स्वयेगु बानि नं दु । अबलय् गुगुं अभिव्यक्तिं खनेवं हे मनय् थी । वसन्तया भालय् ह्वयाच्चंगु स्वांया उं समायोजन जूगु ताःलाना च्वंगुलिं नुगः सालाकाइ । नेवाः जीवनया तजिलजिइ थःत तंकावी । कोलाज शैलीया ब्वघासां थें सवाः कायेकावी । गबले किपा स्वस्वं माखापिखां भुतुभुनावी । पिहाँ वये मफुगु कम्प्युटरया ज्याभवः थें ‘शट डाउन’ याये मफयाः स्वीच-अफ याना बीमाः । बस् !

अबलय् वय्कलं थःगु कलायात कयाः भाव विभोर जुयादीगु खं जिगु न्हाय्पं इन्न मिना हे च्वन । – “धात्थेंगु जीवनयात ब्वयेत नग्नता लिधंसा कायेमाः । नग्नता यथार्थ खः । नग्नता सौन्दर्य खः । थ्वयात नांगा मिखां स्वये मज्यू ।”

तर वय्कःया उगु उद्गारयात मथू धाये नं मछ्छाःसे च्वनावः । थू धाये नं ख्वाः ह्याउँसे च्वनावः । लाःसा थौया जीवन ब्वयेगु ताःचा हे थ्व खः ला ! खः, वय्कःया भाव विभोरयात खुयाः खुयाः जिं बाखं च्वयेगु कुतः याना । मस्यु, जिं बाखं गुकथं न्ह्याके माली ? गनथाय् दिके माली ? जिं धाये मफु ।

बाखं च्वयेत बाखंचु जक छु ल्हवना, आलमय् सुपाँय् ग्वाराग्वारा दासि वल । मिखा ख्यल्ल मिनावल । ख्यल्ल मिंगु मिखाय् पुराण व अवदानय् च्वपिं अप्सरात न्यासिन्यासि चायाः प्याखंपाः काःवल । इन्द्रं मचा पहः वयेकाः अप्सरातय् मुलय् ग्वाराग्वारा तुलाः पिरे यानाच्चन । गबले सँ पित्तुपियाः ह्ययेकाच्चन । गबले केलेहें मिखां म्ह छम्हं नुनेत स्वयाच्चन । उगु लु जि मिखाया नानिचाय् काना च्वंकच्वंक हे दबूछेंया धकिं सुपाँय् जुयाः कुतुंवल । दृष्य हिलाः धकिं चालेवं चरमसीमां न्ह्याःगु प्याखं थें छम्ह असहाय मिसाया चिल्लाय् दना सः छम्ह मिजंया घोंसःलिसें तुं लसपस जुयाः थ्वयावल । जिगु मतिइ उत्तेजना

दनावल । – अहो ! छम्ह राक्षसं छम्ह राजकुमारीयात व्वयेका यंकाच्वन, कोखं चखुचित दाया यंके थें । मखु, मखु, ज्वाल्ल थीगु लुँ-चोलेचिया लोभय् छम्ह न्या बल्लिसइ काना: फाताफाता पुलाच्वन । तर छत्थुं हानं जिगु मिखाय् प्याच: बुयावल । बुलुक्क बुलुक्क छगू चाकला: फल्चा च्वसं, छमा वंगल सिमाया क्वसं छम्ह ऋषी ध्यानय् च्वंच्वन, स्वर्गया अंश कायेगु तातुना: । इन्द्रया मिखा भासय् छम्ह अप्सरा प्याखंपा: काकां बंग्वाराय् थ्यंक: वल । अले ध्यानय् च्वंच्वंम्ह ऋषीयात वं घ्यलं बुलागु मायां पित्तुपिया: स्वयाच्वन । ऋषी ध्यानय् दुनाच्वन । चुरि व घंगला देग:या गं जुया: थ्वयाच्वन । ऋषीया मिखा मचा:, बोधिज्ञान लाकेत मारलिसे ल्वानाच्वंम्ह सिद्धार्थ थें । अप्सरां प्याखंपा: काकां थ:गु म्हया कुं कुलामं यौवन त्वलाच्वन । वया यच्चा: घंगला व चुरिया सलं संगीत थ्वयाच्वन । अहो ! ध्यानीया मिखा ला बुलुहुं चालावल । चल: वंगु म्हं अप्सरायात ल्हानाबिल । अले अबलय् हे छत्थुं ऋषीया बल्चा व क्यव भू चायेक न्हिलास: थ्वल । “आखीर छंगु स्वर्ग छंके हे तुं कुन मखुला ! हा हा हा ! ”

जित: मतिइ वन । “धात्थेंगु खँ ला राक्षस, मनू व अप्सरातय्गु जक मखु खनी । न्ह्याम्ह ल्वगिं नं हि पुलुपुलु व:सां चासु कैइ चासुं वइ । मिसा मिजंतय् बसिया फसं हे ध्रुपव: दंका: मिखा बुलुका वीगु खनी । बसिया फसं हे ध्यानया वाउंगु ह:यात सुकू गंकावीगु । उगु फसं हे घ्वाका: व व्वइ । व गन जुइ, व गन दी व वं हे मस्यु । अबलय् माकुसे च्वंगु पापलिसे व तनावनी प्रायग्माय्टस की थें । मतकी थें ।”

छे ! म्वा:ल, पलखयात थ्व खँ त्व:ता व्छये । जीवन दर्शन छु ख: ? जिं मस्यु । संस्कृति छु ख: ? छाया ख:, जिं मस्यु । इहिपा मयासे मां जुया: म्वानाच्वीपिं पश्चिमी मिसात खना: भी अजू चायाच्वनी । भा:तं कला: बर: तयाच्वनी । कलातं भा:त बर: तयाच्वनी, जिन्स माल सामान भा:पिया: । इन्द्रं मेनकायात कण्व ऋषीया थासं लिगना काल, मांया दुरुपा चहीका: शकुन्तलायात अनाथ यानाबिल । जुइ फु, कण्व ऋषीया निम्तिं थ्व छगू भाका ख: । तर शकुन्तलाया निम्तिं थ:गु हे जीवनया बाखं जुल ।

धात्थें उर्वशी, रेवती व मेनकापिं ला स्वर्गयापिं जुल । कल्पनायापिं जुल । द्य:या मन्दिरय् च्वनीपिं देवकीपिनिगु संस्कार दुगु थ्व थासय् कर्किया छ्यनय्

सि ब्वाय् वनाच्चंगु खनेगु गुलि पाय्छि जू मस्यू । गन छः दइ, अन थःत सेवा याइपिं अप्सरापिं दइ, देवकीपिं दइ ।

हानं जितः थ्व हे भवलय् छपु अवदानया लु लुमना वल । माकःया मतिना थें थः मचायात लुत्तुलुया च्वंगु बाखं । – मां व काय्, माया व ममताया क्वातुगु स्वापू धाइ । अय्सां थ्व बाखनय् छन्हू काय् मांयात त्वःतावन । सांसारिक बन्धनं चिलावने थें । मामं वयात माः जुल । गुंगुं, बुंबुं । मामां छः बिनावन । अन वयात छखा बल्चां पियाच्चंगु खनी । वं अन हे थःगु गन्तव्यया भासु ताल । वयात बाय् च्वनेत व हे बल्चां लसकुस यात । सुनानं खनी धकाः ख्युंया धकिं प्यनातःगु । कीक्वःया हाःसलं तापाःगु । मचायेक छगू विपरित अंगया नायुगु स्पर्श । छता क्वाःगु सासःया चःतिकना । तापाकनिसें भुसुभुसु तां न्वयेका वःम्ह यात्रु । छम्ह लँजुवाःया भासुलना, छघुतु प्याःचाः । निगुलिं छगू, छगुलिं निगू । निम्हं छम्ह, छम्हं निम्ह, पाःलाःया खण्डन व विखण्डन थें । मचायेक ख्युंया धकिंयात इलं मुमुं चीकायन । लिपा स्वब्यना वंगु धकिंया जलय् छगू लु बुयावल । मांया दुरु त्वनाः ब्वलंम्ह छम्ह ल्याय्म्ह । छम्ह मिसा व छम्ह मिजं । छगू हे संयोग, व हे काय्म्ह, मांयात त्वःता वंम्ह विरुपाक्ष । ममता व माया । माया व मोह ।

खः, छितः वय्कःया भाव विभोर कःघाःगु किपा ला ब्वये हे त्वःमन । वय्कःया किपा च्वज्या कोथाय् न्हू न्हूगु कलां जाःगु किपाया भवलय् जिगु मिखायात व किपाया उं ताः लाकाः हनातःगु छपाः निर्वस्त्र आकृतिं दुकाल । छुं ब्वयाच्चंगु किपाया उग्र शैली दुने जितः अमरावति मैयायात थें तुंछिं थकयाः प्वलायंके मास्तिवल । अबलय् वय्कः जिगु लिक्क दं भाल । अले वय्कलं उगु किपाया जः ह्वलादिल – थ्व किपाय् जिं यथार्थ जीवनया दुने नं जीवन उलाः ब्वयेगु कुतः यानागु दु । सायद थ्व कलाया प्रविधिइ छगू छयला खः । कलाया उन्मुक्त ब्वज्या ।

हानं जितः वय्कःया भाव विभोर खँपुं कय्कय् पुल । “..... नग्नता यथार्थ खः । नग्नता सौन्दर्य खः ।” धात्थें ला वय्कःया थुगु भाव विभोर शैलीया थासा स्वयाः नं भवपुइकाः उलातःगु ब्वज्यां जिगु इन्द्रीयत कय्कुना वन । जालिस्वां चुलि जाया वःगु जिगु पचिंम्हया चिमिसँ प्वाल्य् जिं वय्कःया ब्याख्या लुइकेत स्वयाच्चना । थुइकेत स्वयाच्चना । चन्द्र महारोषणया तन्त्र

अले तन्त्रया दुने च्वंगु जीवन दर्शन थुइके मास्तिवल । अन्ध विश्वास व कट्टर धर्मप्रति आस्था मदुगु जिगु नुगलं देखा छक्वः काये मास्तिवयेकल ।”

जिं व किपायात भवःलाक मिखा ब्वयायंका । आलमय् यगानाः कुलिकुलि च्वंगु घुंगुवाल सुपाँय्, कुँ जुयाः थहाँ वनाः लः जुयाः नायाच्चन । दमरकुमारी धाकायात जालिया पिवःसां बनातःगु ताल्लाया फांगा । सिथय् छफ्वः घ्यःबु स्वां, चाया छफुति ई त्यासा कयाः ह्वयाच्चन । क्यानभासया दथुइ मूर्त जुयाः नं अमूर्त आकृतिया ध्यानय् च्वंच्वंम्ह मिसा, छम्ह नां काये मत्यःम्हयात तिसा कथं गःपतय् छगथि हिनाः नुगःपाया ख्वंचय् थमुनाच्चंगु न्ह्यपं व म्ये लुयाच्चंगु छयं निगू ब्वति निखे बायाः ख्वग्वलाक थतुला वनाच्चंगु दु । छपा ल्हातय् अमोघपाश, मेगु ल्हातय् भगवान रजनीशया जःमूमाः ।

अले थुगु आकृतिया क्वसं तेषुचा तक अर्धगोलाकार न्ह्यसःचिं धस्वानाच्चंगु दु । पालि निपां फपुलाच्चंगु आशनया क्वसं घाँय् बुइकातःगु दु । अर्थ स्पष्ट व अस्पष्ट थ्व किपा जिगु मिखाय्, जिगु नुगलय् प्यपुनाच्चन । धात्थें मुर्त जुयाः नं अमूर्त जुयाच्चंगु थ्व किपायात जिं थुइके मफुसां किपां जितः थुइका च्वं थें च्वं ।

जिगु मिखाय् छत्थुं महाद्यः व पार्वतीं थवंथवय् पाचिनाः भ्यालं क्वस्वः वल । मलः मजुकेत देगः देगलय् रतिक्रियाया त्वान्नासिं धस्वानावल । छगू विश्वासया सिद्धान्त लुयाच्चंगु वैज्ञानिक कलाया आस्था । पर्यटकतय् असामान्य कथं मिखा सालेगु सामान्य अभिलेख जुयाविल । जिं जिगु मिखायात थाथा यानाच्छया । जितः विपश्यनाया ध्यानय् च्वनाः ‘थः’ फुक्क च्वलाः वय्कःया भाव विभोर खँ नुगलय् तये मास्तिवल । □

सचेतमान

नेवाःतय् दथुइ सचेतमान धाल धायेवं देय् हे जाः । व तःधीसे च्वनाः म्हथां बांलाः । तसकं क्वमिलु जुयाः सोभासे पहः वः । तर अथे सकलें जुइमाःगु धयागु मद्दु । पाकःचा ख्वाः । अथेसां ख्वाः जक यचुइवं नुगः नं पिचु जुइमाः धकाः सुनां धायेफु । तर वया चरित्रया विशेषता दु, उकिं हे व न्ह्याबलें पञ्चशीलया मुद्रा ज्यानाः ल्हाः ज्वज्वलपिया च्वनी 'बुद्धं शरणं गच्छामी ! धम्मं शरणं गच्छामी ॥ संघं शरणं गच्छामी !!! पाणानि पातामि वेरमणिं शिषा पढं समाधियामि ।.....'

व धर्मोदय सभाया दुजः खः । अले व ज्ञानमालाया नं सक्रीय दुजः जुइगु स्वाभाविक खः । राजनीतिइ नं न्ह्याबलें बहुजन हिताय बहुजन सुखाय धकाः बहुदलवादी जुयाः तानाशाही प्रवृत्तिया भण्डाफोड यानाः लोकप्रियता कायेगु वया गुण हे जुल । वयात समाजय् नं राष्ट्रया दुने नं वरिष्ठताया उपाधीं छाय्पियाः बय्बय् यानातः । देय्या मानव अधिकारवादी धाःपिसं नं मुलय् तयाः ह्येकातः । गुणया गुणं जक जाःम्ह सचेतमान तथागतया न्ह्यःने च्याना च्वनिगु नस्वाःगु धुं थें ।

सचेतमानयात जिं नं न्ह्याथाय् खंसां, वं खंसां मखंसां काचाक्क जिगु निपा ल्हातं ल्हाः ज्वजलपी धुंकी । वयात गबलें मानववादीतय् मुँज्याय् ध्वदुइ, गबलें नेपालभाषाया साहित्य मुँज्याय् ध्वदुइ । अले गबलें 'जय नमो बुद्ध' या तुतः व्वनाः स्वयम्भुया पाःचां थहाँ वयाच्चंगु ध्वदुइ । छाय् ... छाय्, वयात खनेवं व्याक्कं दुःख तनावं । अन्याय बुलुयाः न्याय लुयावः । आःतक वयापाखें छुं ग्वाहालि मकयानिसां यक्को यक्को कयातयाम्ह थें श्रद्धां छयं क्वछु ।

वया न्वचु नं इलय्बिलय् न्यना – दबू दबुलिइ आमसभाय् अले रेडियो व टीभीइ अन्तरवार्ता नं न्यना । सः उलि हे क्यातु । संयमता दु । पञ्चरत्न तुलाधर व दमननाथ हुंगानापिनि थें मार्मिक जूसां उग्रता मजू । तर तर्कपूर्ण जू । उकिं व जनताया निम्ति धकाः देय्या निम्ति धकाः कानून उलङ्घन यानाः पुलिसं तकं नं ज्वंका वनेम्वाः । थ्व नं वयागु विशेषता हे जुल । थ्व नं वया नेपाःया वरिष्ठ नेतात स्वयाः महानता हे जुल ।

‘देवानां प्रियदसि’ धा: थें सकसियां य:म्ह सचेतमान विहार विहारय् भिक्षुपिनि चिवरया ज: थें शान्तमूर्ति । तर जि पत्या: हे जुइ मफु सचेतमान अथे मखु हँ । वया ज्या, वया वनेज्या वकालत यायेगु हँ । व वकील हँ । वया धर्म वया कर्म हे हाकुगुयात तुयु यायेगु, तुयुयात हाकुगु यायेगु । व प्रक्रिया वया अध्ययन याना वयाया ज्ञान हँ । उकिं धर्मोदय सभाया दुज:, ज्ञानमाला भजन खल:या सक्रीय कार्यकर्ता व थी थी खल:पुच:या वया उपस्थिति ला वया बांमला:गु म्येया बांला:गु लय् हँ । वया ख्वा: पिचु, नुग: वँचु ।

ख: धया, वकील सचेतमानं बाग: दाजुया छें वुं भ्वाँइ यानाबिल हँ स्यु । धात्थें थ्व खँ न्यँसानिसें जिगु न्त्यप्पु इन्नइन्न मिनावल । म्ह छम्हं वाइयाँ वया: भुम्म भुम्म जुयाच्वन । जित: यांकया: न्त्यप्पु थाथा याये मास्तिवल । जिगु भुमिं यंकूगु न्त्यप्पु चिल्लाय् दन । ‘हँय् ! अथे नं जुइ ला ! खइ हे मखु, अथे तक ला । वया लोकप्रियता व सरलताया बय्बय् न्यने मफया: वँसिघ: तज्या:गु का थ्व ला । मनूत धयापिं नं गपाय्च्व: मखुगु मखुगु खँ ल्हाइपिं । थथे धायेगु, न धर्म हे ख: न कर्म हे ख: । शर्म नं मदुपिं, मर्म मथूपिं । धिक्कार ! थथे कर्कित भ्वाकलय् थुनिगु ला मनूतय् पेशा थें जुइ धुंकल ।

मिहग: नं त्वा:याम्ह बुरुमां ध्वंवा हालाच्वंगु स: जिगु जवगु न्हाय्पनं दुत का:सां खवगु न्हाय्पनं वयात पितच्छया बिया । तर पिचुगु अंगलय् हानां लिथ्व:गु स: थें जिगु न्हाय्पं इन्न मिंक थवावल । न्त्याक्को व्व:बिया व्व:सां वत्तुक्क फ्यतुना च्वनीम्ह धित्ता:म्ह फ्वगिं थें ।

व सचेतमानचा तसकं जालि । व्व:मिइ ध्य: लुइगु व लुसि त्वाका जुइगु वया ग्वय् नये थें । थ:थितिपिन्त हे बाकि मत: । छं सी मखु, न्हापा भिदँ भिन्त्यादँ न्त्य: पर्ता: बाउचा धयाम्ह जिमि किजा धायेमा:म्ह छम्ह फुकी दु । न्हिं खाना: न्हिं नयेमा:म्ह । अय्सां न्हिच्छि, भ्यातुक्यातु ज्या याना: ब:न्ही वया साप त्यानुइगु । उकिं भचा भचा म्हय्खा व्वयेक: वनेगु व बानि दु । सचेतमानचिया म्हाय् हकनाराचिया काय्यात बियात:गु । हकनाराचिया कला: लुँस्वां ध्वंमाचिया मि दुइगु ज्या । हकनाराचिया बनेज्यां स्वया: दुगाँछि लुस्वां ध्वंमाचिया भिंय: जागेजू । वयाथाय् बइगलय् सुथनिसें बहनी तकं त्वा:यापिं व त्वालं पिनेयापिं नं म्हस्यूपिं फुत्तफात्त लिसं तयेत दुलुपिलु जू । पर्ता: बाउचा

नं अन बहनी जुलकि खोलचा भपुइकः वं जुयाचवन । धात्थें ला लुँस्वां धोंमाया अय्लाः छखला त्वना मवःतले वया न्ह्यः हे मवः हँ ।

वं लुँस्वां धोंमायाथाय् मोतिमैचा गुलि भवपुइका वइगु खः, व ला मस्यु । छन्हु पर्ताः बाउचा त्वाल्य् “जि फुत बाः बाः । अय्लाः छखला त्वंकाः जिगु छें किलं च्वया काल बाः बाः ।” धकाः चिल्लाय् चिल्लाय् दनाः ह्वाँय् ह्वाँय् ख्वयाचवन । सकसिनं “छाय् छाय् !” धकाः न्यनेकने यात । वयात व लुँस्वां धोमां अय्लाः जक त्वंकाः छें हे किलं च्वयाकाःगु जुयाचवन । छु सचेतमानचिगु सल्हा व जालि भ्वं मदुगु जूसा अथे यायेफइ ला ? ! हकनारांचा अथे ह्याउ दुम्ह ख हे मखु । हरे ! वफरा पर्ताः बाउ, न्हिं खाना नये माःम्ह । वया काय्, मचा हे तिनि । म्थ्याय्, बःचा धिकः तिनि । वं इमित गबलय् ब्वलकिगु जुइ मस्यु ।”

त्वाःबाःयापिं सकलें च्वनाः हिराकाजि साहुया बैठकय् मुँज्या च्ववन । – थथे ला याये मज्युनि । छगू ला छेंय् छेंय् मि दुयाः अय्लाः कयाः मीगु ज्या धइगु हे कानूनी मखु, मेगु अय्लाखं कायेकाः भ्वं च्वकाकायेगु धयागु गन तक नैतिकतां ब्यूगु खँ खः । थ्व ला घोर सामाजिक अपराध जुल ।”

गुँइ हानाः थ्वःगु थें सलं लिसालिसा काल । – खः खः, थ्व ला अपराध खः । थ्व ला अधर्म जुल । थथे ला याये हे मज्यु ।

सचेतमान अबलय् छखे कुनय् च्वनाः छयं क्वछुनाचवन । वया म्हुतुप्वाः मचाः । लाःसा व थवल्य् सुनां सुनां छु छु न्ववाइ धकाः म्हुतुप्वाः तिनाच्वंगु जुइ । लिपा च्वकानायःत धाक्वसित गुगुं इलय् माकःचिया जालय् ततःक्यंकेगु जाल ग्वयाच्वंगु नं जुइफु । ऐनयात मैन यायेगु धयागु वयात छगू खेल खः । थुगु खेल हे वया चातुर्य कला खः ।

वं आः नं छगू खेल म्हिताच्वंगु दु । चेसकासाया गतिया चाल थें बेथां बेथां न्ह्याकाच्वंगु दु । सरकारयात धों ल्हायेत्यंगु दु । जनतायात म्वाय् चुइकाः बहुजन हिताय बहुजन सुखाययात मि तयेत्यंगु दु । सुं मेपिसं याःगु जूसा वयात षडयन्त्रपूर्ण धाइ । तर वयात, वयागु थुगु षडयन्त्रपूर्ण ज्यायात सुनानं षडयन्त्र धायेफइमखु । थ्व ला वया कानूनी हक व अधिकार हे जुल । त्याःसा वया चमत्कार जुइ, बूसा वया कृतलं हानं गलबाः छः गइ । Failures are the Success of Pillar. □

(“न्ह्यलुवा”/खुलापौ, ल्याः १/नेपालभाषा एकेदमी)

ज्याथः ल्याय्म्ह

मञ्जुश्री तक गःचाः हिलाः दल्लु आवासया लँपु ज्यानाः लिहाँ वयाच्चनागु । लँय्, छम्ह ज्याथ ख्वातुगु पाइन्ट व जाकेट फिनाः जि पत्तिइ स्वयाः वयाच्चन । न्हाय्पं बापा त्वपुक ऊनया तपुलि पुनातःगु दु । इतिइति च्वंक ल्ह्वंगु ला मखु, अथेसां वयात खनेवं न्ह्याम्हस्यां ल्ह्वंम्ह मनू हे धाइ । अकिं व ग्वाराचा चिंगुलिं भचा चीधिकः नं खनेदु । खः, जि हे पाय्धिकः जक जुइ । छाय् छाय् जिगु मिखा आकाभाकां वया न्हाय्पनय् लात । न्हाय्पनय् त्वाल्ल च्वंक निफ्वः फ्वः दु । जितः मतिइ वन – ल्याय्म्ह थें च्वं नि, जंको याये धुंकल का । न्हय्दँ न्हय्ला व न्हय्न्हु दये धुंकूम्ह खै ला व ! जितः पत्याः मजुल । अय्सां सत्यमोहन दाइ ग्वःक्वः ला जंको हे याये धुंकल । चय्न्त्यादँ चय्खुदँ दये धुंकल । अय्सां भी स्वयाः वल्लां । न्ह्याथासं जुइफु । न्ह्याथासं वनेफु । न्ह्यागुं यायेफु ।

आः माधवदाइयात जंको याःबलय् वाज्यः जक वंम्ह ल्याय्म्ह थें च्वनि । जितः हे का, न्ह्याम्हस्यां ‘राजदाइ’ ला न्ह्याबले हे अथे हे का । जिं म्हस्युसानिसे ल्याय्म्ह हे तिनि । वरु जिपिं बुहाबुहि जुयावने धुंकल’ धाइगु ।

थथे धाइबलय् छखें ध्याचू नकू थें ताइगु, छखें ख्वाः ह्याउँसे च्वनावइगु । अय्सां जि ला नेपालभाषा केन्द्रीय विभागय् नं उमेरया हठबन्दीं रिटायर जुइधुन । खुइ स्वदँ पूवन । तर जितः बुहा जूगु मचाः । यक्को ज्या याये ल्यं दनि । मेमेपिं गन गन थ्यने धुंकल ।

जितः लुमं, छक्वः जिमि म्ह्याय्यात जाँचया सेन्टरय् तःवनागु । ताहाचल क्याम्पसय् (महेन्द्र रत्न क्याम्पस) वया क्याम्पसया पासा छम्ह नाप लात । मिसा बांलाः । व जिमि म्ह्याय्या ज्वः जुइमाः । जि वयालिसे मिखा त्वात । जि खनाः व मछाल । जि दुगुलिं वया अप्वः खँ ल्हाये मवल । जितः नं मछिं थें तायावल । “का, बांलाक च्वया वा” धकाः जिं म्ह्याय्यात त्वःताः लिहाँ वया ।

लिपा इमि खँ जुल खनी – छ सु मिजलिसे वया च्वनागु ? छिमि

व्वाय्फ्रेण्ड लाकि छु ? धाल खनी । जिमि म्ह्याचं 'हँय्, व ला जिमि बाः का । थन क्याम्पस सेन्टर मस्यूगुलिं जितः तःवःगु का !' धाल खनी ।

ख नं जिमि काय् म्ह्याय् अपाय् अपाय् धिकःपिं दु धकाः यक्कोस्यां मस्यू । काय्म्ह्याय् धाये मत्वः धाइगु । जिमि काय्या नं जि थें सँ हाल । धात्थें ला जि स्वयाः याकनं सँ हाल । बिचरा वयात न्ह्याबलें मचा यानातये मास्तिवः जितः । छु याये बैसं पना तइमखु । थौं जि काय्यापाखें निम्ह म्ह्याय्यापाखें निम्ह यानाः प्यम्ह छय्पिनि आज्ञा जुइधुन । जि थें याकनं इहिपाः जूसां न्यादें खुदं जि छुइपिं नं दये धुंकी ।

थथे गःचाः हिलाः लँय् लिहाँ ववं बिचाः याना वयाच्चनावलय् न्ह्याबलें “भगवान शरण !” धाइम्ह तरकारि पसलें जितः निक्कः स्वक्कः “भगवान शरण ! अय् गुरुजु, भगवान शरण, धया !!” धाःबलय् तिनि जिगु भुमि गुत ।

खः जि भुमिं पिचानाः भसंक वंबलय् व ज्याथ न्ह्यःने थ्यने धुंकल । वं न्हाय्पनं छुं लिकात । जिं स्वयां वना । वया न्हाय्पनय् गनया जंकोया तुकि थें जाःगु मारवारि चाः खः' धकाः । व ला एफ.एम. ट्रान्जिस्टरया एरफोन धकाः जुयाच्चन । □

“सन्ध्याटाइम्स”/ने.सं.११२६ पोहेलागा ६)

जंगबहादुरया यात्रा

धुँ, चिताधुँ व सिंह स्वम्हसिया जंगलसत्ताया निम्ति जंगल समस्यामूलक मुँज्या च्वनाच्वन । स्वम्हं मनूया सवा: थुइका तये धुँकूपिं जुयाच्वन । अय्सां जंगलय् शान्ति कायम यायेगु, विकास यानातयेगु खँयात कया: भी मनूतय्सं थें तर्क वितर्क याना: थ:थ: छ:ने लाकेगु दाउ मालाच्वन ।

तर, अजूचायापु । भी थें तुं हे इमित नं आक्रमणकारी व रक्षक धा:पिनिगु बन्दूक व बमया सलं म्ह चिंक चिंक वंकूगु जुयाच्वन । थबलय् हे छम्ह गुँफा धा:सा त्वा: क्वक्व छुका: वँ क्वक्वपिया: व्वांब्वां वनाच्वन । भुतिमाक:त न्हिप्यं प्याग्लाक्क वंका: सिमा सिमाय् भुग्लुं च्वंच्वन । चल्तात आंला आँलि जुया: त्वालां स्वया: भवातां भवातां दनाच्वन । थुकथं जंगल निकुञ्ज भुइभाय् दना: भुग्लुं भाग्लुं च्वं ।

जंगल मुँज्याया छुं न्हि लिपा चिताधुँ स्वक्व: तक गर्जे जुया: हालाहल – “धात्थें ला शान्तिया निम्ति वार्ता हे जंगल समस्या ज्यंकेगु मू लँपु ख: । अय् धुँ, छ ला सत्ताया ठेकेदार जुयाच्वन का । ग्व, छु धायेगु ! छन्त ला ‘शान्ति’ धयागु मय: खनी । शान्तिया निम्ति छुं न जित: हे थ्व जंगलया राज्य ल: ल्हाना बिल न थम्हं हे शान्ति थापना यानातयेगु भा: खंकल । बफरा ज्याथम्ह हाकुधौंचित ख्वयेक ख्वयेक हे वया बासं थनाबिल । छु थें जा:म्ह धिता:धुं राज्य या:गु ला गुगुं इतिहासय् मदुनि का हूँ ।”

“मदु सा मदु का ।” धुँ लागिमिगि चाया: हालाहल । आ: सिंह महाराजं हे आक्रमणकारीतय्त क्वत्यलेत म्हालापतिंवां हे ध्वाना मब्यूसा ! थुपिं खि फाफां मुस्या नइपिं धका: मस्यूगु मखु । धात्थें थुपिं मनूतय्गु लागिं जक मखु, भी पशुतय्गु लागिं नं ग्यानापु । थुमित भीगु जंगलय् दुकाये मज्यू । थुमिगु ग: हे भालु छ्वया: कुमिचिया छें थें थुना छ्वयेमा: । अथे धका: जिं इनाप पौ च्छानागु नं ख: । ग्व, छुं हे च्यूता: तया बिमज्या: । आ: जिं जक छु यायेगु ! जित: शंका वं – सिंह महाराज हे आक्रमणकारीतलिसे स्वापू दु थें च्वं ।

“स्व, आ: थुपिं नापं क्वमालि जुया: वार्ता यानाच्वने मा:गु खँ हे मदु, धया । अय्सां छु याये ! भी सिंह महाराजं हे शिफारिस मया: । नत्रसा न्हापा

हे कचिला त्याना: नयाछ्वये धुन का थ्व कुलंगारतय्त ! छन्हू ला थ्व हलिया कुकुलामं हितिमंग: व गरुड न्हनावं थे थ्व जंगलं तना मवंसे गा हे मगा: ।”

ख:, धुं सिंह महाराजयाके आक्रमणकारीतय्त न्हंकेत उजं प्वंबलय् धया बिज्यात हें “आखिर आक्रमणकारीत नं थ्व हे जंगलया बासिन्दा ख: । छम्ह जंगलिं मेम्ह जंगलियात नुनेगु पशुवता ख: ला ! यदि आक्रमणकारीतय् नं जंगलया हे समस्या ख:सा वार्ता याना: हे जंगलया समस्या ज्यंकेमा: ।”

तर इमूचा छम्ह हे पत्या: मजुइक छगू रहस्यात्मक घटना जुल । प्रजावत्सल सिंह महाराजया गुँछें छगू अदृष्य आक्रमण जुल । ख जा जंगलया जनावरत अबलय् थ:गु किपालु खना: थ: हे चिला चिलावनेत स्वइगु । अले आक्रमणकारीतय्त नुनेत उजं का:वंम्ह धुंयात नं उलिमछिं थ: पासापिसं नं त्वतु त्व:तुं वन । अनलि धुंतय्त नं क्व:थले फुम्ह गुंफातय्गु ग्वाहालि कया: तिताधुं जंगलया जुजु जुल ।

तिताधुं अले पूर्व योजना कथं सहलह न्ह्याकल । छक्क: न्हूगु पिढीया आभास जुल, उकुसमुकुस दंक तां न्वयाच्चंबलय् छभा: वा वयाबी थें सिच्चुसे च्वन । ह्युपा:या ज: लुल । लाछिइ लाछिइ मनूतय् मस्त म्हिताच्चन – निभा: त्वयेकं वा वल, धुंया मचा बु... ल । घामपानी घामपानी स्यालको बिहा, कुक्कुर जन्ति बिरालो बाहुन ।

धुं तिताधुंया सहलहया नीति स्वया: छपला: न्ह्य:ने वना: स्वव्यनावंगु थ:गु थाय् मालेगु हानं छक्क: सिंह महाराजं कुत: यात । वं गुंफा व मेमेपिं पशुतय्गु नं ग्वाहालि कायेत छगू योजना दयेकल । धुं, भालु, गुंफा, माक: अले आक्रमणकारीत व नां काये मत्य:पिं तकं तया: छगू मंका: ज्यासना पुच: स्वनेगु माग यात । सहलह हे याये म्वायेक आक्रमणकारीतय्त नं थुकेय् दुथ्याकल धा:सा जंगलया अशान्ति अथें हे ज्यनावनिगु न्हूगु सूत्र पिब्वल । धुं द्रम्ब:चाय् दना: गर्जे जुल । – “भीगु जंगलय् यक्को हे अबोध पशुतय्तगु हिनामिना जुल । यक्को सम्पतिया भ्रष्टाचार जुल । जंगलया याक्वप्वा: पत्तिं जुयाच्चंगु हिनामिना व भ्रष्टाचार विरुद्ध अभियान मन्ह्याकं जंगल सुधार जुइ हे मखु । थ्व अभियान सफल मयासें त्व:ते हे मखु ।”

थुगु जोशं जा:गु गर्जनया फसं जंगलया सिमाह:त भचा भचा सन । तिताधुं जंगलया जुजु जुइवं वया ज:पिसं नुग: तफा: याना: सत्य खँ कना:

भविष्यवाणीया सः थ्वयेकल । “जिमि कायूयात थ्वया जन्म जूबल्य् हे जोशीं धाःगु दु । थ्व मचा भविष्यया जंगबहादुर हं । थ्व खँ ला कँ हे मकना नि छिकपिन्त !” थः मांया घोषणां तिताधुँ चचं धाल । न्हापा व भतिचा खाखः, लिपा वया खाखः भाय् नं बांलाना वल । वं थःत जंगबहादुर हे धायेगु ययेकल । तर जंगबहादुरया उदय जूगु पलाःख्वाँय्चिं खः धाये ला, गय् धाये ! जंगलया छगू बियोग हे खः । नुगः मछिंगु खँ जंगबहादुर सहलहय् असफल जुल । इमू व कुमिचातय्सं कुमचायेक दयेकातःगु छें ध्वारारं दुन । रानी राजेन्द्रलक्ष्मीयात म्हुतुप्वाः तिकेत कोत पर्वया थांचा हानं छक्वः धस्वात । भिजांमिजालं सुलि पुयाः फुक्क जंगलवासीतय्त कय्कय् कुंकाबिल । गुं जंगलया सिमा सिमा पत्तिं सि व बुंस्वां नं भवाः जुजुं वन । अज्ज सिमाहःत चिकुलाया च्वापुं भुन । त्वहंचाया त्वहंचा चात्ता वानाच्चंगु खुसिबगः छ्यातां च्वन । भराय् भराय्मागु सिमात सिंग्वं जुयाः थस्सः पायाच्वन ।

खः जंगल छगुलिं त्वपुक नये त्वनेया मन्दी ब्यानाच्वन । अले आरोप हे वी म्वायेक गुंफातय्त आरोप लात । जंगलघाती ! अजंगली तत्व । जंगल छगुलिं छुँचा व भौचिया ख्याःकासा यानाः म्हिताच्वन । धधःस्वानाः छ्यं ल्त्वनाच्चपिं घाँय्, फाःपाः थस्सः पायाच्वन । बालाबाला चिंगु किसिघाँसं किकाः किकाः चल्लातय्सं सिमा कचाय् हुस्लुं पुयाच्चपिं भुतिमाकःतय्त न्यनाच्वन । जंगबहादुर तापालय् वन धाःगु न्यना । वं छु म्ये हालाः लिहाँवइ थें ल्हाः ? छं सिमां खनेदइ निं ! लिहाँ वयेवं जिमित नं कँ न्हिं ।

“जिमिसं जक छु खने दइ धाये । तापालय् धयागु ला भीगु जंगलया तःले लाः धाःगु न्यना मस्यु आः न्हापायाम्ह जंगबहादुरं बेलायत वनाः राष्ट्रिय म्ये धकाः “राजमति म्ये हालाः बेलावत्ति मैयात प्याखं ल्हुइकावल ।” आः थुम्ह कलीयुगया जंगबहादुरं अमेरिका वनाः छु म्ये हालावइ जुइ ! □

(“सामुदायिक पत्रिका”/वर्ष १ त्रैमासिक, वि.सं.२०५९ भाद्र / ने.सं.११२२ गुंला/अंक २/सामुदायिक अध्ययन केन्द्र/पेज १३-१४)

जिमि बाउचा

“जिं बाउचालिसे छाया ब्याहा यायेमज्यू ?”

थुकथं ल्वहँतं थनातःगु शिलातताया माया मतिना दबूया लु जुयाः ह्युह्यु वन ।

“आखिर जि नं ला छम्ह मनू खः, मिजंत जक सितु, मिसात घाँय् !
..... धात्यों वरु सितु ला घाँय् खः । गुँघाँय् हे जूसां न्ह्यागु घाँय् हे जूसां
उकय् नं स्वां ह्वः । सितु घाँसय् आःतक स्वां ह्वःगु जिं मस्यूनि । मखनि ।”

थुकथं शिलाततां नुगः क्वातुक्क कःघाना काल ।

“जि कःलि मखु, जि बाभः बुँ मखु । जि उर्वरा चा खः । जि सि सयेफुगु
मा-सिमा खः । अले सुयां जीवन लुधनावीत थःत जिं छाया पायेमज्यू । जि थःगु
जीवन जक मखु, सुयां जीवन – स्वां नं ह्वयेके फुसा ।

ख ला बाउचां जितः स्वयाः मेपिं नःलिपिं ल्यासेत ययेकूसा ययेके फु ।
मिजंतय् थः स्वयाः क्वकालिपिं मिसात इहिपाः यायेगु चलन । अथे ला जिं
सीकं हे थः स्वयाः थजिस्वाः वःपिं गुलिसिया इहिपाः यानातःगु दु । हुं चुकय् दुने
च्वंम्ह सिद्धिनाराचिया काय्या हे थपाय् ग्वाराम्ह मिसा, मां हे धाये ल्वयेक
ह्वनाच्वन । लाय्कुलिइ दुथ्याःम्ह सुब्बाया म्थ्याय् हं । कोसः यक्को खाकाः
बियाहःगु । अज्ज ला जिलाजं जुइम्हेसित धाःथाय् जागिर नकावीगु हँ ।”

शिलाततां मप्चसें मज्यूपिनिगु आगं प्वप्वन ।

“हानं उ का, व काजिमानसिंहया भौं नक्कलिचा हे का, भिंस्वदं भिंप्यदं
जक सिबय् छु दइ । धेवा यक्को दुपिं, च्यः भ्वातिं हे ग्वाःग्वाः दुपिं धकाः
बियाहःगु मखु ला । व बुद्धिमांचा जि हे ज्वःम्ह ला खःनि । थः हे भ्वातिं नाप
जुल धकाः वयात सुनां मस्यु । प्वाः व्यकुं च्याये धुंकूम्हेसित धेवां पर्काः गामय्
लित छ्वःगुला खःनि । अथे ला छु थीमत्यः हे मजूनिम्ह गोमय्जुयात
न्हेय्दं दुम्ह ज्याथःलिसे प्वकतां जीवन हने मायेक महाद्यःया सराः फया
च्वनेमाःगु समाज । थन छु ज्यू, छु मज्यू । सकतां ज्यू ।”

शिलाततां मतया लिक्क व्वयाच्वंम्ह कीचित माय्बिलिचां मिखा दिकाच्वंगु
खनेवं छाया खः मस्यु, वया नुगः हीचाल ।

“जिं बाउचित भुजियात थें लाये त्यनागु ला ख हे मखुनि । जिं वयात माया यानागु हे न्या लायेगु जाः प्यनेत मखुनि । तर अय्सां गय् गय् वयाके जिगु आत्मियता दत । दं दंया स्वापू थें । बैसं बैसनिसेंया थः थें ।”

शिलाततायात वया मांया शंकां स्वयेगु धकिं तयाः पत्तुमत्तु पंकाच्चने मायेकाबिल । अले व मचायेक ह्यामि जुल ।

“खः का वया मां मदु । अबु अय्लाःगुलु । तताम्हेसिया भाःत न्ह्याबलें जिल्ला जिल्लाय् खते जुइमाःम्ह जुयाः वयात लहिना तःगु । ख ला, वया ततायात पिने खँ ल्हाः दु । तर वया तता यःम्ह हे थजुइव्यु रे, जितः छु च्यूताः माःगु दु ! जितः वया तता वा वया तताया भाःत नापं स्वापू तये मालं ला ।

..... तर गथे गथे ?, त्वाःबाःयाम्ह जूगुलिं जिं वयात वःचाधिकःम्ह जूसांनिसें हे म्हस्यू । अबलय्निसें हे वया प्रति जिगु माया क्वसाः । वयात खनेवं नुगः हे खुल्ल मिनावइगु, न्हापाया जन्मनिसें हे स्वापू दुम्ह मिजं थें । मामं छु स्यू ? का, व वइगु हे मांया मयः का । वयात मचा कथं जक विचाःसचाः क्यनिगु हे मांया लागि-मिगि ब्वलनावः । छु पहःयाम्ह मां जुइ !”

मां लुमनेवं हे वया मिखा मां द्यनाच्चंगु कोथा पत्ती भवय्प्यू वन । वं मचायेक हे वया मां द्यनाच्चंगु कोथाया खापा तिनाबिल ।

“जिं बाउचित गबलें हे नुगःया कतांमरि दयेकेगु विचाः यानागु नं मदु । न कृष्णया राधिकापिं थें उँइ चायागु हे दु । छु जि येच्चाः खिचा जूसा बुरिकन्या धायेकाः च्वनी ला ? उहू सा !”

शिलातताया मिखा हाकुगु गाउन फिनाः अंगलय् यग्गाना च्वंम्ह थःगु किपाय् जुत ।

“खः जि थौं पोष्ट ग्रायजुयत जुयाः छम्ह अफिसर जुइ धुन । थःगु तुतिं चुयाः स्वाये सयेधुन । सकसिनं हनाबना तयेके सःम्ह जुइधुन । तर जितः थः नालाः हनीम्ह सु दु ? कि आखः छगः हे ब्वनामतःपिं पदमुख्तय् जातः वल । कि कलाः सीपिं मिजंत चूलाके हल । धेवा जक दयां ला मज्यू नि । जि सुयां चिप ला मखु नि । जि सुनानं वांछ्वःगु चिपजा नयेगु कर्म ज्वनावइम्ह मिसा ला मखु नि ।”

शिलाततां स्वाभिमानया हाथ्या बस्वास्वां नुगल्य् खँ स्वानायन । अय्सां मचायेक थ्वःगु वया सः जक न्यनेवं फुक्कसिनं वाः चाइ वया नुगल्य् हीमी चाःगु पलाः द्यतनाच्चंगु दु ।

“जि ईया लँ त्वाःल्हानाः छत्थुं निम्ह प्यम्ह न्त्यसुमस्तय् मां जुइ मयः । जि बाभःबुँ मखु । अहो ! थ्व गज्याःगु विडम्बना ! जिगु बैसया न्हापांगु न्त्यसः सन्तान छ्यापं कायेगु बनेज्या ला मखु नि । कि कतःया मस्त नालाः मदर टेरेसा जुइ माल, कि दाजु व पीभतपिनि कःघाये मफुपिं मस्त कःघायेत अनाथालयया मेट्रो न जुइमाल, का स्व रे धाःगु –

जिमि मस्त नं छं हे मस्त ला खःनि हं । फैत थें ग्वाःग्वाः मस्त दयेका तल, थम्हं कःघानाः ब्वलंकातये मफयेक । जिं आखः ब्वनागु इमि मस्त ब्वलंकेत ला मखुनि । जि अफिसर जुयागु इमि मस्त नालाः थःगु बैस कूजीकेत ला मखुनि । खः का दाइया मस्त जि भिंचापिं खः । नातां भिंचा जुल । बैसं इपिं जि स्वयाः मस्त जुल । नत्र इपिं सू सु का ?”

शिलाततायात थःगु जीवन तःकेहँया निम्तिं जाल्य् क्यनाच्चंम्ह लुँख्यँय् थ्वइम्ह ह्वेलन्या कथं जक व्यवहार जुयाच्चंगु मतिइ वल । अले व थः हे माकःचिया जाल्य् तक्यना च्वंम्ह मनू थें हीमी चाल ।

“मखु, इमि नियत हे मभिं । इमिगु माया हे कतिलाःपाकः । वास्तवय् जि कमाइ दयाः जिगु सम्पति थ्याकं कायेत हे भिन्वा नायेकाः जिथाय् थ्यनेहःगु हे धर्मपुत्र नायेकेत । अहो, जि इमि संचयकोष ला मखुनि । इहिपा याःसा जि जक छु सन्तान मदइ ला ? इमि स्वयेबलय् जि ला थारि मिसा हे जुल । सन्तानहीन हे जुल । अहो !... इहिपा हे मयायेक सन्तानहीन जुइमाःगु थ्व गज्याःगु आरोप जितः ।

मखु, केहँ धकाः, म्ह्याय् धकाः थःथिति धकाः सुनानं जितः जीवन पासा चूलाकेत कुतः याःगु दु ला ? आः ला मां खनाः नं तं पिहां वः जि । का स्व रे बाउचा वलकि तं पिहां वः धयागु नं जुइ ला ।

मस्यु, छु बिचाः वया ! ? लाःसा वया तताया चालाबाला बांमलाः धकाः वसिघः तछ्याना जूगुलिं बाउचा नां कायेवं घच्चानाः तं पिहां वःगु ला । तर व खँय् बाउचा नाप छु स्वापू दु धकाः ? ख ला वया तताया नं अपाय्चः दोष मदु थें च्वं ।”

दोष व निर्दोषया वकालतया भवलय् वं बाउचिया जिचादाजुयात लुमन्तिं सालाहल ।

“सोभा धायेवं मिजं जुयाः ल्यासेम्ह कलाःयात दं दं याकःचा वानातये धयागु छु न्त्यप्पु । लाःसा पाकःख्वालं पुयाः स्वकः कौला जकं यानाच्चंम्ह ला । मिजंतय् छु भाः ? हानं भीगु धार्मिक संस्कार हे मिसा क्वत्यलेगु । अथे जूगुलिं हे मखु ला महादेवं सराः बीकाच्चपिं नच्चापिं ल्यासेत सुलाः सुलाः भाःत माः जुइगु । खः..... इहिपा याये धुनेवं नःलिपिं भौमस्तय्त वानाः ल्हासा वनीपिं बंजाःतय् नं वहे गति । गुलि अशिक्षित मिसात मचाबलय् इहिपा जुयाः तःधी जुइवं भाःतं मययेकाः अथे हे छेकुलुब्यां जुयाच्चंगु दु । न इमिसं थःगु तुतिं हे चुइ फु न इमित बिचाःसचाः व हनाबना हे दु ।”

हलिऊडया कलाकार मय्जु फोविकेट्सया किपां छाय्पियातःगु तिथिपौ स्वस्वं शिलाततां बिचाः यात । –

“खः जि सुइन्यादं दत का । म्हवसःया ला भचा हय्हय् कुन का । अय्नं ख्वाः ला अपाय्चः ज्यथि मखु नि । अफिसय् नं पिउन्निसें कयाः सचिव तकं जिलिसे प्रभावित । इमिसं जितः गबलें हे ख्वाः थुस्स तयाः व्यवहार याःगु धयागु मदु । का स्व रे, जिमि मामं हे धाःगु – कृष्णमाया तता, जिमि तःमां पीनिदं दुबलय् बूगु हं । गुलि बल्लाःम्ह बुरि धाये व । क, जिगु म्हगः नं ला भ्याः हे छ्वासु मजूनि । उकुन्हु बाउचां लय् नाप लानाः छेय् व्वना यंकूबलय् चान्हय् न्त्यः हे मवः । ख ला बाउचां अथे धाइ धयागु मतिइ हे मवं । अथे भनं नालाकाइ धयागु म्हगसय् तकं गबलें मम्हं । अहो व खं लुमंलुमं म्ह छम्हं तां न्वयाः हसंमसं धाल । हितिपवः चायेकाः भवाररं म्वःल्हुया । हुस्तुं पुया थें याउँसे च्वन, ख ला म्हगः म्हीग हे जक तिनि म्वः ल्हुयागु खः । अय्सां माःरि खिति तुइका च्वना । याक्वय्, कालय्, अले नुगःपाय् ला हे च्वतुला वःगु ला मस्यु, भ्वइसे त्वइसे च्वंगु सालुक्क सालुक्क खिति तुलावल । म्ह छम्हं हिइसे च्वसां याउँसे च्वं । चासुगु कचिघाः प्वले थें । म्हहुसा टावेलं अथे जितः वातां स्वयाः न्हिलाच्चन । जितः पचिं हे न्हाय्कं धुछिं दं वने मास्तिवल । “अय् छंके ला ला छकू हे पाः मजूनिका ।” धकाः जिगु म्हबांन कनाच्चन । जिगु म्हबां मुसुहुं न्हिलाहल, स्वप्पवलं ततःहाकः सासः ल्हानाहल । स्वांस्वां सासः ल्हाल्हां मुसुहुं न्त्यूगु जिगु म्हबांया ख्वाःपाःचा स्वस्वं जि थः हे

मछाल । जितः थःगु पाल्हाः निप्पां स्वानाः खाः त्वपुइ मास्तिवल । खः जिं अबल्य् छत्थुं इक्कुसे चवनावःगु खाःपाःयात त्वपुनाः थःत प्वःचिनाच्चवना ।”

शिलातताया खाः त्वपुना चवना नं वया मिखाय् बाउचिया खाः जक भवातां भवातां दनाच्चन । भवातां दनाच्चंम्ह बाउचां भुमिया स्वां पुयाः वयात मिखा तिसिका बियाच्चन । अले शिलातता म्हगसय् थें मचायेक हालाहल ।

“..... हानं जिं बाउचालिसे इहिपा याःसां समाजं जितः मोहन यात धाइगु खःला ? लँय् जूपत्तिं वया पासापिं सकसिनं ‘माखां त्यः’ धकाः हिबाय् चबाय् याइगु खःला ? अँय् धाःसा धालका प्रजातन्त्रय् मिसा मिजं निगू जातिं समान धाइगु । मिजंतसें थः स्वयाः गुलिखे क्वकालिपिं अभ् म्थ्याय्, छय् धायेल्बःपिं सन्तानया निम्तिं धकाः ब्याहा यानाः मचा बुइकेज्यू । जिं जितः ययेकूम्ह मिजंनाप ब्याहाः याये मज्यू ला ? व नं जिगु बैस जक गन वन धकाः ? जिं हिप्नोटाइज यानागु नं ला मखु नि । बाउचां हे जितः ययेकूगु । जिलिसे जीवन हनेत वं आःतक इहिपा हे मयासे च्वंच्वन धाःसा..... ।”

धात्थें मचायेक शिलाततां सुदर्शना माः वंम्ह बिरूपाक्ष महाराज मसीक थः मांनाप हे चच्छि द्यंगु बाखं लुमंकाहल । वया नुगः छक्काः नसंफात ।

“अहो ! थ्व ला मत्यः । थःम्हं हे किजापुजा यानाः माया यानाः तयातइम्ह मचायात आः गथे यानाः स्वापू तयेगु, व व जि ला बैस हे पाः । दँ हे पाः । मखु मखु....., आः ला, गुलि हे पाइ धकाः ? व जिलिसे । अप्वलं पाःसा प्यदँ-न्यादँ जक सिबे छु पाइ । न्हापा मनकामना वनावलय् धकाः बाउचा मचा । आः ला बैसं गाये धुंकूम्ह ल्याय्म्ह । थनं लिपा ला छु व बाज्यः वनेत छु बेर । न्ह्याबलें ज्या, न्ह्याबलें ज्या जक याना च्वनीम्ह । भासु हे गबलें फी म्वाःम्ह । तर वया भावना, वया माया, वया मतिना न्ह्याबलें नःलि जुयाच्चनी । खः वया माया आः नं बाउचा थें क्यातुसे च्वनि ।”

म्वायेगु दर्शन सुधार यानाः थःत भिंकेगु लँय् न्यासि वनाच्चंम्ह शिलातताया याकः जीवनं थःगु व्यक्तित्व मान मर्यादा सुरक्षित मज्गु चायेकल ।

“धात्थें थौं बाउचा कुरिलया च्वका । थौं व जि स्वयाः नं धिसिमिसि धायेक सक्षम । खः, बरु व जि थें आखः मसः । व पोष्ट ग्रायजुयत मखु । व अफिसर मखु । जितः लुमं, न्हापा जितः पँय् नं ल्हाःवःबलय् जि स्वयाः अप्वः व्वनातःम्ह जूसा जक ज्यू धयागु । थुकथं स्वयेबलय् बाउचां जिलिसे गबलें जीवन हने

फइमखु । तर न्ह्यात्थे थजु, मनूत शिक्षित जुइगु व योग्य जुइगु धयागु हे म्वायेत व समाजय् छम्ह सक्षम मनू जुयाः क्यनेत खः । थुकथं जि अफिसर ला खः । जितः यक्कोस्यां सलाम याः । न्ह्याबलें गाडिं छेंय् तःवः । गाडिं अफिसर वनेत काः वः । तर गाडिं जितः थथ जक स्वकेबियाः क्वछुनाः सुयातं स्वयेगु नानिचा हे बुलुकाबिल । जिगु थ्व थस्वः छ्यनं जिगु थःगु मिसा अस्तित्व हे बुलुकाबिल । जितः जिं हे तंकाबिल । धात्थें जि सु खः ? जितः सु माःगु खः ? व ब्याक्कं जिगु बैसलिसे तातापाका यंकाबिल । तर बाउचा, जिलिसे ससतिना वयाच्चन ।

शिलातताया न्हाय्पनय् बाउचिया इनापं जाःगु सः थ्वयांतुं च्वन ।

“शिलातता, छु थें जि नं आखः सःसा गुलि ज्यूगु ! अंग्रेजी भाय् छगू जक बांलाक्क च्वयेगु व खँ ल्हाये सःसा जिगु व्यक्तित्व हे विस्कं जुइगु । जिगु फ्याक्टरी व बिजिनेस हे थ्व स्वयाः गुलिखे च्वन्ह्याइगु जुइ । धात्थें ला शिलातता थें ज्वःम्ह पार्टनर छम्ह जक चूलाः वःसां गुलि ज्यू” धयागु मतिइ तर थज्याःगु व्यापार सकसितं ययेमाः धयागु मदु ।

ज्यासः विराटनगरय् जूसां येंय् नं थ्वया मूकचा छगू चायेके मास्तिवः । थय् जूसा फ्याक्टरी नं कःघाये फइ । थ्व येंया छें नं कःघाइपिं दइ । जितः यें त्वःते मास्तिमवः ।

“खः उकुन्हु बाउचिथाय् च्या त्वंवनाबलय् वं थःगु नुगःखँ ब्वःगु जितः भव्यभ्वय्प्युनि । ख ला छु धकाः थ्व अफिसरचिगु जागीर । थौया अर्थ विकास जुया वनेमाःगु जीवनय् जि अजाःगु मन्त्रपाखें बर्जितम्ह मिसा । जि ला खालि भ्वंतय् सही तयेत श्रृजना यानातःम्ह छम्ह अफिसर । थ्व अफिसर दर्जा ला समारोहया बाय्चय् यग्गाना च्वंगु छपु हुपचा जक हे खःनि । जि ला ग्वय्छाः सिँइ स्वच्चानाच्वंगु छपु तथूगु नकिं जक हे खः नि । पिनें धिसि लाः, दुनें जि खतं नयाच्वंगु दु धयागु सुनां छु स्यू ।

थथे बिचाः याना च्वं च्वं न्हापां धस्वाःगु वया दुगःक्वय् आः चाःमाः तुला वं थें जुल । अले ई-ब्यः लकस व व्यवस्थायात छक्कः भ्वय्कनाः स्वत ।

“अय्, शिक्षा व योग्यता चूलाकेत छम्ह मिसां थःगु बैस, थःगु जीवन किलं वनिगु कथं बरः तयेमाःगु गज्याःगु विवसता । ग्व, थन मानव हक ? समानता ! गबलय् जुइगु थ्व देशया विकास । थन न्ह्याक्को आमूल ह्यूपाः हये

धाःसां न्ह्याक्को ह्यूपाः वःसां व हे व्यूरोक्राएसि । सचिव ला छु छम्ह पिउनया व्यावहारिक प्रकृया तकं हिलेफुगु मखु । उकिं थन सम्बैधानिक सफूया बुंदात 'किपा थम्हं हे न्ववाइ' धयागु किपा ब्वज्या थें जक याना च्वनेत महाद्यःया सरालं भूचाःगु परम्परा हे हिलेमानि । धेवां कतांमरिया भ्वातित न्याये दतले नारी शिक्षा व नारी योग्यतायात कदर जुइ हे मखु ।”

तर थथे विचाः यायां हे शिलाततायात ज्वलय् हे छगू म्हगसया गां प्रादुर्भाव जूगु आभास जुल ।

“खः बरु ई-व्यःया बैसलिसे स्वापू मदु । न वया जात हे दु, न वया कवय् धर्म हे दु । मतिना नुगः दुनेया स्वापू खः । उकिं बाउचिया जि लिसेया, जि बाउचालिसेया तापाः सत्तीया न्ह्यसःया लिसः मदयेक कुलां थें छस्वा जुयाच्वंगु दु । धात्थें बाउचा जिगु निम्ति हे श्रृष्टि जूम्ह खः । वं गाक्क ब्वना मतलं छु, जि ब्वना तयाम्ह जुयाः नं व जि स्वयाः सक्षम जूसा । न्ह्याबलें न्ह्यागुलीसं मिसा मिजं स्वयाः मिजं मिसा स्वयाः कवय् च्वनेमाः धयागु हे छु दु । जि स्वयाः सः स्यूम्ह मिजं नालेगु जिगु उगु फुस्कुलुगु अहंकारयात जिं हाकुतिना छ्वयेमाः । यदि बाउचालिसे जीवन त्वन धाःसा जि वया अभावया पूर्ति जुइ । देगलय् गज्जु छुनावीगु जुइ ।”

खः म्वायेत अक्सीजन जक दयां छु याये ? हाइड्रोजन नं उति हे माः । H₂O = लः खः, ल्वहं मखु । लः धकाः न्ह्याये फइ, ल्वहं न्ह्याये फइमखु । जि व बाउचा जिमिगु जीवन रुपी निगू खुसि-सि कःघाना च्वंगु खुसि धाः । लः छु मखु । लः खुसि खः । लः समुद्र खः, सागर खः । अले लः आलंया पचिंयात छायापिया वीगु सुपाँय् खः । लः श्रृष्टि खः, कला खः ।

थुकथं विचाःया कय्कुं हुस्तुनय् चाःचाःहुलाच्वंम्ह शिलातता जीवनया आजु च्वकाय् थ्यंम्ह थें फय्लिंचा जुयाः लय्लय् तायाच्वन । सुनां नं कुचुकुचु याकाबिया च्वंम्ह थें व थःके हे मदु । वं थःत भुमिं पाचिंका बियाच्वन । अले उगु सुख लय्ताः थः सत्तीम्ह पासायात प्वंकाच्वना नं छम्ह बाखंच्वमिं बाखंया चरमसिमा तिफ्याये मफु थें छगू जटिलताया न्ह्यसः छुइकथं कन्नाया खँग्वः न्ह्यब्वब्वं पलाः न्ह्याकल ।

“जिं थौं सुथ न्हापां हे जिमि बाउचिथाय् वनेगु क्वःछिना । मां, दुने क्वथाय् फुँइफुँइ न्ह्यः वयेकाच्वन, मामं मचायेक टेबिल दराज चायेका । आलमय्

छाय्पियाच्चंगु सुपाँचं वा वयेकाः जगत उद्धार यायेत बुगच्चवं थें मांयात मिखा
पीकाः जि जिमि बाउचिया छेंय् वनेत पिहांवया ।.....

अहो..... ! सुथ न्हापांया फय् गुलि सिच्चुसे च्वं । जिगु नुगः सुथ न्हापां
दनाः सः थ्वयेका च्वपिं चखुंबखुं थें चंचं धाः । जिगु पपू भनभन चकनाच्चंगु
जिं बांलाक चाल । अले जि चकिचकि नःगु भुतुमालि जुयाः आलं ततःजाः
यानाः न्ह्यानाच्चना । पस्ताभव्य् न्याःम्ह जि न्या काले ला ख्यँय् काले ला
जुल । तापाकं हे बाउचिया छें जिगु मिखाय् टेलिलेन्स छुनाः न्ह्याःन्ह्याः वल ।
तर जिं म्हगस पिच्याके मफु । न्यासि वल्लिसे पलाः न्ह्याक्को च्वःसां जि अनया
अनसं तुं । बल्ल तापालं वयाम्ह लँजुवाः थें बाउचिया बासंछें थ्यनेवं तिनि जिगु
तुतिं भ्यातुगु कु दिकाः सासः ल्हात ।

सासः ल्हाल्हां जिं भासु फीगु ई त्यासा काये तकं मफुनि, सदां सदां
ध्वाका जुयाः चालाच्चनिगु वया लुखाय् नासः तापाःम्ह मेय्यात न्हासय् कौ
घाके थें तजूगु ताःफ्वः यान्तांप्यान्तां यग्गानाच्चन । □

११२२ चौलागा १२

(“पलिस्था”, नेपालभाषा दँपौ/ने.सं.११२०/दँ ८/ल्याः ८/पेज ३-९)

जीवन दुनेच्चंगु मेगु जीवन

नानिमय्जु अजि म्हं मफुत कि काय्म्याय् छय्छुइ दुसां दक्के न्हापां ज्याथःम्ह भाःत निं लुमनिगु वया बानि हे जुइधुंकल ।

ख नं ज्याथः जूसां वया भाःत, वया ल्याय्म्ह ल्यासेपिं काय् म्याय्पिं स्वयाः न्त्यागु ज्याखँय् नं छतिं म्हो मजू । अज्ज ला दुने पिनेया न्त्यागु ज्याखँय् नं वया भाःत हे धिसिमिसि धाःगु खनेदु । कोथा सुचुकुचु यायेगु, पसः वनेगुनिसें कयाः हापु चू लाकेगु ज्याय् तर्क वया ति च्यूताः मेपिनि मदु । खः, छक्वः निक्वः हू वइबलय् धाःसा फ्यासुसे च्वंक धिताहा जुयाः च्वनेयः । अथे ला वया भाःतया छुं चित्तवुभ्ने मजूगु जुइबलय् छवाराक्क हे छवर्म्हया बीयः । थौं नं भचा भचा मफुसां सुथय् नीलः कयाः द्यःदी पुज्याये धुंकाः च्या त्वनाच्च्वम्ह नानिमय्जुया मिखा थःगु कोथाया छचाःलिं ब्यातःगु थःत बियाहःगु क्वसलय् घडिया सेकेन्ड सुइज जुयाः भाःभाः दिनाः दिनाः चाः हुलाच्चन । न्हूधाः यानातःगु भ्वाथःगु सन्हू छगः, ध्वाना जक तःगु थें च्वंगु सालुगु वहःया थुमांचा छपु । अथे हे पितः ज्वःगु लीया देमाचा छपाः । खः ला लिपा पलेसा तयाबीगु भलसा बियाः मुस्या ग्ययेकातःगु खः । तर नँ हे वाये मसःम्ह वयात, लुमसां ल्वःमंका छवयेगु वया बसुन्धरादेवी त्वाय्चिना मतःम्ह मांयात छुं थाकुगु मखु ।

खजा क्यातुसे च्वंगु वैसय् छेंज्या ब्याक्क ठेक्का कयावःम्ह नानिमय्जु सिन्दरेला मैचा थें न्त्याबलें भुतूसुवाः । न्त्याबलें वँ पुइम्ह मैचा । लः काइम्ह कान्छी । वसः हियाबीम्ह तताःजु । अले ज्याला बी म्वायेक ज्या यायेत तयातःम्ह ज्यामि मैचा ।

वया नुगलय् अने अनेगु भावनाया थजाः वःगु अंगलय् खाःचिं खानावइ । सुखया लैंचा तयेगु पाल्हातय् तकुस्वां त्वयेकाः नुगः तफाः यायेगु लुमनावइ । छाय् छाय्, थथे नुगः वायेकु वायेकु वं छत्थुं ल्हाः म्हु च्युच्युं हे वयात सकतां दया वःथें ताइ । थलबल छगः हे, जाकि निगःचा हे मविसें स्वाहाने छुना मतःगु बल्चा थें ज्वःगु छें छखा जक बियाः ब्यागलं तयेकाच्चपिं इपिं थौं सकतां सकतांया थुवाः जुइधुंकल । हिति, चःबि, मत, छें छखां प्लास्टर, स्टीलया

दराज, खाता, कौच, रेडियो, टि.भि., राइस कुकर, प्रेसर कुकर, ग्याँसया भुतू
अले मा:मा:गु थलबल । आ:ला डाइनिङ्ग टेबुल व फ्रीज नं न्यायेगु कुतः याना
मच्चंगु मखु । वया नुगलं ख्यँय् थ्वल । व मख्ख जुल । टि.भि. चायेकल ।

“नेपाली महिला” नांगु ज्याभवः छुनाच्चंगु जुयाच्चन ।

टि.भि.इ अन्तरवार्ता का:म्हं घनाच्चपिं घ:पिन्त धुँपाय् च्याका: थन । हाकुसे
च्चंगु हाप्पः थने थें माइक्रोफोन ल्वसुका: थीथी जिथिपिनि अन्तरवार्ता कयाच्चन ।

अं, छिगु नां छु थें ? “छिगु वने धुँकूगु जीवन गथे च्वं थें ? छिं जिमित थ:गु
छुं खँ कने फइ ला थें ?”

“जिगु नां नोर्बु तामाङ्ग ।”

थ:गु नां न्ह्यर्थेथं नोर्बु तामाङ्गनी जिथिं पाछाइ सुकू खा: ज्याना: फ्यास्यां
नाया: भसुका: ल्वाकज्या:गु ख्ववि ज्वयेकाच्चन ।

“जि न्हय्मह न्हय्मह काय्पिं दु । अय्सां हा:ना: मदु । अनाथ ।”

नोर्बु तामाङ्गनी भसंक वना: थारान्हल । वया खा: स्वस्वं नानिमय्जुया
न्हाय्कं न्ह्य:ने वना: धुप्यने मास्तिबल । तर नोर्बु तामाङ्गनीयाके प्यपुनाच्चंगु
वया मिखा वं लिफ्याना कायेमफुत । ख: लागिलागि चा:गु स: दुकयाच्चम्ह नोर्बु
जिथिं ख्व:स: इला: न्हाय् थुइँथुइँ न्यायेका: हिकुहिकु लनाच्चन । फोहर ट्याङ्ग्य
वांछवया त:मह मचा थें विभत्स जुया: वं वयात न्यंगु न्ह्यसलय् लिस: स्वानाच्चन ।

“ग्व आ: जीवन गथे च्वं धाये ! थुगु बैसय् छु जुल ? गय् च्वं ?” धका:
सुनां बिचा:सचा: याना: न्यं वइ ! थ: हे ज्या सने मफु । फ्वं तकं वने मफु ।
प्वाथय् पित्याना वइ । थथे म्वाना च्वने स्वया: बरू गुलि फत उलि याकनं
सिना वने हे भिं जुइ । थथेभनं म्वानाच्चनेगु ला सरा: हे जुल ।”

सरा:या न्यव: घानात:मह नोर्बु जिथिया बाखनं म्हुतु जायेक लिस: फयाच्चम्ह
न्ह्यस:मि मिसाया ल्हातय् म्हु चिनाच्चंगु माइकया खा: मेथाय् धेय्चू वन ।
छम्ह सियुम्ह लाछि खिचां प्यत्तु प्ययेका: घय्घय् पुनाच्चम्ह छम्ह जिथि । गुगुं
छगू अपराधया भाकाय् करंवरं पुलिसयात बयान वियाच्चम्ह छम्ह लँजुवा:
अजि । थ्व लु स्वस्वं नानिमय्जुया नं न्हाय्पं तिस्वात ।

“जिगु नां इन्द्रकुमारी ख: । जि मचाबलय् इहिपा जुल । जि मचा मदु ।
मचा मदुगुलिं हे जिमि माजु ब्वा:जुपिनि जित: मय: । जिमि भा:तं नं हानं मेम्ह
व्याहा यायेदइगु जूगुलिं थ: मांब्वापिनि हे पँ लिनाविल । अय् धयागु जित:

मययेका हल । जिमि न्ह्याबलें कचवंया धुं च्याइ । उसुसे चुरोसया ठुट्ठां थें त्वह मदु त्वहःया नँ वयाच्चनी । लिपा जिमि भाःतं जितः छें पितिनाहल । थः छेंय वयाः चवंया । मांबौपिं दतले इमिसं जितः माया यानाः लहिना तल । लिपा किजापिनि, भौपिनि जि मछिना वल । मुनातःगु धू थें ताल । आः जि सुं मदु । थ्व दुनिं, थ्व खिचा नं भी थें हे जाःपिं प्राणि खः । वरु थ्वं जितः माया याः । जितः मत्वःतू । उकिं जिगु दुने सुलाच्वंगु भावनाया जलं थ्व हे प्राणियात खःवन । जि लुधं । जि साःप लुधं ।” नानिमय्जु वातां च्वन ।

माइक्रोफोनया छ्यनं मेगु सः थ्वल ।

“अय्सा छि, सुं मदयाः नं लुधं का मखुला ?”

इन्द्रकुमारी इन्द्रायणी अजिमा द्यः थें जिग्रिंक च्वंकाः हालाहल । नानिमय्जु थारान्हल ।

“लुमधनां छु याये ले ? मनूतय्के माया हे मदु । आः दुःख लुमंकां गुलि जक खयाच्चने । ज्याथःजिथि मजुनिबल्य ला अथे धाःसा । थः सन्तान दुसा धकाः ले ।”

माइक्रोफोनया छ्यं अतिकं लिमलानाच्चन । वया छुच्चा म्हुतुं जवाःसवाः यानाच्चन ।

“मचाखाचा दयेवं तुं जक ज्याथजिथिपिसं मांबौपिन्त माया यानाच्चनी ला ?” थ्व खं नानिमय्जुया खाः ह्याउंसे च्वन ।

इन्द्रकुमारीयात माइक्रोफोनया न्यतालय् च्याराक्क दाये मास्तिवल ।

सन्तानया आशा हे थ्व हे खःनि, नत्रसा सन्तानयात जन्म बियाः ब्वलंकाः तःधी यानाया छु मतलब । नानिमय्जुया छ्यं ल्हुकुल्हुकु सनाहल ।

अन्तरवार्ताकारया माइक्रोफोन आः छम्ह हाःनाः मदुम्ह कनियाथाय् स्वत ।

“छिगु वंगु जीवन गथे च्वं ? छि गथे जुयाः मिखां मखंगु ?”

ख्वये नं मसः, न्हिले नं मसःम्ह मिखा निपां मखंम्ह छम्ह जिथि । साहिली क्षेत्रीनी । न्हापा वया भाःत नं दुगु खः हँ ! न्हापां छम्ह मचा दयेवं हे वयात वया भाःतं बैसं वानावन । आकाभाकां सुम्क म्हिताच्वंम्ह खराचायात गिद्धं दाया यंकू थें । सुयातं छुं धाये नं मफुत । सुयातं छुं कने नं मफुत । अबलय्निसें व ख्व नं मख्वःगु जुयाच्चन । वया थः हे याकः काय् वया लाहि हे इहिपा सिधयेवं बिसकं च्वंवंगु जुयाच्चन । वया म्हुतुं भसुकाः पिज्वल ।

“छु याये आः । म्वाणा च्वंतले नये हे माल । धेबा दुहां वइगु छुं मदु । हुं पाखाया च्वय् च्वंम्ह माहिलीचापिनि ल्वहंया कलघरय् ल्वहं छ्याः वनिगु । जि नं इपिलिसें ल्वहं छ्याःवना । ई छ्यायेत व प्वाः छगः जायेकेत मज्यू मजू थें ताल ।

छन्हु न्हापा लिपा थें ल्वहं छ्यानाच्वनागु । थःम्हं छ्यानाच्वनागु ल्वहं कुचा छकुचा तिन्हुयाः मिखाय् कल । घाः नं तकू मजू । अय्सां गय्गय् लिपा मिखा पाके जुयाः मिखां हे मखनावन । छु याये मय्जु । काय्या च्यूताः मदु, भौया च्यूताः मदु । जिगु दुःख जिके हे जक दु । अं, वरु छक्वः निक्वः हू वलकि अथें हे म्ये हालेवइगु । अबलय् जिमि काय्या बौ जिलिसे म्ये हालाः केलेहें मिखा कनाः स्वयाच्वं थें मतिइ लुइगु ।

साहिली क्षेत्रीनी सुनानं गिजे मयाकं हे ख्वाः ह्याउँसे च्वंकाः वं उखेथुखे स्वये मसःम्ह बुख्याःचां थें ल्हाः चकंकाः धस्वानाच्वन, अले आलुयाम्ह कतांमरिचां थें मिखा फुसि फुतिफुति संकाः कनाच्वन । वया मिखा ख्वबिं प्यात । मिखा फुतिफुति यायां त्वलहं च्वच्वं हानं खिरर न्हिलाहल ।

टि.भि. स्वयाच्वंम्ह नानिमैया अजि छाया छाय् स्वं हे चिप्वः जुयावंम्ह थें भुगलुं च्वनावन । टि. भि. मस्वसे अङ्गल्य् यग्गाना च्वंम्ह वया भाःतया किपाः न्ह्यःने वनाः मिखाय् जायेक ख्वबि तयाः छुं धायेत्यंम्ह थें वातां च्वन । वया भाःतया ख्वाः ह्याउँक च्यानावल । अले छथुं लागिमिगि चायाः कलाःयात न्वात ।

“छु पहःयाम्ह बुरि छ । थथे नुगलय् खँ ल्हाकां जी ला ? छाया, छु जुल ? स्वः का ख्वालय् चःति नाःनाः वयेक ।”

वया, वया भाःतया दुःख पिकयाः चितासू मदयेका तये मास्ति मवः । वं थःत थःम्हं त्वपुल ।

“मखु, छुं मखु । सत्य, छुं मखु । व टि.भि.इ क्यंगु धाथें खःला धकाः जक छक्वः मतिइ वःगु ।” □

(“नेपाल” ऋतु पौ ने.सं.१११९ हेमन्त/दँ ४७/ थ्यंल्याः ८८/पेज : १४-१५)

खिचात व धोंत

“बाखंसां, चवखंसां न्ह्यागुसां नं थ्व न्हूदयात छपु च्वसु बियादिसँ” धकाः म्हःवयाच्वंगु ताः दत । ग्व, छु च्वये छु च्वये ! जितः धाःसा थःगु जीवन खनाः हे साःप वाक्की वयाच्वंगु दु । जिगु नुगः खँ, ग्व, सुयात कनेगु ? सकलें अथे हे खः । सु ज्यू, सु मज्यू ! सकलें भिं, सकलें मभिं । स्वःस्वःथाय् इल्ल इल्ल मनूत जक दयाच्वंसां जितः सुं मदु थें ताइगु । नेवाःतय् सांस्कृतिक जीवन तःजि धाःसां म्वःम्वः मनूत जक दुथाय् वनेगु नुगः हे मवं । छायाःधाःसां न्ह्याक्को मनूत इगःमिगः जुइक दुसां अन थः हे मदु थें ताइगु । उकिं मनूयात बाखंचु मदयेकुसे थुगुसी छक्कः पशुतय्गु विषययात कयाः बाखं छपु च्वये ला धकाः मतिइ वन । उकिं हे मचायेक जिगु च्वसां जिगु हे लागाय् न्ह्याबलें खनीपिं खिचात न्ह्यःने लुयावल ।

ख नं खिचात मदुगु संसार हे दइमखु । धात्थें ला खिचात दयाः हे थ्व संसार दुगु खः धाईपिं विद्वानत आः दयावइ जुइ ! “सुख दुःखया छुमां हे खिचात खः ।” थथे नं मनूतय्सं धया वयाच्वंगु मदुगु मखु ।

खिचात नं जात जातयापिं दु । थ्वया जंगली जातत मध्यय् धोंत व गुंखिचात भीलिसे परिचित जू । गुंखिचा धाल कि इमिसं ज्वने लात धायेवं आतापुतिंनिसें सालाः नइपिं धाइ । इपिं स्वये हे छेंक च्वनाः ग्यानापुसे व घच्चायापुसे च्वं । इपिं छल कपत याइपिं जन्तु धकाः जक मखु, धाक्को सिक्को माःपिं तानाशाहया प्रवृत्ति दुपिं धकाः भीसं थुइकाच्वना । अथे ला विश्वया न्यँकं बाखनय् ‘गुंखिचा व फैचा’ या खँ नं भीसं न्यनातयागु दु । – तसकं सोभाम्ह छम्ह फैचा, छन्हु गुं कुहाँ वयाच्वंगु खुसिचाय् लः त्वनाच्वन । उगु इलय् खुसिया च्वं छम्ह गुंखिचा कुहांवल । वं नकतिनि व ल्याय्महचाम्ह फैचा खन । खनेवं हे वया म्हुतुइ इयि बुयावल । धाय्रमय् हे वं त्वापुया च्वः माल । – “अय् फैचा ! जिं त्वना च्वनागु लः छाया फोहर यानाबियागु हां !” वं दोपं बियाः वयात नयेत तोहः चिनाः न्ह्यःने वल । बफरा फैचां सोभा पहलं चकंक लिसः विल । “मखु गय् ? लः धयागु ला च्वं क्वय् धकाः न्ह्याइ । छि च्वय् लः त्वनाच्वंम्ह, जि क्वय् । वरु छिपाखें जक जिं त्वनागु लः फोहर जुइ ।”

गुँखिचाया छु याये छु याये जुल । अले वं खँ हीकल – “अय्सा न्हापा न्हापा छ मबूनिबल्य् छिमि अबुं फोहर या:गु जुइ” धका: ‘मेरो गोरूको बाह्रै तका’ याना: बफरा व फैचित नया हे बिल ।

अथे हे मनूतय्सं ‘भंग: लात’ धायेत ‘धों लात’ नं धा: । जाली फताहतय्त धों थें चंख धाइ । न्यँकं बाखनय् धोंतसें भौयात ब्रम्हू याना: इहिपा या:गु दु । अथेहे ख्व जक ख्वयाच्चंम्ह राजकुमारीयात ‘धोंचित बिया छ्वयेमाल ला धका: ख्याचव: व्यूगुयात जुजु बचं तायेका: जुजुया म्थ्याय् करं म्थया यंकूम्ह धोंचिया बाखं नं न्यना ।’

बरू खिचायात थ:थवय् त्वायेय:पिं जूगुलिं ‘कल: गालय् खिचा’ धका: मनूतय्त व्व:बीपिं नं दु । अले मनूत तसकं बेइमान जुया: पास्याये मत्यलकि ‘वरू खिचात हे मनूत स्वया: विश्वास याये बह:जू’ धका: प्रशंसा नं या: ।

भीसं त्वा: त्वालय् न्यंकभनं लाछि खिचात खं । इपिं छगू त्वालं मेगु त्वालय् वनीबलय् ह्वच्याक्क न्यानाहये य:सां जिगु त्वालय् न्ह्याम्ह खिचात नं च्वनेज्यू । उकिं त्वा:या दुवा:दुवा: पतिं चुक, ननि व बाहा: बाहा:पतिं खिचात ग्वा:ग्वा: दु । ‘अर्गल’ नया: परिवार नियोजन यायेगु इमिगु धर्मय् च्वयात:गु मदु । गुलि फु, उलि खिचा संख्या अप्व: दयेकेगुलिइ इमित राष्ट्रिय सिरपा दु जुइ । उकिं ला लाछि, लाछिइ व गल्लि गल्लिइ वने हे मज्यू । नाइट क्लबय् ज्या याइपिं ल्यासे ल्याय्म्हत थें लँय् हे तत: क्यनाच्चनी । मेगु ला छु धाये, महानगरपालिकां तकं क:घाये मफयेक ला:ला:थाय् खि-चो फाना: फोहर यानाच्चनी । ख नं खिचातसें फोहर याइगु ला जु हे जुल । जिगु त्वालय् बालं च्वनागु छें थें जुइक बासं च्वसेंलि नये-त्वने माल । नये-त्वने जुइवं ला चो-खि फायेमालिगु नं जुल । च:बि सिसिक:क: । मनूतय्त हे च:बि मगा: धा:सां खिचातय्त निं दयेमा: । भीगु छेंय् भीत हे वालापवालां पनेत Kennel Club या दुज: ग्वर: ताना: खिचातय् किपां जकसां दरवानया ज्या बिया: इज्जत तयाच्चनागु दु । Be ware of dog खिचा दु, होस या ! अबलय् व तानात:गु चिंग्वर: खनेवं भीत नां काये मत्य:म्ह थें म्हं चिंक वंका बी ।

थुकथं खिचाया महिमा बय्वय् जू स्वये, छपु खिचाया हे च्वखँ च्वयेगु मतिइ वल । ख नं खिचात गन मदु ? लँय् खिचा । छेंय् खिचा । न्ह्यात्थासं खिचाया खिचा जक । लँय् जूपिनि दथुइ मनूत गुलि दु, धका: न्यिनास्वत धा:सा

यानय् इनिय् जक खनेदइ । धात्थें स्वनिगःया आदिवासी व जनजाति धाःपिं स्वयाः खिचाया मिल्याः (खिल्याः ?) अप्वः दयेधुंकल । आः छुं जुयाः संविधान सभाया चुनाव जूसां उमि उम्मेदवार हे त्यायेफु छु, त्या हे त्याइ । इमिगु विरोधय् आः विरोध यायेगु धयागु हे लोकतन्त्रया विरोध यायेगु जुयावनी । हानं इमित छुं धाल कि हे पशुअधिकारवादीतसें मण्डलाय् वनाः शक्ति प्रदर्शन याइ । लिपा वनाः थनया स्वनिगः थुवाःत थम्हं लहिना तयापिं लाछिखिचा व छेंय् वालं चिनाः त्वःता तयापिं Kennel Club या दुजः जुयाच्चपिं अधिकार व शक्ति सम्पन्निपिं खिचातसें थः मालिकपिन्त हे पितिनी तिनि । अले थिपिं हे स्वनिगः व नेपाल मण्डलया स्ववासी जुइ, आदिवासी जुइ । पुलांगु इतिहास वंखुं जुयाः न्हावनी । न्हूगु इतिहासया ल्वहंपौ धस्वानावइ । उकिं हे न्हापा महानगरपालिकां खिचा स्यायेगु अभियान यानाच्चंगु आः मयाये धुंकल । आःला खिचात नियन्त्रण यायेत ज्वना यंकल कि हे त्वःता हयेवं ग्वाथ्याग्वाथ्या च्वंक ल्हवनाः दादागिरी जुयाः पिहांवइ । जिं न्यना, महानगरपालिकां समाजय् ल्वय् हइपिं खिचातय् छाय् नियन्त्रण मयाःगु ? धयागु न्ह्यसःया लिसलय् महानगरपालिकाय् च्वपिं कर्मचारीत स्वयाः इमिथाय् लहिना तःपिं खिचात अप्वः दु हं । इमित नियन्त्रण यायेगु धयागु हे थःगु हे नियन्त्रण खः हं । क्या फसात ।

धात्थें थन भी नं खिचाया पुचलय् खिचा हे जुया वनी ला धकाः ग्याये माले धुंकल । खिचात तसकं चलाक नं जू । इमिके बौद्धिकता नं दु धाइ । उकिं हे मनू स्वयाः न्हापां खिचा अन्तरिक्षय् वंगु खः । मेगु खँ पुलिस प्रशासनय् नं अपराध अनुसन्धान यायेत खिचात हे प्रमुख जुयाच्चंगु जिं खना । उकिं मनू हबल्दार व इन्स्पेक्टरतसें खिचातय् सलाम यायेमाः । मखुसा अनुशासनया कारवाहीलय् लाइ ।

आः थय् स्वयेबलय् यक्को खिचात दुगु थ्व स्वनिगलय् गणतन्त्र घोषणा जुयाः संविधान सभाया चुनाव व राष्ट्रिय चुनावय् नं खिचात हे मत्याये फु धयागु छुं मदु । अय् जूगुलिं हे खिचातय् ल्यूल् फुक्क राजनैतिक व सामाजिक संस्थात वनाच्चंगु जुइ । अज्ज ला संस्कृति नापं इमिगु नालावने धुंकल ।

थथे खिचातय् वारेय् च्वसु च्वयाः सन्ध्याटाइम्सयात वीगु ग्वसालं खेसायात भिंकाः कापिइ ल्ह्यया च्वनावलय् बहनी अथे हे च्याता त्या हे जक छु जुल

जुइ, जिगु भ्याःक्वसं खिचात प्रलय् जूगु थें क्वाँइ क्वाँइ हाःगु सः तायेदत । गुम्ह गुम्हं लिलिचिलाः ह्वाँउ ह्वाँउ उयाच्वन । नुगः पिपि च्यानाः भ्यालं क्वस्वया । विष्णुमति खुसिसिया लँ जुनाः वःगु खःला मस्यु, आः नं धोंचात परापूर्व कालय् थें थन वःनिगु जुयाच्वन । धोंचात प्यम्ह न्याम्ह हे दु । म्हधू तःहाकः । मिमि धायेक हाकुउं व सियुउंया धूप छायाँ । यच्चुसे पिच्चुसे बांलाः । न्हियपं नं च्वाम्वः बां लुयाः तथ्वाः । निम्ह ति तपिंतां निर्भिक जुयाः मतापय् सुतुसुतु वयाच्वन । त्वाःबाःया लाछि खिचात च्याकु भिकु तापाक्क च्वनाः गथांमुगःया ल्यूल्यू लाय्लाया बुयाः उयाच्वन । लीत्यः लिलाके मत्यः धाःथें । इमित स्वस्व हे जिगु भ्याः क्वस्वःगु फःचा लँय् इमामन्दः कयाच्वन । छेंय् च्वपिं मद्यंनि । मातंया स्वाहाने लवं चाःगु लुखा जुनाः मतजः पिहाँ वयाच्वंगु दनि । धोंचां सिमाय् च्वंम्ह क्वःया म्हुतुइ च्वंगु मरि कुचा कुर्काः नयेगु ग्वसाः ग्वयाच्वन । छायाँधाःसां व छेंय् नं खिचा लहिना तःगु दु । व धोंचा तलय् थहाँ वनीन । जितः छु याये छु याये जुल । लाय्लाया बुइ मास्तिवल ।

तर, नतुसुतु मव्याःम्ह जःलाखःला जूगुलिं म्हुतुं सः पिहांवये मफु । अय्सां आंतय् चायाः जिगु म्ह छम्हं हालाच्वन । भोखाय् ब्वइबलय् आतुर चायाः पिहांवइगु सः थें । तर हाःलिसे ताये मदया वनिगु म्हगसया सः थें । नुगः व म्ह जक अभिनय याना च्वनाम्ह जिं सावधानी बियाच्वनागु नं धायेमफु, ग्वाहालि फ्वनाच्वनागु नं मस्यु । लिपा अनं वः थनंवः मसीक मेम्ह धों छम्ह इमिगु टहरापाखें खिचाया मचा छम्ह वान्यानाः क्यबया भालं पिहांवन । मचाम्ह खिचा प्यकः न्याकः क्वाँइक्वाँइ हाल । अले लिपा अथें हे सः दिनावन । चिल्लाय् चिल्लाय् दनाच्वंगु उगु ई आवां कालं मस्यु, भावां कालं मस्यु जुयाः निस्तब्ध जुयाबिल । छत्थुं जिगु मतिइ सरासु थ्वल – **“आखिर खिचात नं धोंतय् जात खः ।”** जिगु देक्व गल्लिइ निखा ति छेंय् लहिना तःपिं हाकु सियुया धूप छायाँ बांकिया खिचात दु । लाःसा इपिं नं धोंतय् हे संसर्ग ब्वलपिं जुइ । अय्सां नं। □

(“न्हू प्रेष्टिज नेपाः”, थ्यंल्याः ३९)

लः पापी तिति त्याउँ

अय् जुलुस वःथें च्वं ! मस्यु । पांमथू । धुफ्वः दंगुलिं भ्याः तिनातयागु दु । जिन्दावाद धाःगु लाकि मुर्दावाद धाःगु, मस्यु । जिन्दावाद धाःगु नं मखु, मुर्दावाद धाःगु नं मखु । वि, स्वये । थ्व भ्याः नं तिना तःसां मज्यू ! चायेका तःसां मज्यू । पीच जूगु नं मखु, वा वःगु नं मखु । यक्को बै पु, धूया धू जक । ग्वःदँ दये धुंकल, 'थुगुसी पीच जुइ धकाः बजेट पास याना तःगु । न्ह्याबलें बजेट ज्वयावं । लिंक रोडय् लाःगु जग्गाया मुआवजा बियाः सडक विभागया कित्ताय् लाःगु जग्गात गुलि मिचे जुइ धुंकल । गुलि हिनामिना जुइ धुंकल । नगरपालिकानिसें सकसिनं पुलुपुलु जक स्वयाच्चंगु दु । सुयात छु धायेगु ग्व ! सकलें अथे हे खः । बैक स्वःसा गरीबतय् तयासा बियाः इमि छें, लिलाम यानाच्चनी । नां जाःपिं साहु महाजनतसैं बैकया मा नापं स्वहायेका च्वनी । इमित ज्वनेगु ला छु, हाकुबंजाःया धलकय् तकं तये मफुनि । फुक्कसिनं म्हुतुइ धौ फिना तःगु दु । थथे छाया जुल, सकसिनं स्यू ।

थथे म्वाः मदुगु बिचाःया पपू बुयावःगुलिं व पांमथूगु जुलुसया सः आलमं कृतुवंगु नगु थें ताये मदया वंगु चा हे मचाः । न्हाचः सु हाःगु जुइ ! मस्यु, आःला हाःसः नं मदये धुंकल । हानं भ्याः चायेका स्वये नं मास्ति मवल । धू लायातःगु लँय् मोटर व मोटर साइकल निरिपिरि मदयेक न्यासि चायाः ब्वाँय् वनाच्चनिगु स्वये हे मज्यू ।

अनायास हानं सः तायेदत । व जुलुसया नारा अज्ज नं पां मथू । ह्वाल्ल हिल्ल नं सः ताये दु । लिनाहःगु खः ला मस्यु । जिं भ्यालं धू दुहाँ वइगु ल्वःमंकाः भ्याः चायेकाः स्वया । छम्ह मनू याकःचा वेंय् थें हालाः वयाच्चंगु दु ।

– “लः पापी तिति त्याउँ ! लः पापी तिति त्याउँ !!”

व मनूया ल्यू ल्यू वें गिजे याये थें स्वये हे खाते पहःयापिं बालं च्वनाच्चपिनि मस्त छपुचः छु धाःगु मथुयाः “त्याउँ त्याउँ त्याउँ त्याउँ” धकाः वयात गिजे यानाच्चंगु दु । व वें मनू, मस्तय् च्यूताः मतसे हालाः ब्वाँय् वनाच्चन ।

– “लः पापी तिति त्याउँ ! लः पापी तिति त्याउँ !!”

छु धाःगु छु धाःगु जिं काचाक्क ध्वाथुइके हे मफुत । थबल्य् हे बइगलं जिमि कलाः हालाः कुहाँ वल । – “अय् हे धाये माः इमित ! लः मवःगु बाःछिं मयाये धुंकल । देशय् दक्को मनूत थन वयाः गारय् जू वल । मेलम्चीया राजनीति याइपिं कुलांगारत !

न्हापा लिपा सा थये लः मवइबल्य् ट्यांकरं सां लः इउं वः । आः धयागु ला ग्व, भाषण जक बी सःपिं ! जिं नं धाये इमित ला – “लः पापी तिति त्याउँ !” का हूँ ।” □

(“गोरखापत्र” न्हिपौ, ११२८ चिल्लाथ्व ६)



घाखं च्यमि
राजा शाक्य
१०६२ तछलागा २

घाखं

१. मतकी
२. जि खय्यास मथु : मिलाया (श्रेष्ठ सिटपा लाःगु ११०२)
३. कुचा कुचागु क्रिया
४. ह्वगंगु सर्गः (छिं स्वयाच्यनादीगु घाखंसफू)

आयहिला

५. जीवनया अःपुगु लैपु (सुशाः)
६. अन्धविष्टवासय् छयलाछुला (लोक धापू)
७. अदालत (पिमदंनिगु)

सम्पादन

८. सहलहया सुलचं
९. नेपालभाषा व्याकरण (पिक्काक : नेपालभाषा एकेदमी)
१०. जापानया पुलांगु मचा घाखं
११. डाक्टय्या कलाः
१२. आशा सफूकुथि
१३. आशा सफूकुथिया धलः सफू

क्रिया घाखं

१४. सिंहसार्धघाहु





सुभाय